

天涯異人傳



舊

交通圖書館印行



天涯異人傳序

客讀異人傳而撫手曰甚哉文人之好奇也夫是瓌異絕俗詭奇拔世者詎真人間所有人邪毋亦烏有亡是之流盡信書殆不如無書者耳抒懷子聞而闢之曰陝哉客乎夏虫不可與語冰幕燕不足以知鵠齷齪徧俗之士不可與語乎魁奇俊偉之行勢則然也夫深山大澤不鮮龍蛇駘駘之羣原有騏驥世特無葉公造父其人耳若遽謂覆載之間無神物駿騎則坐井觀夫者天豈其固小也邪客不悅曰固也信子言爲爲不妄已然崎行不經好武犯禁是亦畔道背教之民耳更何足紀乎曰陋矣客客以爲有聖人者出其將比今之士夫之行而旌之與抑將標鄉原而予狂狷與夫狂者氣盛狷者守堅充類引流亦一異人一畸士耳狂者狷者不貽于聖人之門而子乃謂發揮而變化之士乃爲亂不可教不亦羞當世而笑大方乎嗟夫迂儒不可以與權下士不足以企道休已客勿多談客旣噤而退肆舉問對以弁茲書時丁巳季夏抒懷齋主識于滬濱之昨非軒

天涯異人傳 序



天涯異人傳序

綺緣

茫茫四海芸芸衆生羣爲名利所惑隨波逐流營營畢世至老死而無悔斯誠庸愚下質莫可超拔矣是故世界至濁人生至濁舉凡耳目所及幾無一而非俗物也然間有軼出常規不與羣伍或立志高蹈遯跡林泉或未忘俗情遊戲人世要皆與碌碌餘子不相類且並有舉凡飲食起居養身之要道亦與世俗迥殊者曰之爲異誰曰不宜然異人旣遺棄塵事乃多力自韜晦居以巖穴友以鹿豕不復與世人相聞問設有欲探其跡而聆其事者固亦匪易也於是世之人乃以爲所謂異人者多屬道聽途說或且出之于嚮壁虛造良難徵信實則宇宙之大無奇不有遑論人類以萬物之靈而獨無奇異俶詭者哉姜子泣羣瀨東名士尤好蒐輯名人傑作行之于世以補社會教育之不逮而爲衆生說法若風塵奇俠傳虞初廣志諸書一付梨棗光燄萬丈行銷之廣殆無其匹蓋能不悖開濬社會之說而爲世人痛下針砭殊非若其他作者好剽竊香草美人之意而喁喁以記釵光黛影也職是之故爲世所欽近更集十數人之力成名著小說一千種一書洋洋

灑灑不愧大觀其中天涯異人傳一類則姜子所躬輯蓋已舉人所不及言或欲言而不能言者以盡述之萃百數名家于一編允稱傑構苟一開卷已不啻集無量數天涯異人于斗室間而與之晤對聆其聲欬矣不亦可貴哉著者承姜子招亦與其事聊以餘暇爲草序言以誌欽佩焉是爲序

中華民國六年二月昆陵吳惜綺緣父撰于憶紅樓

天涯異人傳目錄

周翁
任三
盲道人上
盲道人下
甘鳳池
戈照隣
三奇人
孫孟孚
桃塢先生
劍客
鐵簫乞者
陳八公
張供奉
風道人
祝由科
吳定州
零陵老衲
鐵骨余天罡

天涯異人傳目錄

顧古湫
顧古湫
許慕義
許慕義
許慕義
戴鈞衡
許指嚴
選卿
胡寄塵
癡虫
闕名
寥
生
闕名
許宗傑
遇春
泗濱野鶴
奚燕子

鞠茂堂
寶店異客
老者
尤生黃天雄
褚復生
太倉庖人
葛衣仙
賣菜傭
賣菜翁
鄭成仙
魯仙
蘇衣僧
馮雄
成都山洞之異人
徐一青
宋山
楚二鬍子一
楚二鬍子二
賣瓜人
白太官一



奚燕子
胡无悶
闕名
聞野鶴
山陽焜
胡寄塵
醉公
張慶霖
江南長恨子
闕名
徐岳
徐岳
闕名
闕名
秋風
秋風
長恨子
闕名
廣老
江南長恨子

天涯異人傳目錄

白太官二

江南長恨子

山林友

白太官三

湯用中

半仙

白大癡

江南長恨子

李德林

異丐一

許宗傑

熊老僕

異丐二

關名

張廣才滕半仙

異丐三

禹甸

河間大漢

異丐四

佩蘭

林先生

跛道

佩蘭

胡孝子

某少年

梅郎

跛丐

黃氏子王季明

橋西亭長

金鈎李

三絕技者

生入

浣紗婦

吳生

羅韋士

辰陽賣薯翁

古塔下客

羅韋士

張七

草庵和尚

關名

黃鬚客

樵夫

野僧

黃力士

無聊

劉騰

胡樸庵

髯翁

關名

某道士

關名

華善述

關名

關名

關名

胡寄塵

胡寄塵

胡寄塵

胡寄塵

胡寄塵

胡寄塵

王瀛洲

楊南邨

楊南邨

楊南邨

楊南邨

楊南邨

857.2
8393
天涯異人傳

姜俠魂輯

周翁

顧古湫

翁字伯甫。姓周氏。芝塘里人。不詳其先所自出。翁形體魁碩。修八尺餘。不持寸鐵。以徒手搏人。出入千百羣中。如無人也。然翁自謂以手攫搏。非能者。事嘗拱手鶴立。而侮之者。倏忽顛躓。頭腫鼻豁。若有鬼神呵之者。未知何術也。又嘗謂以力駕人。無力者當坐受困乎。因力於敵而我無所用其力。斯至爾。爲人循謹。若無能者。無賴子欲從之學。謝弗通。謹厚者質之。輒媿媿語。然涉其藩籬而已。弗能窺其奧也。邑中推大力者爲陳氏子。能立水中。以隻手迎巨艦。當風急浪涌。飽帆揚舳。如矢直注。觸陳手輒止。無勇怯。皆懾其力。疾翁之能也。欲得而甘心焉。倉卒遇諸隘。避之弗及。陳遽躡翁。致銳前撲。翁率繞陳左右。盤辟迴舞。陳足蹴拳舉。盡力揮斥。卒不能近。久之。翁倏攫身空際。如疾鷹急隼。側攫凡鳥。陳驚顧。目未承睫。翁已舉身撞其胸。陳遂不支。頽然就傾。乃匍匐稽首。願稱弟子。大將某者。號萬人敵。聞翁名。延致之。願與角技。翁固遜。強之。笑曰。請以數十毘毬。藉地問何用。曰。恐公仆爾。大將怒發。一擊不中。翁復笑曰。公毋再擊。再擊仆矣。大將愈怒。再擊翁。翁大呼曰。倒應口伏地。然未見翁之舉手也。由是延爲上客。欲盡其技。願弗能。乃厚贈遣之。時錢宗伯受之。負海內望。卜居紅豆莊。客翁。翁止其莊者數歲。鴻儒俊流。過宗伯者。翁並識其面目。聆其談論。晚年率能言之。



河東君者宗伯之愛姬也才名甚噪宗伯故豪侈重以文章致厚賄投遺無虛日所受金悉貯河東所會宗伯適邑居劇盜數十輩謀劫後園莊勢張甚顧重畏翁欲先制之翁方浴聞變遽起右足入禪中左未遑也浴所仄門半掩盜數人挺槍入翁攜尺許布捲其槍數槍并落徐約衣結帶持槍奮呼出盜震聳失氣兔脫鼠竄翁尾之連刺數盜中要害宅遼闊盜衆家人伏匿不敢動盜益猖或抉垣毀戶直闖其室凡四五處所叫囂室中索河東急翁舍前所追盜還擊室中盜紛藉殺一二人不止後至益衆翁計河東儻被劫雖強力者無能役矣遂排闥負河東決圍出匿之善所還逐盜盜失河東莫能發所藏金祛囊衣數十篋去值翁還爭棄擲道際泗水脫命盜既去徐呼其家人收葬之迎河東還實不失一物宗伯捐館河東緝翁去錢氏浮沉里間最後乃客先大父所翁時年九十餘矣兩目盡盲猶倔強不扶杖每飯盡升粟飯已輒談其少年事余方八九載侍大父側備聞之今不能盡憶也翁言初得異僧指授積二十年乃成嘗屬予錄其法爲拳譜一卷後失去又數年卒於家翁無子族子某爲嗣

論曰余幼讀劍仙傳輒驚惑詫異以爲非世上人夫人爲一事誠致其精果歷久而不懈必有大過人者非異事也翁以手搏號於時顧其仆人人不見其運手之迹神矣哉豈古所稱空空兒之流耶抑二十年之精心果力積於漸者然也不悅學則苟而可爲士而無成其愧於翁也多矣錢宗伯以文章毀譽人顧不一及翁或謂宗伯欲祕其盜劫之事者近是余爲表之無使沒沒焉

歲壬戌。余館大臺莊之黎氏。八月既望。主人夜飲。客皆短衣科跣。箕踞作牛飲。撞搪呼號。如沸羹焉。客有任三者。年可七十許。頭禿齒缺。猶勝酒數十斗。與諸少年角勝。酒中乃自言灤州殺虎事。灤舊無虎患。猝有虎入村舍。自晨至食。殺十九人。或折手足。或斷頰。或破腹出腸。旋棄去。復擇人噬。咆哮籬落間。民鍵戶竄伏。道無行者。三適有約。將過其里。親故聞者。咸尼之。三慨然曰。虎爲患。若此。雖無事。猶當赴之。况與人約。而更虎避耶。遂挾二矢。往遇虎。發一矢。中足。時虎方蹲大樹下。被矢怒甚。奮牙爪。前撲三。三竦踞樹巔。虎仰首望。樹吼葉墜。地如密雨。三兩足貼樹枝。以手擦去其翳。徐抽矢。注射志其喉。鏃出喉間者數寸。虎踣地。陷尺餘。斃。三從樹躍下。操空拳。過所約者。門闔不得入。急叩之。大呼。虎已斃。始啓門。備言殺虎狀。聞者。惴栗不即信。乃叫呼其鄉里。數十輩。執械往。虎所見。虎伏地。猶逡巡。莫敢前。一二悍者。稍卽之。輒反走。已而偵其果死。因共舁至隙地。剝其肉。鬻分之。虎患絕。於是衆知三之能殺虎也。方三言時。長榆歷歷。明月如洗。客共屏氣。注目屬耳於三。三掀髯抵掌。且飲且談。余壯之。且喜其靜客喧也。爲之浮一大白。

盲道人上

許慕羲

盲道人不知何許人也。乾隆年間。託跡於溧陽縣張渚鎮之三清觀。中敝袍一領。補綴之痕縱橫。上下往覆。迴環密如蟻聚。雖嚴寒酷暑。未嘗易也。觀中道侶。視其年老衰瑟之態。均唾棄之。勿與爲伍。張渚爲溧邑巨鎮。水陸交通。人烟稠密。商賈潮湧。百貨雲集。地旣繁富。宵小垂涎。加以環鎮市皆高山茂林。綠林豪強。藏跡較易。風高放火。月黑殺人。之事屢有所聞。三清觀財產豐足。香火茂盛。夙著富饒之名。豪強之輩。尤所覬覦。

糾集徒黨。逡撲觀中。欲肆劫奪。道衆聞警。奔竄避匿。勿敢抗拒。幸觀門堅固。雖奮力攻撲。未易遽入。盲道人適從廚中來。目擊道侶驚慌避匿之狀。知爲盜劫。不及携取器械。徒手外出。將至觀前。忽聞巨聲響。觀門已毀。數十強徒。各執刀杖。蠶擁而進。道人飛步出。矗立儀門外。張兩手橫杆。盜衆曰。此地乃十方清靜之所。道衆修真之地。諸君欲得金銀財帛。宜往富室豪門宦家巨族。方可償願。不應擾及方外諸君。乘興而來。須知出家人。雖無驚人藝業。亦有保身武技。否則雲游四海。到處爲家。何以能苟全性命。遠避禍患乎。今且不必他求。第就道人而言。年逾耳順。老將就木。猶能赤手空拳。堵住此門。使諸君不得越雷池一步。羣盜大怒曰。何物老道。不知死活。擅敢口出大言。速獻金帛。免爾狗命。道人笑曰。善言相勸。諸君不肯俯允。恐道人一舉手。卽成齋粉矣。一盜聞言。怒不可遏。揮刀而前。道人迎以臂。鏗然一聲。刀已脫手。飛去。盜衆呼聲如雷。兵刃齊下。道人撥以指揮。以肱掃以股蹴。以足凡經其手足所及者。或顛或臥。或斜欹於地。或舉刀直立。悉目瞪舌橋。口難出語。手足如縛。不能動彈。餘衆不知道人何術。皆不敢前。忽一健者。越衆飛躍而出。厲聲曰。賊老道敢以邪術迷人。決難貸爾性命。刀光熠熠。直奔道人。道人微側其身。駢兩指。忽奮勇之健。盜已擲刀而立。呆若木鷄矣。衆盜見此。更相顧失色。莫知所措。道人徐曰。吾始以若輩爲綠林豪傑。必有驚人聲勢。故以善言相勸。今乃知皆鷄鳴狗盜。無知之徒耳。本應殺却。以示懲儆。惟恐血肉狼藉。污我清淨之地。速棄爾兇刃。及兵回心向善。姑寄驢頭於若頸。盜衆大驚失色。悉擲其兵。長跽求活。并爲負傷者乞命。道人徐向諸負傷盜。或掌其頰。或擊其背。或提其耳。或持其頸。而顛者臥。者斜。欹於地者舉刀直立者。呆若木鷄者。皆活動如

舊互相顧視不知其故道人叱之曰若曹既得命不速行欲何爲者經此一創猶不洗心革面各安本分再遭吾手决不輕恕也羣盜聞言如得赦令抱頭鼠竄而去自此之後盜賊皆畏道人之威感道人之德不敢涉足於其境張渚鎮遂免騷擾之患而盲道人之名亦由是卓著矣初時鎮中耆老紳富以盜賊出沒爲害滋甚相與謀抵制之策醜錢斂財聚集鄉中年少子弟延聘拳師學習武技以爲保護鎮市防禦盜賊之計及聞盲道人禦盜之事互相詫異以爲奇事咸疑道人有異術故能赤手制羣盜如摧枯拉朽也拳師曰否非有異術也道人蓋善易筋經知點穴法耳吾昔聞諸吾師曰雍正時有俠客十三人皆能騰空匿影飛劍于數十里外取人首級如探囊取物若遇敵人則一舉手而敵如被縛技之精者推一僧家爲最今觀盲道人之制盜殆俠客之流亞歟其技曠世無儔有幸遇之不可不一請教也諸年少乃往道人所欲習其技及入門羅拜於前丐道人授以技道人曰咄諸君何事者豈癩耶無因而拜一貧病之老道諸君果何所聞而來耶試視老道衰惰至此豈有武技足以授諸君乎諸年少擾之不已且舉制盜事爲證道人不能諱乃曰非吾鄙吝不肯授諸君也因傳授此術頗非易事果誠心欲習者請各回家闢一靜室趺坐蒲團上作僧家入定之狀能於二十四小時間萬緣皆寂一念不起乃可以授吾術也衆俱畏其難不敢復騁道人惟汪生蒼崖頗信其言篤志欲習汪本世家子父祖皆以軍功起家生於幼時卽富膂力習騎射挽強躍駿願盼自雄尤傾心於劍術恆以不得名師指授爲憾旣聞道人言卽回家閉關却客謝絕人事趺坐十日潛詣道人求授其技道人曰習技雖以智巧爲先究以勇力爲本子雖稍具膂力祇可誇耀於常人耳烏足恃哉遂

啓篋出書一卷付生曰此達磨易筋經也非世間所傳者可比子勿輕視之倘能潛心體會演習一月之久自有奇効且出藥界生曰此英雄再造散天下之至寶也子內服此藥外習此經一月之後可來授技生受藥攜書叩謝而歸閉戶潛修精勤勿懈未十日膂力勝前數倍出於諸人角向之力出生上輕視生者皆辟易不敢與敵生心竊喜練習一月復詣道人請授劍術道人詢其近境生詳述之道人曰孺子可教也因問生欲授何術生曰弟子聞之古時劍俠有所謂空空兒精兒者能徒手出入於千軍萬馬之中如入無人之境以身附劍而行瞬息千里人不能見此何術也弟子心竊儀之不識可以學而至乎道人曰此吾道之上乘也子秉此大願深堪嘉尚然傳授劍術非可一蹴而至必窮年累月竭力揣摩始有所得亦必其人襟懷光明行爲磊落毫無自私自利之心存於胸中乃能有成人第見劍俠者流行縱飄忽出沒無常所行所爲不可測度飛騰騫舉來去無形疑其別有神術孰知劍俠實無神奇之術惟憑胸中一股浩然之氣千錘百鍊純然無滓乃能與其所用之劍合而爲一意念起處隨心所欲絕無阻闕倘有一毫人欲之私雜於其中則氣難純一必無成矣故習劍術者必有至大至剛之氣能忍能耐之性大公至正之心體孔孟殺身成仁之意具釋迦慈悲救苦之懷然後可以學習劍術昔之紅線聶隱黃衫虬髯能無影無蹤來去如飛者非有仙家隱身匿形之術也惟以孟子我善養吾浩然之氣一語爲秘訣精心鍊習工夫純熟火候已成遂能充塞於天地間耳謂俠客具有異術者皆無識之輩擬議之辭也吾觀子之心術尙屬公正襟懷亦復磊落跌坐蒲團能一周間不萌私念自是可教之材然劍術有二派一曰丸一曰劍丸雙而劍單子習丸乎抑運

金習劍乎生曰丸與劍未知孰愈道人曰丸爲木氣得東方之精道家所謂木母也鍊而習之揉兩劍如丸
驅用之時或吐自口或出於鼻成兩道青光飛躍跳盪可以隨心所欲劍爲金氣得西方之精卽道家所稱
公也鍊七首一具可大可小或藏於胸或納於囊運用之時一道白光上下飛舞變化莫測此二術者並齊
駕絕無軒輊苟得其一熟而精之登峯造極皆可以窮極變化運泰岱於指掌之上納須彌於芥子之中無
所謂優劣也子擇其一吾當盡心傳授生聞言拜伏於地願請兼之道人曰一則易精兼則難成子宜先擇
一派習而鍊之果能積功累行造其極點然後兼之未爲晚也否則藝分而不工徒爲他人所乘耳生曰旣
如是弟子夙傾心於劍願受業焉道人乃於革囊中出一利七首長僅逾尺亦薄如紙寒光熠熠冷氣森森
犀利鋒銳世無其匹顧謂生曰此劍雖小能切金斷玉削鐵如泥干將莫邪之儔非凡間物也精心習之身
與劍可合而爲一雖古之劍俠何以過哉遂命生長聽受戒傳以劍訣口講指畫摩挲其頂叮嚀諄囑良久
始畢生一一心領神會謹識於懷從此晨夕受教朝夜孜孜無或稍懈凡六閱寒暑曰道成矣恃此出游遍
歷天下雖然超超元著亦非碌碌人後者矣吾以授子劍術羈此三載已誤却幾許功行今當周行四海廣
積功德以畢吾願生聞道人言戀戀不舍堅詢歸期道人曰子何胸襟之隘也旣已學成劍術豈可株守鄉
關默默以終乎吾爲子計亦當周歷天下遍游名山大川以廣眼界遇有不平拔刀相助行俠尙義濟困扶
危始不負吾三載指示之苦心也若終老田園碌碌無聞豈吾所期於子者哉生聞言恍然大悟矍然而興
曰承師明示頓開茅塞弟子自當謹遵師訓游行四海以助吾師廣積功德也道人乃欣然曰子能如是吾

道得人矣。當以生平歷史詳告於子。使知吾之出處也。雍正朝有所謂十三俠客者。吾卽其一也。當雍正任東宮時。因儲位未定。弟兄衆多。不知鹿死誰手。遍交海內英雄豪傑。凡有一藝之長者。莫不虛心延納。羅致門下。以廣聲氣。而樹羽翼。吾輩兄弟共十三人。以僧人靜海爲之長。鋤強扶弱。名震一時。皆客於雍正邸中。其款待之厚。供應之豐。莫可言喻。吾輩乃傾心吐膽。爲彼輔佐。每晚必入宮偵探秘密。蓋世祖入關之後。以前代預立儲君。易啓爭端。遂著爲爛戒。不立太子。每當易代之時。何人入嗣。悉以遺詔爲憑。而遺詔則於未晏駕之前。由御筆親書。藏於正大光明殿匾額之中。雖親信重臣。以及后妃近侍。無參預者。康熙暮年。亦遵祖制而行。吾輩探知其事。卽由靜海盜遺詔。改書雍正之名。還置匾額之中。故聖祖龍馭昇遐。雍正遂得入繼大統。卽尊之後。惟恐諸王大臣心懷不服。暗萌異志。復令吾輩四出偵探。遇有異己之人。卽發其陰私。羅織成獄。一一鋤除。故雍正朝凡諸王邸中大臣私室之一舉一動。以及民間之事。若大若小。宮中無不知之。時人皆服雍正神明。甚至不敢談及國事。不知皆由此十三俠客者爲之刺探也。反側旣除。可無後顧之憂。復念此十三俠客各具驚人藝業。絕世技能。若一旦不爲所用。更無制服之術。因施其狠心毒手。暗用離間之計。使此十三人者各懷意見。互相并吞。自行殘殺。迨十三人殞滅過半。吾於此時始知其計。亟圖脫身。而靜海猶不知悔悟。尙日事剪除。同道爲之効力。吾以靜海技出吾上。若遽爾逃匿。雍正必遣靜海跟蹤追覓。斷難抵禦。非特不能脫身。反致自速其死。於是備一通底之棺。預藏於外。暗命心腹之人佈置妥貼。然後僞稱病重。運用併氣之工。詐爲已死。雍正旣聞此信。倍覺欣然。絕不置疑。卽靜海等同道之人。目擊吾尸。亦以

爲真送殮之後相率而去待至夜間心腹之人啓去棺底放吾外出改作道裝僞爲雙目俱盲者逃出京師始得優游至今吾行之後雍正仍用前策使之自行剪除祇餘靜海一人猶不輕恕欲設法殺之靜海至此始識其計逃遁至海島之中依呂四娘而居先時明儀嬪有呂留良者不忘明室著書立說詆毀清朝身故之後其徒僧靜等欲繼其志恢復明社事機敗露有詔戮留良之尸滅其十族呂四娘爲留良孫女幼習武技長諳劍術以故十族誅夷獨四娘遁至海島隱跡埋名以圖報仇祇以十三俠客日夕保護無隙可乘雍正亦知四娘之勇嘗與靜海商酌剪除之策未及施行而靜海已悟其詐隱遁而去雍正知其別無匿跡之所必往海島與四娘同居乃命親信之人至島中訪其蹤跡詎意靜海以誤中姦計使同道之人皆死於非命事後追思悔已無及早萌捐棄人世之念但不甘徒自輕生耳逆知雍正必命人追蹤覓跡暗中察訪欲以己之一死爲同道之人雪恨并成四娘復仇之志故所遣之人方至海島靜海卽迎入島中顧謂之曰君之來意早已知悉吾厭棄塵世也久矣君旣至此卽將吾頭回京覆旨可也語竟一手提劍一手持頭曰取去遂自刎而死其人旣得靜海之頭喜出望外匆匆欲返四娘僞爲被難之女丐其携之同行其人應允偕之返京抵京覆旨以首級獻於金堦雍正心訝靜海捐生之易疑其有詐親自驗勘真僞不料四娘隱身靜海首級之中突然飛入御口之內雍正目覩靜海之頭忽有白光一道直入口內亟詢其人曾與何人同行抵京其不敢隱諱詳細陳明雍正大驚失色口呼不妙身已斜欹於御座之上舉朝大臣莫測所由亟亟護駕回宮雍正惟稱腹痛延至夜間遂爲四娘所弑携首而去王公大臣以事關重大勿敢宣揚僞稱暴病

而崩宮禁深幽外間不知其細雖有傳聞亦不得其詳也吾自雍正薨後始敢坦然無慮雲游四海濟貧扶困抑強扶弱以行素志數年來已收男門徒二人女門徒一人并子而四矣向與諸門徒約每越三載必至天台雁宕之間敍首一次各述三年中所歷之境且量其功德之大小以爲殿最焉會期已近久欲登程以子向學心堅功行將滿不忍半途拋棄使九仞之功虧於一篑故稽遲至今此時技術已精可以行矣子既立願周游天下亦宜從速首途不可戀戀家中因循自誤惟有一語相囑務須切記不忘江湖之中每多英雄混跡萬勿輕易與人角技子術雖成究未達登峯造極之詣若以一時之性憑血氣之勇輕於嘗試恐致顛躓三年之後可俟吾於天台雁宕之間當引子與諸同門會晤也道人言畢遂飄然而去不知何往云

盲道人下

許慕義

盲道人既去之後汪生蒼崖擬攜家事略備行裝意將匹馬懷劍不携僕從獨自一人窮閩嶠之險覽燕齊之勝達岷蜀之郊出黔滇之道周游天下徧歷寰宇然後取道浙省與道人會於天台雁宕之間丐其再授飛丸之術立志已定即日首塗謹記道人之言恂恂退讓不露圭角沿途之中惟觀山玩水以遣心懷絕不言及技術間有人與生結伴同行見其溫文柔和弱如處女亦無疑其爲精技擊諳劍術者一日行至山東道上貪看山色緩轡而行不覺天色薄暮生初次旅行未知世途嶮巇道路難行坦然無忌徐策騎馬繞山而行驟聞車聲轆轤自後而至回眸睇視則貨車數輛銜尾而行蓋客商販運貨物行至此處天色已晚意

欲○匆○遽○趕○程○投○宿○旅○店○者○生○視○其○車○滿○載○貨○物○沉○重○異○常○運○行○艱○難○甚○爲○遲○滯○車○後○則○有○壯○士○四○人○各○佩○刀○劍○緊○緊○追○隨○爲○首○之○人○仰○首○望○天○曰○貪○行○道○路○日○已○銜○山○尚○須○十○餘○里○方○有○旅○店○此○處○盜○賊○出○沒○素○稱○難○行○之○地○車○中○之○物○尚○有○閃○失○關○係○非○輕○吾○等○當○加○意○謹○慎○得○達○宿○店○方○保○無○虞○生○遙○聞○其○言○知○四○人○爲○鏢○客○者○流○仰○視○天○空○一○輪○紅○日○已○沒○西○山○四○周○環○顧○則○山○深○林○密○勢○極○險○惡○頗○爲○四○人○憂○慮○忽○念○自○己○亦○蹈○險○境○若○不○奮○力○猛○進○倘○遇○豪○客○雖○不○畏○怯○又○須○多○費○手○續○何○勿○從○速○進○行○乎○遂○加○鞭○縱○轡○飛○馳○疾○驅○回○視○後○面○車○輛○已○不○可○見○方○幸○將○達○宿○店○堪○脫○險○境○詎○意○林○樾○深○處○鳴○鏑○聲○起○一○箭○飛○來○生○亟○以○左○手○接○之○第○二○箭○復○如○飛○而○至○則○以○右○手○承○之○兩○手○未○遑○騰○空○第○三○箭○已○迎○面○飛○來○亟○以○右○手○所○接○之○箭○擲○之○箭○簇○相○觸○鏗○然○一○聲○兩○矢○盤○旋○馬○前○俱○墮○於○地○盜○魁○驟○馬○飛○至○燕○領○虎○額○虬○髯○深○目○魁○偉○雄○壯○呼○聲○如○雷○生○亟○出○劍○於○囊○飛○擲○空○中○如○長○虹○一○道○橫○貫○天○際○劍○光○指○處○嘍○兵○十○餘○人○首○已○飛○去○生○方○欲○運○劍○直○奔○盜○魁○盜○魁○目○視○白○光○早○識○來○者○爲○飛○劍○知○不○能○敵○長○嘯○一○聲○遽○爾○遁○去○生○以○不○諳○路○逕○天○色○復○暮○恐○遭○暗○算○亦○不○窮○追○遂○策○馬○前○進○覓○取○宿○店○行○六○七○里○始○有○逆○旅○卸○裝○暫○憩○略○坐○一○時○途○中○所○遇○之○車○及○四○鏢○客○亦○來○投○宿○見○生○詢○及○途○中○曾○見○盜○尸○橫○臥○於○地○似○否○爲○君○所○殺○生○乃○詳○述○所○遇○絕○無○隱○諱○四○人○者○起○而○謝○曰○某○等○今○日○得○免○失○誤○皆○君○惠○也○假○使○無○君○前○驅○飛○劍○殺○賊○此○時○已○不○堪○問○矣○互○相○談○論○適○爲○店○主○所○聞○大○驚○言○曰○君○等○遇○燕○領○客○也○生○曰○然○店○主○曰○然○則○車○中○之○物○及○諸○君○身○命○均○莫○保○矣○四○鏢○客○聞○言○相○顧○失○色○不○能○出○語○生○曰○無○傷○也○渠○見○吾○劍○起○已○望○風○而○遁○安○敢○復○出○乎○店○主○曰○正○以○燕○領○客○不○能○敵○君○爲○可○危○耳○生○詰○其○故○曰○燕○領○客○有○一○妹○精○通○武○藝○且○諳○

劍術能飛劍於十里之外。取人首級。倘遇勁敵。燕領客不能敵。則遣其妹俟於前途。爲之報復。故遇燕領客而敗者。不過損失財帛。尙可留得性命。遇其妹。則性命財帛皆莫保矣。諸君今日雖勝其兄。恐於明日不能敵其妹。吾故以爲危耳。生曰。此地何名。隸屬何縣。境界地方有此巨盜。何以不控諸官中。請兵收捕。店主曰。燕領客居此已四五載。雖爲寇盜。而生性慷慨。頗具俠氣。近山百里內所有鄉村。非特不肆擄掠。遇有緩急。且肯濟人之急。恤人之困。盡力相助。此地名楓樹崗。隸在平縣境。每值徵稅之期。悍吏絡繹來鄉。誅求搜括。敲詐恐嚇。千態萬狀。甚至鷄犬不寧。坐臥難安。居民經此騷擾。苦不堪言。自燕領客居於此。崗首出命令。凡屬吏役。官差不准涉足於其境。距此百里以內。一切徵收之稅。以及田賦地丁。概不繳納。官吏懼其勇猛。不敢與較。而遠近居民。始免悍吏之害。得能安居樂業。不致傾家蕩產。坐受橫征暴斂之苦。自以感恩銜德。深願燕領客永遠居此。不復他徙。安肯控之於官乎。生聞店主之言。撫髀長嘆曰。嗟乎。官吏之暴。甚於盜賊。何怪世道昏昏。人心思亂。豪強遍地。寇盜滿山乎。因謂四鏢客曰。吾聞店主之言。知燕領客爲有心人。俠而隱於盜者。非尋常草寇可比。其妹旣通曉劍術。必有來歷。綠林之中。恆多行俠尙義之英雄。混跡其間。不可一概目爲盜賊也。吾亟思一晤其妹。與之比較技術。以決勝負。諸君明日偕吾同行。敢保無虞也。四人者。知生之能欲倚爲長城之靠。以脫於險。旣聞斯言。齊應曰。諾。翌日之晨。生跨馬前驅。四鏢客押車隨行。途中初無所遇。及暮。忽覩一片茂林。遮斷前途。路徑曲折。頗難行走。生知己臨險地。卽命車輛暫止。前途獨自策馬入林探視。未及林前。已見一女子自空而下。阻住去路。嬌聲叱曰。來者卽昨日英雄。傷吾兄部下者乎。吾已守

候多時矣。生視女子年方二九，手携利劍當道而立，身材婀娜，舉止輕盈，豔如桃李，冷若冰霜。知爲勁敵，不敢輕慢。亟應聲曰：「昨日以保護生命之故，不得已殺傷令兄貴部。此事安足掛懷？令娘何至尋仇？」女曰：「吾今來此並非爲昨日殺傷部下欲圖報復。以君既能飛劍取人首級，必精劍術。吾願與君比劍以決勝負。」語聲未絕，劍已突出於前，指生飛來。生亟出劍抵禦，兩劍騰空，上下盤旋如雙龍相爭，夭矯天際，交繞互纏，不能解脫。門至沈酣之時，如有萬道寒光逼人，毛髮不能注視。生竭生平技倆，運用其劍，飛躍跳盪，不離女之前。後左右女之劍亦忽起忽落，或上或下，直奔生之咽喉命門，刺擊不已。劇戰良久，生固不能勝，女亦難以敗。生正值盡力爭鬥之際，女之劍光忽斂，躡身一躍，出十餘丈外，連呼曰：「止止！」生亦收劍而立，問女曰：「勝負未分，何事停戰？」女曰：「吾二人鬪劍已久，正如五銖六燕，銖兩悉稱，技已可知。所未知者君之胆量耳。吾兄已驅後面車輛爲質，君如具有肝胆，不畏艱險，可自來吾家索取可也。」語竟收劍於囊，嫣然一笑曰：「來與不來，聽君自便。吾去也。」引身一縱，已至林巔，飛步而行，疾如鷹隼，輕如猿猴。惟聞風聲瑟瑟，樹上枝葉毫不傾偃。生於斯時，猝不及防，意欲追之，轉瞬之頃，已杳然矣。生無可奈何，回至停車之所，惟見四鑣客呆立不動，面如死灰，審視車輛，則已不翼而飛矣。生問其故，四人曰：「君與女子戰鬥方酣之際，盜魁忽率數十嘍兵，劫去車輛。吾輩死命與爭，嘍兵乘吾輩兵刃相接，不暇兼顧之際，一擁而上，驅散車夫，驅車而去。吾輩爲盜魁所逼，不能脫身，遂爲劫去。盜魁見車輛已遠，長嘯一聲，疾馳而去。頃刻之間，已無影無蹤。雖欲追之，亦無及矣。車中之物價值巨萬，旣爲劫去，安望珠還。吾等四人性命休矣。言時，泣然出涕，放聲大哭，不能仰視。生聞言，

之下不禁忿火中燒勃然怒曰何物強徒無知草寇敢以姦謀算我豈謂汪蒼崖不能搗爾巢穴耶亟欲孤身往探方思拔劍而起陡憶盲道人臨別諄囑謂江湖之中恒多豪傑英雄不可輕敵恐有顛躓之虞吾以一時之性頓忘師訓逕與女子鬪劍以至失去車輛險遭不測倘若輕入盜窟受其暗算豈不枉送性命乎然車輛已爲所劫不至盜窟則貨車安有復還之望雖然與吾無涉而目覩四人悲泣之狀心又不忍况昨宵於逆旅之中口出大言謂與吾偕行堪保無虞今日有失豈不慚愧言念及此復奮然曰不入虎穴焉得虎子任是刀山劍樹鬼巢魔窟吾必親往探視卽命四鑣客仍回昨日逆旅安心守候盜窟距此必非遙遠吾當獨往覓之索回車輛遂縱轡前進獨行曠野之中舉目四顧但見削壁危崖難容跬步疏林遠樹絕少人蹤徑似羊腸迴環曲折石如獸蹲突兀高低地勢之惡非可言喻生覩此險境且行且思曰此時天色方暮盜窟之中必有準備倘爲驚覺衆寡不敵已是危險更將小徑塞斷使吾難覓歸途豈不坐困何妨延至夜間始入山內乎因於山麓小憩片刻出囊中乾餼略充飢腸復就溪頭掬水飲之腹果渴止陡覺精神倍增仰視天際星月微茫夜色已深乃驅馬前行直奔山林深處穿林越澗約行五六里已覩林薄中微漏燈光亟趨就之見一巨宅巍然矗立生念深山之中何來如此巨宅度必盜窟無疑意欲直前叩門耳際忽聞水聲潺潺急俯首審視則四周皆汪洋大河巨宅建於其中生乃繫馬河干一躍而過旣抵彼岸卽有惡犬數十猛若巨葵嗥聲如豹羣來撲生作搏噬之狀生亟以兩拳揮之擊斃其二羣犬始不敢吠方擬逕往叩門忽聞一聲雙扉大啓探首微窺則燈燭輝煌僕從排立如迓貴客之狀生不明其故勿敢遽入躊躇之

間所謂燕領客者已盛服而出既見生恭立致敬肅客入內生於此時不辨吉凶進退兩難但念事已至此斷無示以畏縮之理苟有不測先飛劍斬燕領客然後再與女子比較優劣籌畫既定手提寶劍昂然直入甬人門結綵懸燈光輝奪目堂中則圍以錦幄張以繡幕紅燭高燒氍毹貼地臧獲數十輩皆花冠錦衣伺於堦前見生入咸垂手侍立似致敬意生至此如墮五里霧中不知所措燕領客邀生登堂肅之上坐拱手致詞曰英雄賁臨蓬蓽牛輝干犯虎威尙希見宥生見其禮意殷勤亦復欠身言曰日間誤傷貴部負罪良深不責鹵莽反荷寵渥益增惶恐燕領客曰英雄貴姓高名仙鄉何處未知習藝於何人門下敢乞詳示生因告以鄉里姓名并學劍之由燕領客肅然起敬曰舍妹歸來言及君之劍術大有淵源必爲師伯所授果然不出所料竟爲盲道人高足邂逅相遇真乃大幸生聞其呼道人以師伯知爲同門亟詢姓名燕領客曰弟葉姓名俊家父職居總戎因爲仇家所陷屈死囹圄舍妹闈字小鸞曾習劍於呂四娘之門四娘與尊師源出一派嘗爲舍妹言及以知之生聞言之下欣喜無比欲請小鸞相見以謝日間冒犯之歉并乞賜還車輛燕領客笑曰日間因君劍術高明意欲屈駕賁臨故聊施小計以引君耳車中之物原封不動明日自當送還至於舍妹相昭一層且容緩商蓋君爲當代奇人蓋世英雄舍妹擇配多年未見有如君之英豪俊雅者願委身君子執箕帚之役而備巾幗之數今夕乃黃道吉日堪以合卺片其勿辭生亦欽女之技豔女之美心甚愛慕忽聞斯言驚喜交迸方欲出語而衆樂競奏簫管悠揚燕領客起曰吉時已至請君更換冠服參拜天地語竟卽攜生入更衣室中催促更換生情難固却聽其所爲更衣方畢儼相入請引導者或推或

挽○行○至○中○堂○女○已○紅○巾○羃○首○向○北○而○立○生○至○並○肩○交○拜○送○入○洞○房○郎○情○似○玉○妾○貌○如○花○美○滿○姻○緣○歡○戀○可○知○
矣○翌○晨○相○偕○出○外○見○燕○領○客○生○請○送○還○車○輛○燕○領○客○大○笑○曰○此○豈○尚○待○言○耶○君○在○黑○甜○鄉○時○吾○已○命○人○送○往○
逆○旅○點○交○饒○客○矣○生○聞○言○亦○深○服○其○行○事○光○明○手○腕○敏○捷○自○此○居○於○山○中○與○女○愛○戀○備○至○暇○則○並○坐○閨○中○細○
詢○家○世○女○未○及○啓○齒○已○含○嚙○蹙○額○盈○盈○欲○泣○生○亟○叩○其○故○始○知○女○父○初○任○副○將○蒞○任○朔○方○受○某○大○將○軍○節○制○
大○將○軍○聞○女○之○美○且○知○其○熟○諳○劍○術○與○己○子○年○歲○相○若○欲○聯○秦○晉○之○好○女○父○知○大○將○軍○怙○勢○專○權○某○子○復○無○
惡○不○作○較○乃○翁○尤○甚○安○肯○以○愛○女○送○入○火○坑○乃○以○齊○大○非○偶○爲○辭○大○將○军○卽○保○女○父○材○堪○大○用○升○授○總○兵○復○
命○媒○氏○致○意○三○至○而○三○却○之○且○曰○吾○虎○女○豈○配○犬○子○官○可○去○頭○可○斷○吾○女○必○不○可○得○大○將○军○聞○言○怒○髮○冲○冠○
銜○恨○切○骨○遂○誣○以○私○通○寇○盜○意○在○謀○叛○削○職○下○獄○籍○沒○其○家○父○以○憂○憤○卒○於○獄○中○女○與○其○兄○殯○殮○父○尸○暫○厝○
荒○郊○知○仇○人○尙○欲○斬○草○除○根○以○絕○後○患○遂○喬○裝○而○遁○至○楓○樹○崗○暫○隱○於○盜○非○得○已○也○久○欲○爲○父○報○仇○以○大○將○
軍○幕○中○能○人○頗○衆○防○範○嚴○密○燕○領○雖○精○武○藝○不○諳○劍○術○難○以○相○助○一○弱○女○子○行○此○大○事○惟○恐○打○草○驚○蛇○反○成○
畫○餅○計○惟○配○一○英○雄○夫○婿○爲○之○臂○助○庶○可○償○願○物○色○多○年○未○有○中○選○之○人○日○間○與○生○比○劍○見○其○英○雄○絕○倫○實○
非○凡○材○故○刼○取○車○輛○誘○生○前○來○結○成○連○理○徐○圖○報○仇○之○策○耳○生○旣○知○其○詳○慨○然○言○曰○卿○事○卽○吾○事○也○旣○有○不○
共○戴○天○之○仇○理○宜○報○復○但○卿○爲○閨○中○弱○女○未○便○出○頭○露○面○吾○雖○不○才○仗○師○尊○所○授○劍○術○足○可○與○卿○雪○恨○卿○且○
安○居○家○中○吾○當○飛○劍○取○仇○人○之○首○獻○於○卿○前○女○亟○止○之○曰○君○毋○任○性○妄○爲○須○知○吾○之○仇○人○現○握○數○省○兵○權○幕○
府○之○中○謀○臣○如○雨○勇○將○如○雲○豈○易○得○手○若○念○結○髮○之○情○助○吾○一○臂○之○力○已○足○感○矣○生○曰○旣○爲○夫○婦○自○當○患○難○

相同。卿有深仇，豈有不盡力相助之理？女聞其言，欣喜無量，囑生務宜慎密，仇家勢焰薰天，炙手可熱，倘一洩漏，功難成矣。生亦深然其言，唯唯應諾。自此密密佈置，彌月而後，夫婦二人跨馬而去，楓樹崗上惟餘燕領客一人獨居。未及兩月，燕領亦蹤跡杳然矣。於燕領客離崗之日，遠近風傳某大將軍夜宿署內，忽失其首，欽限嚴密偵緝，凶手民間紛紛議論，詫爲奇事，而不知大將軍之死，與燕領兄妹大有關係也。

俠魂曰：丸劍兩說，厥有真傳，雍正盜位之疑，稗乘每主其說，惟飛俠入口，似嫌矯枉過正，斷難成爲信史。然其一路說來，亦覺頭頭是道，蓋武成二三策，從古如斯，文人傳會之談，何書烏有？讀時卽信以爲真，亦無不可耳。

異師同源，道宗其一，故女能知汪生之劍術，而生不能知女之劍術，蓋汪之閱歷，則猶淺於其女也。吾謂其女重在報父仇，以託身於人耳，否則吾爲汪生危矣。

甘鳳池

許慕義

甘鳳池，江甯人也。以武勇鳴於時，世之言技擊、談劍術者，咸推重之。如泰山北斗焉。身材短小，不異中人，於武藝無所不曉，且善內工，能運氣，熊經鳥伸，導引服氣之術，靡不精研。力可扛鼎，手能破堅，握鉛錫，輒鎔爲水，或立而酣臥，鼾聲如雷，雖數十人推之，不能動。同里譚氏巨富也，有少子年甫十九，患瘵疾，延名醫治之，百計不能效。甘踵門自薦，言能治之。譚喜甚，謂病愈之後，願以千金爲壽。甘乃闢靜室一間，盡室戶牖窗櫺，不使略透風。日夜與病者合背坐，凡四十九日，霍然而愈。譚遂以千金報之。康熙中，客於某王府，王知其武勇絕倫，延爲上客，敬禮有加。邸中技勇之士，皆出甘下，名以大震。有張大義者，亦以勇力自鳴於世，聞甘之

名不遠千里。自濟南來見王。王設宴款之。甘亦在座。大義自誇其技。蓋世無雙。行徧數省。未遇敵手。歷述生平。揚揚自得。目空一切。至得意之時。輒拍案狂呼。以顯其能。甘覩其狀。惟俯首微哂。不贊一語。飲酒至酣。大義請於王。願與甘角技。甘固辭不允。王以大義言誇而語張也。欲令甘敗之。以抑其氣。因固命之。甘不得已而起。大義亦起。方欲角。忽視甘如丈二神人。懼不敢前。謂甘曰。始見子眇小丈夫耳。繼乃大若。是耶不與。子角技。請與子較。脛力可乎。甘曰。諾。大義身長八尺餘。脛力強大。雄猛非凡。以鐵裹拇。疾趨而進。齧躍蛟騰。如風雨之驟。至王與左右皆爲甘危。甘却立倚柱。俟其至。切以手大義號呼。仆地。血流滿鞞。解視裹鐵盡嵌入拇矣。由是王更奇甘。會鑄紅衣大炮。成試之力。可穿山。御駕臨觀。賜號鎮國將軍。王謂甘及衆門客曰。若輩以勇力自矜。常謂天下無敵。今日大炮已成。有此利器。汝曹無用武地矣。衆聞言。默不能對。甘獨應聲曰。紅衣大炮。雖至猛烈。祇可轟尋常人耳。若以臣當之。恐大炮亦失其利矣。王嗤其妄。甘請試之。衆門客亦忌甘之技。出己上也。咸慙。惠王曰。甘君必力能抵禦大炮。始敢出此大言。大王何不從其言。一試其技。王聞甘言。將信將疑。亦欲一觀其術。遂允於翌晨試驗。甘既退。有與之厚者。咸爲之危。皆咎甘不應鹵莽。應承血肉之軀。安能與炮火抵抗。明日試技。必無幸。事宜設法避之。甘謝曰。諸君厚意。感且不朽。但人生於世。信用爲先。人而無信。生不如死。吾言既出。安可返汗。雖化爲飛灰。亦無恨也。翌晨王與衆客偕至教場。命炮手預設炮架。準備施放。甘已徐徐而來。若不知有試炮事者。見王後。安然入坐。毫不介意。王詢之曰。甘君抵禦火炮。未知用何器械。請爲言明。以便預備。庶免臨時匆促。有誤大事。此事關係生命。非同小可。切勿兒戲視之也。

甘聞言恭身應曰。此炮共有幾架。王曰。已有三架。造成堪以施放。甘曰。請大王降諭三架大炮。魚貫排齊。依次施放。臣能赤手空拳以禦之。王聞言深以爲奇。遂命如言而行。甘卽起身辭。王降塔而下。直立於第一架炮前。炮手振動機關。一聲響。勢如天崩。向甘轟擊。甘已踴身一躍。飛過炮架之後。兀然而立。絕無損傷。王與衆客齊聲喝采。贊聲不絕。甘復至第二架炮前。跌坐於地。機關方動。甘已運用氣力。一蹲。半身陷入地中。炮彈悉從頭上飛過。仍無絲毫及身。觀者更拍手歡呼。齊稱奇事。甘卽起身。兀立於第三架炮前。俟其施放之時。亦不跳躍閃避。以身承迎。炮火於彈烟之中。飛舞而起。騰入空際。炮烟銷散。王與衆客不見甘之影蹤。大驚失色。疑其爲炮火擊成飛灰。口雖不語。心內懊悔。非常不應。令其連禦三炮。致送性命。正欲傳令尋覓甘之尸骨。忽見空中一人。疾如飛鳥。落於塔前。定睛視之。則甘也。神情如常。容色不改。拱手謂王曰。幸不辱命。三炮皆未受損。王於此時五衷欽佩。深服其技。降塔言曰。甘先生真神勇也。誠可稱天下無敵矣。遂命撤去炮架。與甘並馬而行。偕回邸中。大設酒宴。爲甘慶賀。甘居王府數年。王始終敬禮。未嘗稍衰。一日。忽啓請於王。欲回鄉掃墓。王留之。再四而不得。遂厚贈贖儀。諄囑掃墓之後。從速來京。萬勿逗遛鄉里。致勞盼望。甘唯唯。叩別南下。叩道出廣陵。有巨賈某。惟喜拳術。素耳甘名。常以無緣識荆。爲恨。特遣人於數十里外。迎之。甘旣至。待以上賓。敬禮逾恆。卽墨馬玉麟者。亦勇士也。長身大腹。體格魁偉。雖良馬。乘行二十里。必易騎。及以帛約身。則頓小。緣牆升木。穿山越嶺。捷如飛。揉久客。賈家賈以師禮待之。及甘至。後來居上。心已不悅。而賈之敬甘。復優於己。不平。彌甚。請與之角。轉鬥終日。不分勝負。甘退而思曰。此勁敵。非張大義比也。沉

思久之曰得之矣。然彼亦人傑，不忍衆辱之。當令會意自行罷門，以免結怨。翌日復與之角，數蹈其隙，以爲玉麟必知己意。就此罷門矣。詎意玉麟以甘屢蹈其瑕，謂甘有意侮之，忿怒愈甚。拳如驟風，急雨略無退讓之意。甘以其無禮過甚，亦覺動怒。因乘其直前擒拿之際，駢兩指切之。玉麟大痛仆地，衆皆放聲大笑。玉麟懷慙而遁。明日携取行李不辭而去。玉麟旣去，甘乃語賈曰：吾力不異常人，所以能勝人者，善借其力以制之耳。如馬、玉麟者，技亦與吾相等。吾所能者，彼皆能之。故不可驟勝。惟彼用功深而未熟，故吾得乘瑕而敗之也。賈聞其言，欽佩臻至，留甘於家，傳授其術，習藝之暇，常詢甘曰：君遨遊天下，亦遇敵手乎？甘曰：吾壯年時亦如馬、玉麟，工雖深而未熟。曾遇勝吾者兩人，皆幾瀕於危，得延喘至今者，實徼倖耳。賈請述其事。甘曰：吾幼年卽喜拳術。家中資聞有一藝之長者，不惜傾家交之。自十餘歲至二十四五歲，凡更十餘師。師技罄復願而至。他聞有善技擊者，雖千里之外，不憚勤勞往從之。遊傳其技，卽棄之以是之故。家產盡覆窮困，殊甚。一日道出山東囊空，虛無一宿資。因思窮途落拓，將填溝壑，惟爲盜乃可以救燃眉。遂躊躇四顧，擬覓富室攫取其資暫濟。一時不意所行之地，萬山叢集，荒寥異常。卽有一二村落，亦皆窮困不堪者。雖肆劫掠亦無所得。仰視天際，暮靄四起，心中焦灼無計。可施正值進退維谷之時，忽見一老村農，肩青蚨一擔，後隨一少年徐徐而來。吾驟覩之，不禁欣躍無已。曰：此二人者，必鄉中富家收租而回，故有如許青蚨。適遇於此，直不啻以川資贈吾也。繼思剪徑劫財，非吾所爲。祇以受困窮途迫而出，此切不可傷人性命。彼老村農固不待言，卽少年亦文弱書生，吾一舉手安能禁受。當設計取之，勿使過受驚恐也。遂隱身樹後，蹲而待。

之老村農徐步而來方近樹側吾亟伸一足略略絆之老村農已傾擔於側倒地。上吾躍出樹前逕取青
蚨少年見吾出微笑曰而翁終日爲此不意尙有小輩謹步後塵捉弄而翁也言未必趨步而前伸臂一挾
吾已在其脅下徧體酸麻如被桎梏略一用力筋骨欲折吾惟閉目待斃不敢動彈蓋少年一臂之力重逾
萬鈞若一倔強彼必緊挾則此命休矣惟聽其所爲庶不致傷及筋骨迨至其家告以苦衷軟語哀之或憐
而赦吾未可知也少年一手挾吾一手扶老村農起仍擔而行繞山穿徑曲折彎環行抵小村蜿蜒小河水
而見底沿岸雜植桃李柳梅之類對岸一巨宅門戶洞啓氣象巍峨爲少年居室板橋一道橫貫水面老村
農肩擔沿橋而行少年則置吾於樹下略不審視一躍過河逕入巨宅而去吾於斯時四肢發麻眼目昏花
舉手則手腕如折舉足則足脛欲裂委頓於地不能起立幸少年未嘗用力筋骨不甚受傷運用煉氣之工
歷時良久始能起坐然欲思起立行步則兩腿軟若無骨如擺風楊柳晃盪不已竟難自主不得已倚樹而
坐仰視天空則紅日西墮明月東升天色已暮此時愧恨欲死恨不得投河自盡以瀦此恥坐地有頃忽聞
對岸有人語聲睇視之卽少年也徐步過橋行至樹側見吾斜欹而坐大驚言曰若殆江寧甘鳳池乎吾聞
其直呼吾名羞慙滿面不得已應之曰然正甘某也與君素未謀面何以能知賤名少年笑曰凡經吾臂一
挾者無不骨折筋斷立時斃命素聞江甯甘鳳池得易筋經真傳且善運氣之工煉成銅筋鐵骨或能禁受
耳今見若未嘗受傷故疑耳不料果爲甘君也然君雖不致斃命四肢未能遽爾復原吾當爲君治之語竟
趨步而前提吾手而蹴吾足周身血脈頓時流通已蠟然而起矣急拜於地曰今後餘生皆出君賜從此後

不復敢言拳術矣。少年含笑不語。肅吾至家。暫行休憩。乃偕之登堂。叩其姓名。少年嘆曰。吾鄭成功部下也。立志恢復明室。故助鄭王。佔據台灣。徐策進行。詎意鄭王殞命。克塽年幼。無知輿觀。出降。吾乃遁而至。此隱姓埋名。不預世事。君可毋庸詳詢。世外人。不願以姓名示人也。語竟。愀然不樂。熱淚盈盈。已濕襟袖矣。吾見其狀。不敢多言。默坐片刻。少年留吾宿於其室。翌晨。少年欲行。亦不款留。臨別之時。贈白銀五千兩。曰。知君囊內空虛。以此賂佐行色。沿途尙宜保重。切勿輕易角技。君之內工。雖足。外工尙欠一乘。從此能竿頭日進。可以造於極峯矣。吾於此時。感激無地。惟有唯唯應諾而已。此爲第一次所遇敵手。第二次則尤爲危險。斯時言之。又覺慄慄。恐懼無地。蓋吾性喜浪游。自弱冠之年。卽徧歷數省。一日由閩至浙。行抵一處。四面皆山。奇石詭嶂。突兀高低。狀如怪獸。沿山而行。峯迴路轉。已至隘處。兩面悉係削壁危崖。中現小徑一線。僅容一人行走。如有兩人同時來往。必使一人退出隘口。始能出得。此徑吾方行至中途。忽一小沙彌自前。面而來。劈面相撞。難以前進。吾亟令其讓道。小沙彌堅不肯允。彼此矗立途中。互相爭先。各不相讓。遷延良久。小沙彌曰。如此爭執。未知延至何時。以吾之見。彼此各蹴三脚。願仆者讓道。可乎。吾以小沙彌年未及冠。面黃肌瘦。骨立如柴。略一舉足。卽可顛仆。遽應之曰。此言亦是。惟須任吾先蹴三脚。小沙彌曰。吾出家人。理宜略佔優先。吾曰。爾年紀小。吾兩倍。自應讓吾先蹴。沙彌笑曰。處處皆欲爭先。未知本領若何。此時讓爾略佔便宜。三脚之後。始識吾輩出家人。非可欺者。言畢。運氣直立。讓吾先蹴。吾視其狀。乃知沙彌必爲勁敵。不敢怠玩。運足氣力。飛一腿去。以爲小小沙彌。定然顛仆。詎意彼仍挺然。突立穩重如山。未嘗移動絲毫。吾自

思一腿之力。足有千鈞。沙彌受之。若無其事。彼之勇力。高吾十倍。第二腿。苟不見效。亟宜見機。而作從速遁。逃。否則必爲所困矣。於是用足。生平之力。一腿復起。依然未動分毫。吾知今日決無幸事。三十六策。當以走爲上策矣。遂謂之曰。出家人果具勇力。竟能受吾兩腿。第三腿定然使爾顛仆矣。惟吾小便甚急。爾且略俟片刻。言時。故爲牽衣欲溺之狀。沙彌因吾對之便溺。退後十餘步。回轉其首。不欲顧視。吾乘其退步。回首之際。奔出隘口。直向來時之路。盡力飛遁。至一廟前。略定喘息。不禁自恨曰。吾平時一腿之力。雖無千斤。亦有八百。今日遇一小小沙彌。何以不能令其顛仆。豈兩腿之力。不及昔日乎。吾當一試。以驗力量。適見廟門前。松樹一株。高欲干霄。粗可合抱。舉腿蹴之。未及用力。已如天崩地裂。一聲響。連根而起。橫倒地上。聲爲廟中所聞。其門忽啓。一老僧扶杖而出。顧謂吾曰。何處莽男兒。用此大力。蹴倒松樹。豈發癩耶。吾聞其言。亟道歉曰。一時性起。不能自遏。有驚上人望。乞見宥。老僧笑曰。君能蹴倒此樹。力量實非常人可及。未知何事如此。發怒請爲老僧言之。可乎。吾乃告以途遇沙彌爭道之由。老僧不待言畢。已大驚曰。子休矣。沙彌乃吾門徒也。受子兩腿。雖未顛仆。恐臟腑之中。已受損傷。三日之內。必殞命矣。吾知老僧爲沙彌之師。大驚失色。長跼請曰。誤傷令徒。實出無心。尚望老師勿以爲仇。曲賜矜全。則終身感激。永無窮期矣。老僧長嗟言曰。吾徒雖爲爾傷。然出家人不守本分。妄動無明。亦屬咎由自取。老僧觀爾亦具英雄故。不相仇。惟小徒不久卽歸。見爾在此。決不干休。可從速離此。萬勿遲延。吾聞其言。如得赦令。立即道謝而行。自兩次遇險之後。始知吾之武藝不足自豪。江湖中能人固甚多也。乃回至家中。謝絕人事。閉戶潛修。徧訪名師。精心練習。三載之後。

技業大進復出而浪游四海遂無敵手矣賈聞其言五衷欽佩留甘於家拜之爲師丐授其技甘見其誠心向學亦不固却安居揚州不復浪跡江湖矣有識甘者謂其心性和易恂恂退讓雖婦孺皆與狎不知爲賁育也年八十餘精神豐鑠如壯年云

戈照隣

戴鈞衡

戈照隣者不知何許人也白驢皂帽踵壽州李翁門告闈者曰爲我報主人弋照隣來見也李翁者故好客重武四方勇士來無不見者闈者以告翁遂出與語多駭人叩其技不答翁知其異人也延入爲卜客夜則獨臥一室帳中置小筒光彩照人翁之從者欲乘其睡竊視之每入室則照隣叱呼何人屢試皆然遂不敢復入照隣善飲翁叩其量照隣曰無酒不思有酒不知醉也翁他日約善飲者數人陪照隣飲以次酬酢自辰薄酉數人者皆醉而照隣如故乃取壺獨酌漸至酒酣謂翁曰僕閱人多矣未有如翁之好客者翁平生所接客有能飛者乎翁曰未也能隻手當百人者乎翁曰未也照隣曰僕無他長能斯二者而已言畢入翁後園正立而躍去地尺許徐徐騰上瞥然失所在久之自空來下立於牆牆下列巨甕貯水蓄魚照隣下立水中越十數甕乃下履不濡也翁贊歎良久謂照隣曰君言隻手當百人能爲我小試乎照隣曰諾次日翁選勇士五十人各持所善械擁立堂上啓中扉令照隣出諸勇士大呼擊照隣照隣以兩手左右揮之十皆倒械自擊張目大叱持械者十八九失手墮地有踣不能起者照隣遂入卽辭翁之何某家何某者亦壽州之好客者也照隣居之相得一夕飲酒淚潄潄下某詢其故不言固詰之照隣曰僕有友昔年謀逆僕固阻

不能將起事以書招僕。僕走避至此。今夕被擒就戮矣。僕是以悲也。是夜照隣跨白驢遁去。姚丈額門幼隨其尊甫館李翁家親見照隣爲余言其事如此。

三奇人

許指嚴

說部恆喜言怪力亂神。狐鬼之事無論矣。至異人神勇莫不拏龍搏虎。鑿空荒唐如劍俠家之伐蛟斬鼉。魔術家之移山倒海。神話家之追風逐電。大力家之拔角撼柱。當其口角津津。韻流鋒發。大足動人。聽聞婦孺尤喜引爲談助。究之是否信史。雖老於世故者不敢遽必。何則。謂爲必有彼齊東野語。海角譚言。傳之不一其人。考之無可根據。安知其非欺人炫俗。故作此河漢驚怖之言。謂爲必無而奇材殊能。離羣絕類。往往珊瑚骨猿臂。生有異稟。趨捷飛行。出人意外。又安知不爲山澤龍蛇。確有此靈秀鐘毓之妙。然則六合之大。何所不有。迂儒執一理以論是非。烏足以窮事變哉。予嘗與友論及此。友言稗史所載劍仙飛天夜叉鐵扇道人大力童子等。吾不敢信。然吾所最信之人。與最可據之著述。竟有二事類此者。吾師汪逸雲先生篤行君子。生平不妄言。乃稱述一勇士伏怪事。鑿鑿可信。而前輩許青士先生亦有筆記二則。絕不類無稽者。其事殊有可觀。固彙記之一曰沂水竇景燕。二曰臨淄李蕙之客。三曰武進沈伯和。

竇景燕者。咸豐朝舉人。官滄州牧。初未之奇也。滄州故多盜。大吏方顧慮計無所出。是時竇以郡丞班資發畿輔。聽鼓轅下有名幕某先生者。爲帥府上賓。與之稔。因言竇某奇人也。必能治盜。盍試之。大吏以其詣省甫匝月。難之。然重違某先生意。疑其爲鄉親說客也。姑徇之。毋拂其意。蓋某先生亦山左沂水人。與竇同

籍故及竇蒞滄州。劇盜方盤踞海濱爲巢穴。劫行旅如探囊取物。捆載入寨。雖名捕無敢探負。岫之虎以被掠。鳴官者案積如山。有中丞某公罷官歸里。過滄。輜重行篋累累。盜盡劫之。并擄其妻女。中丞倉皇走牧署。坐待捕盜。竇集老捕問下手法。諸捕有懼色。竇奮臂起曰。一盜之患。至是乎。請幕客某款中丞。而自結束出署門去。約炊許。竇已蹀躞庭中。中丞午殮未畢。尙與幕客絮絮語。被劫也。見竇以爲遺忘他物。或來有所問也。竇遽前曰。盜已縛得。置獄中矣。中丞有疑色。竇令胥役牽之階下。則狀貌猙獰。銀鐺桎梏。駢足而立者三人焉。中丞試詰之。盜自言橫行十餘年。未嘗遇敵。今值強人命也。便宜汝貪官亦命也。可惜此身手。乃爲汝貪官走狗。竇牧叱之。三盜既退。尋獻所獲之贓物及妻女。中丞欣然而去。竇由此知名。境內無留盜。願竇終不語人以捕盜情狀。且平時恂恂若老儒人。卒莫悉其能力所在。一夕大吏邀宴於密室。縱談捕盜事。竇已被酒。始略述數則。先是竇別中丞出署。思盜既犯巨案。必於寨中設備。爲抵抗具。且諸捕曾言屢至寨中。不得見盜魁。而反爲其下所傷。此必別有巢穴。且遠在海中島上無疑。於是疾趨海濱。欲襲盜巢。之後。願漫無鄉導。究不知盜巢之果在何處。姑妄試之。恃己之一往無前而已。炊餘卽至灣崎。灣崎者海岸地也。距滄州城已百數十里。遙望海中有島。離岸又約十餘里。有小漁舟時往來浮沈其間。亟呼一舟至。許以重賞。張半葉蒲帆。順風徑渡。時方晴明。海波如鏡。舟人謂予曰。將軍今日得利乎。小人來日登岸當賞一杯酒。爲將軍頌後福也。予漫應之。蓋予方服窄袖短衣。作健兒裝束。故舟人以予爲盜夥耳。及抵岸。予持銀語舟人曰。吾自遠方來訪此島之主。實不能識其路。子能爲鄉導者。吾當給重犒。且爲之延譽於主人。舟人大喜。夷然曰。

是吾職也。遂捨篙而杖。然此時予甚苦。以舟人行極遠。如小兒學步。余實不耐。因略問門戶所在。舟人乃言此地實在寨後。須過前峯。方得正門甬道。予僞爲不解也者。若謂此途甚遠。由後而入何如。舟人言後岡恐無紀綱迎賓。且吾爲鄉導而引客由後入。毋乃有慢客之咎乎。予曰不然。此我之私願。於子何與。既若是。子請返登舟。吾已知塗徑。而感謝與延譽必如故。請子勿疑。舟人猶不肯。予乃更以貲遣之。舟人始稱謝去。去猶顧予。予不欲頓露異狀。稍緩須臾。覺舟人已遠。乃縱步入林。迅如飛鳥。倏睹垣墻。知巢穴已近。乃聳身登樹杪。窺之。見庭宇幽深。堂基寬敞。轉從枝柯輪度。已逼後院。髣髴有粉白黛綠者居其中。遂捨之。度前殿。喬木千章。松檜雜立。予仍鳥處其巔。向下微窺。則見堂中方宴會。列坐三五。金帛衣服器皿陳其前。璀璨照目。蓋卽中丞物也。上座三人。皆狀貌猙獰。衣飾怪偉。持酒狂飲相祝。若慶獲利之多者。頤指氣使。一呼百諾。如臣下之奉君主然。予確知此三人者卽係渠魁。顧雖恃勇以隻身入虎穴。擒三兇奴。談何容易。思之氣少。紱俄而自奮曰。事已至此。苟退縮立齋粉矣。惟有竭吾力以赴機會。大功可成也。一躍而下。先奔中座。三人皆出意外。大有措手不及之勢。側座更瞠目不知所爲。吾遂擒中座者。力折其臂。中座者不服。欲起相抗。顧已爲吾制。不能轉側。臂斷。旁坐二人俱起拘予。予手各持一人。二人臂亦折。遂出綆縛之。如執羊豕。餘黨悉願降。予一一慰遣之。令守此勿動。予乃令健兒二人爲予舁此三人行。健兒有難色。予舉手將折其臂。健兒知不能敵。遂從之。顧健兒行亦遲遲。不能從予。予乃遣去健兒。自掖二人於肘下。而提挈一人於手。徑走岸旁。呼漁舟載予。舟人有戰慄狀。余又許以重金。肘下人呼老漁。不可載彼。力爭欲求脫。予亦力制之。遂登舟。促

舟進行。舟人不敢違。迅達彼岸。予乃語舟人。隨我行。舟人不敢。予語以處。舟人益驚而遁。予乃置一人於地。手囊中金。遙擲之。遂趨歸。則前後僅二時許耳。後乃知此三人者。亦勁敵。出其不意而擒之。予亦不自知其何以能是也。厥後又有一盜。夜踰垣入人家。劫處女而出。衆皆知盜所某處。而不敢問津。畏其悍也。予乃僞爲鄉人。市菜蔬者。抵其處。則小山盤厓。大石礪礪。幾迷途。徑曲折久之。始得一所。欄樓高聳。若苗人所居。前有廣場。有數人盤馬其上。遙見余。揮鞭令左行。予知使予就庖廚也。予乃曲折入後院。聞女子哭聲。弛擔聽之。一小厮遙語曰。菜蔬來乎。老章胡不來。予隨機應曰。老章有病。令予爲代。小厮曰。亦佳。有某菜若干。舐否。予應之曰。有。方周張間。雜以諧謔。予問女子何哭。爲小厮曰。亦憨態耳。焉有十八九嬌娘。而不喜愛。魔者。予曰。主公安在小厮曰。此時當在院中。厮纏他嬌娘。解悶耳。予作憨笑。若不解者。旣而小厮入。予乃負擔以行。旋折入後院。四顧無人。遂棄擔。躍登後屋。穴窗窺之。則諸女娃。方調絲竹。勻鉛華。忙碌殊甚。一男子虬髯。廣額。斜倚榻上。兩女子捶其足。態甚閒暇。予恐其有力。意自後掩之。轉從屋角破窗入。適當屏後。人不覺也。須臾。男子忽若假寐狀。予突前捉其肘。衆女子驚散。男子猶以爲婦女捉搦。爲戲。閉目作暈聲。予乘其隙奮起掖之。男子始覺有異。睜目叱之。余不爲動。乃用力解脫。幾爲所窘。幸予已占先發。制人之勢。彼終無奈何。予仍自後院疾趨下山。部黨無一人知覺者。及聚衆追劫。余已入城矣。此一事也。又嘗過某鄉。勘災。宿逆旅。逆旅主人談一客慘被劫掠。今尙淪落於此。余略詢狀。知客經商過此。頗挾貲。途中遇一健兒相隨。願爲保護。客疑其有他。謝之。健兒旣去。盜猝至。髣髴見健兒指揮。罄行囊所有去。余乃呼客至。詳問健兒狀貌及所向。

往。乃逕向客所語處行。顧離逆旅且三百里。蓋已輾轉歷數縣至此。約炊許。余至其處。荒山四曠。殊無下手地。姑就客所語覓之。一村店橫道左。入沽酒飲焉。閒語店主。人此間有壯士某否。吾兄弟行也。主人瞿然曰。吾導子往可乎。余曰。可不數十武。已至其處。門庭頗巍煥。登其堂。則賊物纍纍積焉。少頃。主人出。狀極魁梧。而衣飾怪誕甚。余漫揖之。各不相識。余僞稱海上來。慕名造訪。健兒上下視。若有所疑。余恐其生變。鶴起擒之。健兒力殊猛。怒吼一聲。如免斯脫。一躍升屋。余亦從之。將追及。忽一鐵鏢自余耳邊過。幾爲所中。余不顧。仍力前擒之。相扭相撲。幾仆者屢。余足捷如猿。曳之而走。倏已大道。從者躡集。始縛之。然余甚困。脛幾折。勢不能登騎。蓋余曳健兒時。力不能制其肘。彼乃以肱扶余脛。腹痛不可忍。幸余疾走。如不履地。故扶多不中。然受苦已甚。自此病月餘。始獲痊。不能隻身入盜巢矣。且步履之速率亦銳減。竇語至此。大吏曰。他無足異。捷足如君。誠世間所罕有也。豈生而有異稟耶。竇未及答。時某先生在座曰。此事吾確知之。初以駭人聽聞。故未詳道。今不妨一述矣。竇頷之。乃言少時與諸兒競步。無一人能及者。當興至時。恍若御風而行。足不履地。比長。就師讀。偶講地理。盛稱黃河風景。心竊慕之。不敢告父兄師長。晨餐而往。自沂水至廣武。不下四五百里。崇朝卽至。徧歷花園口。諸勝景。探囊得餘錢。購河鯉一尾。以歸。日甫夕。耳詭言在塾讀書。父母信之。既而問之師。所言不相符。疑其從里中兒爲牧豬奴戲。欲加朴責。始自貢游黃河狀。師不之信。固歷言黃河岸邊風景。非親歷者不能道。且以家中蓄鯉爲證。師告父母。檢屋後小缸中。果有鯉。游泳金色。鱗燦然。照耀非土物所有也。始大奇之。既而應童子試。當至濟南省垣。相距約四百里。諸同學春糧宿戒。具舟束裝。忙碌殊甚。

已獨襖被持雨具朝食而行未夕已至試罷假席友人處僅一夕越日返矣率以爲常同學相戲呼爲竇神行一日與同儕談京師壯麗爲全國所無心大動卽日持襖被行翌日徧游內外城凡名勝處無不徧祥出囊錢購玩具越日卽歸語同儕以游覽狀俱不信以爲聞諸人者乃探囊示以玩具確爲京中所製而數百里內無是物也自是捷足之名大著而勇力亦漸進大吏與某先生俱歎曰大地生才何所不有苟非親見親聞幾何不目爲齊東野語乃知迂儒執一論人固無一而可也後竇竟終於州牧任

臨溜李蕙者爲山西某縣令夙疏財好客踵門求見者多當世奇俠士蕙皆解衣推食款接如恐不及會有白關東來者其人軀幹偉昂氣宇軒爽持雙鐵椎摺疊置肘下其器以鐵柄長尺許上繫鐵鍊亦尺許末有鐵丸大如茶杯欻然軒舉輪轉如飛令人四面以石亂擊則狂濺猛射如激浪飛花四擊人面如流彈公孫大娘之舞劍器不是過也又能以空拳距五寸許搏磚石片片碎目能夜視微物黑暗中以刀斫之皆宛轉引避曾與人決鬪約暗中持刀亂斫良久未能略中也日中注視日光瞪目不瞬絕不病暈眩其奇技如此邑有劇盜以矯捷爲幽并健兒領袖彼所劫處人莫敢過問李令欲捕之商於客客適以要事他往未果會邑中富人又告劇盜飛度重垣挾愛女去一家哀泣不欲生求令設法緝捕諸役皆束手追比俱窮乃謁請客一行客慨然允諾旣往盜方治具饗其徒酣飲呼嘯有女子哀泣其旁知必是盜也顧左右皆刀戟森列狀至威猛自顧隻身恐難爲敵乃作鬼聲醜然誘令外出於黑暗中擒之頃之盜魁果趨出其黨雖起立不盡從於外客遂猛起抱之盜驚呼黨徒四起客舉鐵椎輪舞旋轉陡擊殺數人人以刀劍鐵彈丸向暗中

射刺俱不能中盜遂潰遁。客令從者縛所擒盜取所劫女子歸還之富人而置盜於法。曾言來時往南中某帥府頗得信任。帥長白人也。旋以重金付客令載與俱東。雇舟北上。不知其爲盜也。行數日抵一絕港。外江內湖蘆葦如織。知非佳處。飭舟人別覓停泊所。舟人言此間無鎮市。非半日行不可。暗行之危險更甚於此。遂不肯移。固言之。卒不聽。知有變。顧自恃有技力亦不畏也。無何夜將半。忽有人呼賊至。客與僕俱驚起。略事結束甫出艙。艙上突有人以巨斧劈其首。客已有備舉鐵椎四面舞。巨斧鏗然飛去。即有人以鎗直刺客胸。復爲鐵椎所格。僕亦相繼跳去。挾金於懷將赴別舟。不意旁舟皆賊黨也。咸登舟相助。懷中金幾爲所攫。客揮擊益猛。宛轉護僕擊殺數十人。盜衆皆落水。喘息方定。忽見舟旋轉如磨。艙底聞水聲汨汨然。客驚起曰。此賊在水中挖孔。船底已破矣。速去。乃急取掉一與僕。令抱此浮水達岸。自拾一板乘之。漂流至岸。將插足碇下。忽覺水中又有人持已足。時僕已登岸。揮手令速呼救。而自舉鐵椎向水中擊之。旋擊旋來。至再三始得出。幸僕之懷中金亦未失也。此僕遂從予數年。近日始病死耳。聞者莫不驚歎。旋晉省中丞。知其名。特保爲提塘。李公亦力薦之。一日奉差委往他縣。行經太行山深處。時方夏秋之交。日中酷暑。逮晚忽陰雲密布。雷電交作。暮色下矣。主僕倉皇欲覓投宿處。急切無有。久之昏黑中髣髴有古寺居道左。正殿五楹。磚石塞戶。僅留小孔如狗竇。中空而洞然。暗黑不知爲神像與何物也。回視兩廡廓然無門。塵積四五寸。命僕略事掃除。羅列弓刀以備不虞。襪被稍息。而雷霆震厲不能成寐。電光燦然來。則毛髮可辨。各視面貌作鬼怪猙獰狀。巨雷震撼。破壁傾垣。俄而電火忽久耀。通明如晝。四火炬飛來。蜿蜒繞殿外。石柱宛然龍也。頃之火

龍由孔入殿。卽聞霹靂轟然。窗瓦俱震。久之。有一龍出。往西南方飛去。良久。引一龍至。視前四龍較小。相將入內。霹靂驟起。有如山崩。遂寂無聲。客謂僕曰。此妖龍也。能爲人害。吾少受師傅。有百鍊金剛火器。擊之。可擊魔怪。今將一試之。僕色顛膽裂。曰。彼不復來擾。亦幸矣。尙敢攫之乎。客不應。持器欲出。僕涕泣諫阻。且曰。吾主公奉命在身。而遇險於野。其誰知之。此間數十萬生靈所繫。幸慎重也。蓋俗傳有龍怒必陷地成湖之說。故僕以爲請。客亦愴然而止。久之。客自覺心事未了。輾轉不能成夢。少頓聞僕已有訐聲。乃自攜火器至孔下。竭力掣之。霹靂陡起。響甚於前。客耳膜爲破。暈絕而仆。僕驚起。覓主人。欲出廡下。則五龍盤旋空際。碎作千萬火花。隨風飄落。宛如火戲。狀須臾。天地昏暗。尺寸不辨。腥穢焦爛之臭味。不可響邇。僕亦暈然。暈然久之。天已黎明。僕至殿下。諦視。則主人臥階下。腥涎濁溼。面目薰黑。氣咻咻如僅屬。僕乃捨薪燃火。淪湯飲之。旋蘇。扶至近村。告以夜來所遇。老幼擁擠而至。皆云素有妖。能食人畜。挾磚石入視。則血肉狼籍。徧灑壁上。蓋爲龍爪所裂也。其中朽骨撐拄。猶惡如地獄。不知食幾許人畜矣。時客已能言。因問村人何不驅之。而磚石壘之。以成其巢穴。村人以禍福爲言。客云。余昨已斃。爲言其狀。村中猶不信。客言。吾某提塘也。如有爲害於鄉里。可鳴官。吾仍當來治之。衆人始欣然。各負薪炭至廟。燬其殿。自是客面稍黚。人皆呼爲黑飛王。沈伯和者。名應奎。武進人也。少有絕力。略識文字。慕古豪傑之爲。人能重然諾。急人之難。巍然自負。鄉里俠少年。皆附之。丹陽鄒芳者。久任俠。名重江湖間。於諸少年爲老輩。曾以布衣走京師。爲臺灣道姚瑩等訟。冤折辱。穆相及中貴人。以此名震輦轂。疾之者。至竄名捻匪中。指爲亂黨。卒以此爲某相捕逮。援他事置之。法。

當其在里時。遇伯和於某園場。見其臂力冠同儕。驚嘆以爲已不如。因延伯和於家。俾與女角力。女曰。大娘亦擅奇勇。善彈丸術。能暗中擊人於百步外。命中不爽。累黍。是日置女於樓上。使擊伯和於樓下。三擊不中。女不敢與伯和角。奮力矣。芳乃贅伯和於家。衣食悉以資之。芳無子。故婦視大娘而子視伯和也。伯和七上公車。不獲材官。頗忿鬱。顧所至輒有奇迹。王公貴人樂與之交。求保衛。富商大賈爭致爲鏢客。一日。獨行費縣山中。欲游管仲廟。訪求不可得。乃雇輿往。與人問姓名。知其爲伯和也。乃知將昇之入古廟中。旋皆亡去。伯和仰瞻廟額。知非是。急欲出詢。則少年數輩闕起。扛巨木。搯於其門。伯和睨而笑曰。是淺淺者。須數輩耶。搯袖而前。平舉之。臥之於池。少年頗駭。怵中人猶崛強。指前石鼎相示曰。能舉。是則吾輩服矣。伯和兩手提之。若挈壺。頤行數十步。復置故處。神色不少變。少年輩大駭。舌吐不能收。徐徐引散。伯和笑謂之曰。吾不屑若君輩。但君輩以後亦慎勿輕視人。諸少年不敢應諾。既去。伯和故繞廟之廊廡。觀偶像。摩挲碑刻。良久。日。至下春。始徐步歸。抵逆旅。逆旅主人驚曰。客豈有兩翅。乃從虎穴中飛出耶。蓋館人多同謀者。知情欲窘辱伯和。故也。後走河間。飯於邸舍。忽有風驟。猛如虎搏人而食之。衆皆圍觀。如堵牆。不敢稍撓其鋒。伯和勃然怒曰。奈何。縱獸食人。吾七尺軀。畏一驟。吾不得爲男子矣。持鐵簡信步而前。驟舍人而撲伯和。三撲三避之。突起擊其目。鐵簡陷入尺許。驟仆不能起。盡力擊之。斃。縱所食人使去。後下第。還其人尙生存。迎拜道左。諦視之。則左方面目。鑄其半如混沌焉。邵芳旣以忤穆相致害。伯和深疾之。時清文宗方在藩邸。穆不悅文宗。與某妃及中官比而謀。傾陷焉。有額駙某公。文宗心腹也。求奇士制穆相。得伯和。額駙公以兄禮之。每燕談。

之頃言國事危疑以擁護文宗爲請。伯和奮臂起曰：吾不能爲商山老人，獨不能爲安金藏乎？自是中貴人凡屬文宗黨者，皆延譽及伯和。累擢至某軍都統，掌宿衛，頗有權。會宣宗不豫，東南方有兵事，召軍機諸王公大臣入計事，至宮門而返，不知中情若何。中外洶懼，額駙公奉文宗俱入宮，謂伯和曰：事不可知，且奈何？伯和毅然曰：既承知遇，當竭股肱之力以衛殿下萬一有變，惟以不肖軀殉公，不知其他。文宗乃令額駙公要伯和入衛，令大司馬列兵圍諸王府，策大金吾領緹騎巡徼王城戎政，分部京營兵屯九門。凡諸王貝子貝勒等府人不得闌出。於是宮禁寂然。伯和與文宗同臥起，示不獨生。及宣宗不藥乃出，既而文宗立方將引入揆席，而英法聯軍寇白河，伯和與僧土力之戰，兵敗。文宗車駕奔熱河，恭親王以伯和主戰爲罪，倡言於朝，謂非去伯和無以謝外人。及圓明園再燬，訂和約於禮部堂，伯和卒罷免。議者猶追論不已。文宗不得已，放伯和歸田里。伯和雖武進人，而性喜居北方，遂稅居漳水之濱，旁河一小村落，挈妻子耕讀以娛暮年。有友人過其廬，見其坐斗室中，木榻布被，沾濁醪如餲飯，麤糲喉而伯和飲噉自如。牀頭樹銅簡二，高可等身，夜分輒自起舞，謂人曰：吾恨不能持此先擊朝中老魅，然後與夷會決一死戰，碎身粉骨亦所不辭。何物夷人竟能占此勝着？家賊之肉其足食乎？且語且舞，劍有風，然晶光閃爍，上下寒燈吐芒，四壁颯立。時伯和年且七十餘矣，既而慨然太息，泣下，自言三十年前無日不思立功異域，爲張博望班定遠一流人，奈浮沉宦海，溺情恩厚，忽忽壯志灰矣。因憶一事，昔以登第後南歸，宿交河之富莊驛，見道旁父老子弟聚語，太息伯和問之，衆咸相告曰：縣有義士，曰盧千斤，路遇不平無不援救。昨於某街見弱女爲匪人所困，弱女

涕泣忍辱不敢與較。匪人公然當衆言其父貸予錢不還予。雖辱以婢妾宜也。况里巷間女子。遂不願予。一顧盼者。予見此女肌膚稍白。皙欲挈之偕歸。而彼假惺惺不肯隨。予行然則予怒。一發。摔髮。褫衣。欲如何。則如何耳。衆莫敢與之辨。難唯唯而已。弱女憔悴如故。義士適過其前。問情。匪人本惡。義士厲聲曰。何與汝事。義士躍起曰。青天白日。遂無公理耶。汝釋此女。否。匪人若不聞也者。義士奮臂。摔其胸襟。曰。尙敢爾。匪人大。詈而起。抗拒不相下。義士大怒。頓之地。扑踢交加。匪人力不支。旋斃於拳足下。然在義士亦一時公憤。未嘗有意殺彼也。今已繫獄。論死無可挽救。是以歎惋耳。伯和聞言。知其能得衆心。必平日仗義者。不覺有兔死狐悲之念。急攜衣冠往見縣令。曰。某以給假省墓。道出於此。聞壯士盧孔禮因鋤強。扶弱。積不能平。遂致渠誤殺人。然實天理人情之正。人人心中所欲出者耳。非故也。法本可減等。况今內亂未靜。外患迭起。海夷之氛。侵入中原。烽火時驚。輪蹄四接。盜賊白晝劫行。旅此用人之秋也。苟有奇才。方當許以十世之宥。奈何繩尺寸法。失之交臂。且刑人當與衆棄古之良法。公何不詢於合衆。以誤殺貸其罪。俾冒死自贖。即日部署少年守閭里。一旦有事。大可助縣官半臂。徒殺壯士。或久填牢獄。甚無謂也。縣令知伯和新貴。且其言直。乃肅然拱手曰。謹受教。明日設座於市會。朝縣中耆老士紳而詢之。曰。若等能保盧孔禮殺人非故乎。其人果足爲鄉里謀公益乎。則維然應曰。孔禮誠非故殺。願以百口保之。且孔禮有勇與好義人也。今日然則吾欲貸其罪爲父老子弟保捍鄉井。何如。皆崩角稽首曰。幸甚。令大悅。孔禮遂得釋。乃盛服詣縣門。搏頰稱謝。令謂之曰。非我貸若也。吳中沈進士過此。教我貸若也。孔禮志之。出訪伯和。知亦豪傑。士傾心願締交。伯和急遽。

南歸孔禮留之不獲乃剪紙書沈伯和姓名爲位旦夕尸祝之越數年伯和再經其地孔禮率子弟維拜道左要歸其家令家人烹伏雌醢宿酒妻女皆出拜治餈餅上食傍近諸少年聞伯和至皆爭集聚入庭率叉手扣頭代孔禮稱謝伯和亦喜劇談乃爲長筵列坐飲噉有如波捲電嚼笑語欲沸後酣伯和持鐵簡起舞舞畢談說古今壯勇義烈事激昂蠶涌鬚眉翁張羣少年則髮植如竿誓爲沈公死沈因稱說時事及若何有所樹立衆益憤激孔禮再拜把酒起言曰孔禮與諸兄弟皆以身許公矣公有志當世一旦有事飛檄召孔禮孔禮卽率五百人裹糧服矢以待命惟公之所使而亦惟公之所死及鴉片事起朝臣中頗亦有主戰者林文忠在粵方大創英兵部郎某君豪俠士也與伯和頗相契諷伯和以勤王敵愾伯和拔劍起舞且具言孔禮始末慨然曰孔禮必不負我當折簡爲君招之設有緩急以孔禮所部當前行可也某君氣爲之振忽浙海受創中朝主張遽變穆相又誘煽其間於是主戰者皆廢孔禮至京師五百人無所部署與中貴人黨徒相忤幾兆禍變伯和知不相容乃勸孔禮歸於是車麟駟鐵之勇士忽成攜手河梁之旅人矣孔禮既與伯和別十餘年不相聞及海疆事再起時太平軍方熾伯和頗有髀肉之感當白河之役伯和力主攻守乃作書招孔禮及北京陷圓明園被燬孔禮杳然無消息伯和疑其久而背約矣貶謫之命既下伯和將襁被出都忽一男子款門求見泥首自陳曰盧孔禮之弟孔信也問孔禮胡不來則泣然曰孔禮病風臥褥不能起者年餘矣聞海疆有變一日三躍起則大劇得公書乃流涕漬面伏枕頓首稱死罪者三故遣某來謁謝犬馬之齒旣衰不復能馳驅之事有負明公愧悚無地其臨行時孔禮垂死不知今復何如伯和亦爲

之○悲○不○自○勝○蓋○以○當○時○中○朝○反○覆○事○勢○不○可○言○狀○卽○孔○禮○能○來○未○必○克○遂○所○願○况○孔○禮○又○膺○重○疾○烈○士○暮○年○
能○毋○悲○感○乎○因○款○孔○信○告○以○將○出○都○可○與○偕○行○之○故○孔○信○亦○太○息○歎○歎○不○已○因○問○五○百○人○安○在○孔○信○言○強○半○
老○且○死○矣○卽○其○存○者○又○多○半○死○於○太○平○軍○凡○最○密○切○之○兄○弟○三○十○人○僅○孔○禮○於○某○在○耳○因○共○談○齊○魯○河○洛○間○
之○擒○寇○與○東○南○之○遭○劫○不○勝○悲○感○罷○酒○明○日○孔○信○招○逆○旅○中○俱○來○之○壯○士○十○餘○人○皆○結○束○如○舊○時○身○手○衛○伯○
和○出○都○伯○和○謝○不○欲○曰○吾○羸○馬○敝○車○一○肩○行○李○何○所○珍○惜○而○言○保○衛○且○吾○始○來○召○君○兄○弟○者○爲○國○家○宣○力○耳○
今○志○願○已○遂○尙○何○顏○驅○策○壯○士○哉○君○休○矣○他○日○握○手○於○交○河○之○濱○借○村○醪○一○杯○澆○胸○中○塊○壘○可○耳○又○吾○雖○南○
人○苦○南○中○卑○溼○不○適○吾○意○氣○此○行○當○擇○河○漳○間○閒○田○處○之○鄴○下○多○才○俊○或○可○與○共○晨○夕○藉○盡○天○年○人○間○功○名○
富○貴○本○非○吾○願○又○桑○梓○經○喪○亂○故○園○必○殘○破○不○堪○不○忍○重○過○視○寒○族○鮮○亢○宗○子○終○客○死○他○鄉○亦○甚○快○耳○何○爲○
僕○僕○歌○江○南○好○耶○遂○悵○然○出○都○門○孔○信○卒○率○從○者○送○之○伯○和○旣○定○居○於○漳○河○旁○乃○與○孔○信○往○視○孔○禮○至○則○孔○
禮○已○死○伯○和○哭○臨○於○其○柩○前○而○去○伯○和○卒○時○年○已○逾○八○十○當○在○同○治○初○矣○無○子○女○嫁○某○君○令○山○左○某○邑○曾○爲○
人○言○伯○和○晚○年○猶○慷○慨○好○奇○節○不○忘○國○事○丁○文○誠○爲○魯○撫○有○太○監○安○得○海○過○境○招○搖○事○立○捕○置○獄○誅○之○薛○庸○
庵○曾○誌○其○崖○略○實○則○其○謀○發○自○伯○和○也○先○是○伯○和○與○丁○公○有○舊○某○歲○薄○游○濟○南○將○就○丁○公○館○數○日○於○逆○旅○聞○
人○言○有○京○師○中○使○至○豪○侈○若○何○顯○赫○若○何○威○福○不○可○響○邇○守○令○奔○命○不○暇○中○丞○公○未○敢○過○問○也○伯○和○怒○亟○走○
告○丁○公○君○欲○立○名○在○此○一○舉○且○不○殺○此○獠○何○以○謝○天○下○公○如○敢○爲○中○朝○必○不○敢○問○也○丁○公○心○然○之○遂○行○破○格○
之○事○伯○和○之○老○而○奇○俠○不○減○多○類○此○者○惜○不○爲○搢○紳○所○喜○故○或○削○而○不○著○

外史氏曰。三奇人皆清季人物。絕非虛妄。有才與力。若此未嘗一竟其用。惜哉。當世交臂相待。落落。後世傳一二軼事。則人徒以劍仙。飛天。夜叉。鐵扇道人。大力童子等視之。迂儒閉目搖首。且曰。子不語怪力亂神。嗚呼。所謂奇人者。又安往而不數奇耶。東陽秦士之篇。叔子鐵椎之傳。古今同一哭也。

孫孟孚

選 卿

孫孟孚。邳州人。前清咸同間。官雲南雲龍州知州。善技擊。以毆掃地作旋風。舞地。輒悉碎如粉。自言幼以病廢學。一日行大道上。見徒役甚重。解一檻車。車中乃一少年。美秀而文。眉目有英氣。指爪長數寸。雙眸湛然。意甚閒暇。因尾至旅舍。問解役知爲謀反大逆案。至省翻供。解回復訊者。入夜忽聞歌聲。請婉合拍。如少女。察之。則車中人也。孫故精音律。因與語。問其何如人。不答。第曰。觀君似亦有心人。能隨我行乎。孫諾之。偕至邳。署州牧。坐堂皇。問其翻供之故。叱加刑。其人夷然曰。我非翻供也。我有事欲去。以廉訪爲官。清正且遇我。厚不忍以去。累之。汝身爲民牧。貪庸惡劣。囊已飽矣。尙不急避賢路。此邦之人。何時得出水火。吾故託詞翻供。覲得解回復審。因從此飄然遠引。使汝以失囚去官耳。今果遂吾願。此行爲不虛矣。語未畢。銀鐺鏘然委地。而人已杳。不知所之矣。州牧噤齟。色如土。亟令閉城門。大索。迄不能得。牧卒以失重囚。當逮治。乃仰藥死。孫當時慮被牽涉。亦逸去。至城外一小溪邊。則檻中人方坐。拳石上。孫知爲劍俠。乞從之去。至深山中。精舍幽邃。琴書花竹。翳如也。請其藝。則口吐鉛丸。二飛作匹練。光如游龍。上下四旁。倏忽萬狀。旋落手中。仍爲兩丸。吞之。孫請爲弟子。曰。子仕宦中人。學此固無用處。傳汝拳勇。可保身兼養生也。遂盡授其技。暇則教以度

曲分秒合度。雖崑山老伶工無以過之。學成送之出。孫自是疾愈益強健。後思其誼。入山訪之。迷不得徑。恨恨而返。

桃塢先生

胡寄塵

桃塢先生姓胡氏。涇縣人。逸其名。以所居桃花塢稱之。先生清威同間。授徒於。世亂鄉村貧瘠。生徒寥寥。數日不舉火。先生惟高臥。先大父復初公頗欲貨以穀。知先生介。不敢言。時先君方幼。退命爲文。就政中置數金券。先生改文畢。未見券。公故令見之。驚問何爲。曰束脩。先生取付之火。其清介如此。此余聞之先言。年幼不能記其名。今先君棄養。前輩亦寥寥。無人能知先生名矣。雖然。世風日變。方以清介爲迂遠。又誰樂聞先生事哉。（案拙著小說黛痕劍影錄中記黃堯山人卽先生事）

劍客

癡虫

負俠氣。擅奇術。仗三尺劍。剗盡人間不平事。此等異人奇士。自古有之。而凌夷至今。俠魄銷沈。國魂墮落。古所稱黃衫紅線之流。遂絕迹於天壤。惟十年前。大刀王五。庶幾近之。惜術不足耳。乃據吾所聞於鄉先進馮兩人先生者。則異矣。先生丙戌翰林。當官遊京華時。嘗與文穆生飲於某酒樓。見隔座有黃衣人。玄冠草履。氣宇崢嶸。飄飄然有出塵之概。先生頗異之。然亦不以爲意。旨酒既設。佳肴斯陳。先生與穆生論古今。訴肺腑。旣而暢談天下事。魁結箕踞。旁若無人。穆生忽就先生耳語曰。（隔座黃衣人。劍仙也。願公稍留意。）先生聞言。悚然改容。起與爲禮。黃衣人亦答禮。而意甚泊然。穆生因向黃衣人轉陳先生盛德。並請試仙術。以

廣眼界、其人搖首謝不敏。穆生與先生固請其人，乃笑曰：「山野鄙夫，烏有所謂仙術者？無已，請聊獻小技以博一噱耳。」因謂先生曰：「君可記樓下長隄楊柳幾株？」先生數之得十八株，忽焉白虹一道穿窗而出，風馳電掣，遠隄疾旋霍霍，有聲如蠶食葉。一轉瞬間，大樹十餘章悉中斷，截然如剪迹。白虹所自來，則自黃衣人口中出也。俄而張口一吸，白光仍自其口入，其人大笑振衣起，向客一拱手，掉首去，去若飛，剎那間寂然無蹤影。

癡蟲曰：中國非無一二瑰奇特出之士，然四萬萬人皆渴睡漢，一薛居州獨如宋王何。

鐵簫乞者

闕名

日本鐵簫乞者，不識姓名。或云高麗人，嘗吹簫乞食於市，高抗無淒婉聲，得錢沽酒而飲，飲畢狂笑，幸得秋水，微時嘗與之遊。某日同至華嚴觀瀑，乞者躍入浴而復出，又於簫中出小劍，僅五寸許，光芒射人，向天一指，化為白練飛去。乞者曰：「此劍得之水府藏之，天衢後日好用也。」幸得秋水，被逮乞者不知所終。

陳八公

寥

寥生有世丈曰陳八公，壯年嘗浪遊燕薊，善談笑，狀秀逸，無倫顧說者，以為武力，殆不可近。後輩頗疑之，屢求演藝，勿許也。家居村北，築高樓，暇時輒憑眺其上，樓瞰內河，估船雲雜，好身手者，因而賣武。八公薄而觀之，加品評，某庶幾某，不稱某門外漢，批隙指瑕，意中無物。忽一日有遊方僧，至循例演拳法，八公意大感動，曰：「此大得少林家法，不易與也。」同座以為誕，八公曰：「是不難，吾將有以試彼。」乃造紙札店，囑急製篋椅一座。

糊以紙。伺遊方僧。明日來。則以篾椅進。曰師太勞。盍少座乎。僧睨八公。莞然而笑。曰此地固有佳主人。因跨身其上。與木製者等環。屬從者盍以湯圓敬居士。從者以木碗載鐵丸七八。纍纍然。八公受而納諸口。以齒嚼而碎之。吐於地。僧喜極。不覺合十。曰居士大佳妙。雖然吾輩當愛惜毛羽。勿因小憤較也。因約八公臨其寓。所俾暢所言。八公誌之。過一日往。謁僧已他行。

張供奉

生

吾鄰鄉有布衣張允明者。以書法供奉清廷。道出山東某村。村方賽神。張觀焉。歸寓。則有俊僕稱延張供奉者。張驚訝。以此地無故。交不敢從。僕固請張。故好奇。姑一往。至則荒僻。一蘭若。並無僧侶。三五彪形大漢。居焉。見張來。相與握手。言久。仰備奉。此會不可多得。命備設宴。張請所以。則答曰。實告君。某等。非他綠林也。知君有絕詣。敢請一演。以啓愚蒙。張曰。某書生。筆墨以外。無所長。公等將欲作擘窠大字乎。衆曰。非也。公試細思。張曰。若然。則僕幼時。曾學袖箭。百步外。刺人雙目。無或爽。特以鄙事棄之久矣。衆撫掌曰。是也。盍試之。乃就素壁。畫人形。授張箭。張略舉手。雙箭分刺其目。衆駭歎曰。名下固無虛。吾輩苟或冒昧。其得免乎。雖然。公終當以此自隨。前途非坦坦者。乃卽以箭贈張。不忍固却。然前途并無險阻。箭未嘗一用也。

風道人

闕名

亳州陳五。貧兒也。嘗歲暮絕糧。乞於所親。少與之。請益不許。且語誚之。五大怒。棄所給於地。翻然去。招之終不返。願所親本以其不事事。欲激厲挫折之。無他意。及覘其所向。則循山逕去。心大疑。彼不還家。而就此途。

豈求死耶。時天寒雨雪。逕多虎狼。不敢獨往。乃招雇工數人者同往尋之。山深積雪。雪中人迹了了。及一樹而止。但就樹觀之。則有兩人足迹。前郢不一。所向益遠。疑其有契者同去矣。卽不復尋。家本住一破窰中。數日往視。仍無蹤也。衆莫知所向。亦遂聽之。越數年。所親以事至河南。道出少室。日暮。獨策騎行草野中。忽一狼出野草間。尾而長嗥。方欲控騎引避。俄而數十前後圍繞。爭前搏噬。則大懼。平時好武行。時方挾一利刃。以禦盜者。至是始下騎揮刃。左右迎之。狼散而復。合力盡垂危。忽口笛一聲。羣狼俯首戢尾而退。若聞號令者。須臾一人從山中來。牽馬韁曰。君今驚恐否。來遲罪甚矣。視之。五也。訝曰。君在是耶。曰。在是間數年矣。曩別後卽來此。所親曰。曩事歎仄殊甚。今君乃不念舊惡。拯我於危。感激極矣。五曰。此何足言。向實累受君惠。未之敢忘。卽當日之誚語。君特以相激勵耳。寧有他哉。因牽馬韁邀就山中一宿。所親從之。至一所。凡茅屋數間。屋前左右皆松竹。森然相間。屋後則澗水淙淙。然風景絕幽。五語所親曰。就門前少待。入稟師尊。問師何人。曰。卽風師也。遂入。須臾柴扉半啓。一巨猿躍而出。手招之。且代牽其馬。所親從之。進至堂下。道人坐堂上。見客至。亦起相迎。作道士裝。年可五十餘。語言亦和婉。非常留晚膳。左右給使令者。皆猩猩狒狒屬也。所親心爲凜凜。不敢多言。膳畢。道人顧五引客就東廂宿。五因爲所親言。道人中州大俠也。嘗於石室中得黃帝教猛獸成軍之法。能指麾猛獸如驅犬羊。先本浙人。曩北行過臺。遇五縊於途。因拯之。而收爲弟子。相將行至。值河南盜據少室。官軍不能捕。因喉獸與戰。盡殲之。遂居於此。與居民約。月以定期入山樵採。其平時聽獸之往來。長養不於人相觸焉。因言。道人有。大志。雖身爲方外。嘗欲立功邊塞。謂馭獸之術。與將兵同。果

織通其術。無不可制馭者。今世火器方盛。衝鋒之際。宜以獸代人。庶免慘戮。陳從之舉。略解其術。尙未能全領略也。天明。陳送之下山。所親歸以告里中人。他日又有人詣河南訪之。不見。問山下人云。師徒雲游。莫知所向矣。

祝由科

許宗傑

祝由科能治疾。易藥石爲符咒。世皆詆爲江湖幻術者流。然間有靈驗如神。令人不可思議。絕非虛眩者可同日語。是固不可以一筆抹煞。悉闢其爲妄也。友人曾親見一事。爲余述之。友之言曰。我邑有貴介子某者。嗜獵。臂鷹牽犬。長日逐逐於森林間。林固多蝮蛇。公子以獵興濃。不暇計也。一日者。公子逐一雉。披荆伐榛。深入密濕之區。匆迫中。誤蹴一蛇。蛇躍起。反噬公子面。急避之。已不及嚙處。覺麻而不苦。痛歸家。略敷以藥。亦不以爲意。越宿。忽奇腫。氣息奄然。欲絕。家人惶駭。遍延名醫。醫望見病者狀。卽顰眉蹙額。謝不敏焉。於是舉室號咷。備治後事。忽門外。鈴聲響。旁人走告病者家曰。外有祝由術者。自言善治奇疾。姑試之。生死觀此一着如何。家人乃召之。人視之。乃一形容枯槁之老道。手一旛。一鈴。外別無長物。姑導其入視病者。老道撫視一周。卽曰。是非棘手症。我能立時使之起。言竟。卽就地撮土。以唾涎和之。狀同兒戲。撮土旣竟。始戟指作咒。口喃喃。不知云何。咒時。並以濕土滿塗公子面。公子乃不類人形。復命。旁人取熾炭來。炭火熊熊。卽以置公子面上。衾枕悉炙焦。而公子之面無恙也。越一炊許。炭熄土落。而奇腫亦消。老道乃笑語衆曰。復現廬山眞面目矣。惟內毒尙未盡也。於是欵以熾炭。並以炭末畫一符於背。公子卽嘔吐黑水。升餘起立。一如平

時觀者皆驚嘆。酬以巨金不受。曰：「以此予諸醫者，使其假醫名以贖妻子。若某者醫以濟世，非以賈利也。公子不敢強，乃以此金爲之立生祠云。」

茸頰曰：「余寫此事竟，不覺嘆其術之神，而其末後數語尤爲當世名醫痛下針砭，似非碌碌者所能出噫，其殆術之隱者歟！」

吳定州

遇春

吳定，歙州人。脩八尺，儀觀甚偉，業梓匠，自食其力，不自存。好持三尺管，黝漆光澤，吸淡巴菰，偶屏置廊角，人不能舉。蓋以鐵鑄成者，恆命其曹昇輿出入於稠人中。左二人前荷刃，如世所稱關公狀。右一人負長劍夾而行，寒慄不可逼視。定州握鐵管，指畫東西，有旁若無人之概。路人見之，咸屏息。歙舊有攤錢會，名花燈鼓，淫娃浪子，雜沓其間，輸一錢。中者得三十五錢，摘詩句爲注，人附之若蟻，令懼其召變，偵之。定州號於衆曰：「博賽事何與當軸而無匿？於是捕益嚴。定州傾貲造兵器，市火藥，將發難，踰月糧盡而衆號。定州幡然改曰：「吾以二千人投効爲忠義士，此大丈夫之事也。何自苦乃爾？遂詣太守，名其曹曰義練。時粵賊構釁，天下騷然。太守正苦無兵，忻然諾之。先是安慶賊遣使招定州，定州僂其使，不以告。甲寅正月，祁門陷，定州以五百人往，賊聞浙兵大至，倉皇遁去。太守歸功，定州定州不受。」

零陵老衲

泗濱野鶴

宋生玄圃，魯常山縣人。善讀書，能詩，願拙於文。殆非性之近者。家本以資雄，无米鹽慮，晴和之日，輒載酒盃。

挈吟侶。舒嘯於菴。荷芳巖之巔。出岫白雲。未足喻其閒也。中年儼作汗漫遊。敵屣家室。困伏莽。中霜雪。亦匪所辭。无何入湘。過零陵。一日天垂暮矣。秋容欲暝。暮靄微醺。四野蕭然。靡人跡。隨行者有戒心。倏見叢菁間。紅燈一閃。林木砒然。長嘯益駭絕。里許始得一寺。棟折榱頽。蕪遍望。老衲一冥坐。無語。玄圃叩以宿諾之。夜午睡甦矣。突有喧嚷聲。匪徒數輩。燃茅執杖入。將劫玄圃。裝玄圃夢覺。大悚不知所可。哀懇之。匪怒。割玄圃股。玄圃幾暈絕。維時有風。窸然一圓物。若月輪穿帷出。嘩嘩有光。中首匪頸。乃立斃。繼而相繼出斃匪數四。餘一亟遁。獲免。而老衲大笑。出微語曰。鼠輩。乃不自審。小試吾鋒。令知荒窟中有吾老衲在也。玄圃始知適間圓物。乃衲所發。亟拜謝。叩以故。老衲曰。此吾師授我者也。其名爲飛鎚。異乎常人所試者。有器焉。納鎚其中。既準。吾的乃展其機。而鎚發。鎚之端有微孔。納毒其間。能腐骨髓。遇之者無復幸。免玄圃聞之。喜與駭。併不能成寐。翌日衲護玄圃行。途中敵聲不絕。衲一一應之。無敢犯者。行數十里。始別去。玄圃德之甚。不能忘也。遇人輒以告之。

鐵骨余天罡

奚燕子

余天罡。浦左題橋人。幼失怙恃。飄泊他鄉。從異人遊。得鐵布衫。金鐘罩。秘術。遍歷秦豫燕魯。所至角技。聲名雀起。爲武士道中有數人物。倦鳥歸巢。年華老大。故鄉村落。半毀紅羊。余慨然自任。團練教習。收門弟子十餘人。朝夕訓練。俾成勁旅。以禦土匪。地方賴以保障。亂平。又作塞外遊。門弟子中有鞠茂堂者。爲上乘。駟搜落魄少年。授以拳術。不十年。門下雲蒸霞蔚。稱盛一時。一日羣弟子在茶肆。評論拳脚。忽來枯瘦老者在旁。

乾笑衆知其諷已橫施毆打拳足交下老者臥地不起閉目無聲半晌毆者皆罷老者不知也聲訐雷動矣衆乃以繩索密捆奔告其師鞠茂堂及鞠來老者已運動神力麻繩迸斷坐茶爐畔徐徐拂衿上泥痕談笑自若鞠見是余趨前拜倒稱老師衆乃跪地請罪余笑曰此行亦大佳惜爾輩落手太輕未能痛快與衆忤悞不能對遂備酒負荆

燕子曰幼時聞余天罡拳師名久矣初不知其究竟也近晤鶴沙張君傳述余事極詳惜無生花筆博好身手爲落魄英雄一吐氣耳書此以誌欣慕云爾

鞠茂堂

奚燕子

鞠茂堂南邑人少年負奇氣輕財尚俠路見不平拔刀相助從余天罡得祕術內功連氣體如堅石刀槍不入久之能蹲地以陰功接人拳遠擲之無不披靡設場授徒門牆桃李日盛一日邑廟演劇酬神鞠必直立檯前不敢稍犯偶遇搶親尋仇於稠人廣衆中鞠雙手一分勢如潮湧衆見鞠至皆鳥獸散鄉里有不平爭鬪者鞠一言解之莫不悅服鞠自言少時曾遇勁敵於某鎮會場場設有西洋鏡者都山東人以淫畫誘年輕婦女鞠往阻止山東人內有保鏢則出鬪鞠見來勢洶湧側身躲避鏢師拳觸廟牆陷一洞鞠從後擊之鏢師始倒然亦險矣

寶店異客

无悶

寶店距彰義門二十里爲旅客尖宿之所亦南北往來必經之地也離輦轂切近金吾緹騎恆偵探賊盜盤

詰奸宄。凡異言異服。形迹可疑者。擒獲無得脫。一日有客。黑面虬髯。自北而南。語音似楚。結束整齊。跨黑衛甚駿。佩刀外無長物。入店呼主人。速治具。解腰纏出白金一囊。陳几上。屬買雞豚牛酒。多多益善。主人曰。此物宜善藏。露虞有失。客曰。此物予得之。甚易愛者。任取之耳。且予踪跡遍天下。未逢豪客。豈叢爾寶店。轉爲萑苻之藪乎。少頃酒肴羅列。客掀髯大嚼。連酌數十巨觥。不醉而下。酒物已罄矣。因以餘酒斗許。傾瓦盆飲。黑衛熄燈而寢。齶聲雷動。逆旅主人白保甲。旋有汎弁暨緹校數十人。圍繞戶外。擬俟天明執之。日向晨。客啓門欲出。衆人圍而前。客笑曰。昨宵不戒。陳金几上。汝曹今欲白晝行劫乎。舉手一揮。衆皆顛仆。村中有張姓者。拳勇絕倫。而尤長於槍。人以張鐵鎗呼之。聞喧呶聲。疾趨而至。舉手砍客胸。客駢二指撥其頰。張卽仰仆。十數步外。客曰。如此伎倆。亦欲與乃翁較勝負耶。張故以拳勇自負。授徒數十人。今爲客所辱。愧且憤。呼徒畢。集環而攻之。客於衆中奪一根。四面揮擊。中者輒仆。無敢近。跬步者。客於是從容就櫪。下整驢鞍。跨於背。拔佩刀向飲馬石槽上一揮。中斷。曰。以汝曹頑骨。祇須以木棍朴作教刑。若試以佩刀一村。無噍類矣。發聲長嘯。烟塵滾。瞬息不見。

老者

闕名

徽州項某。嘗言搭舟赴蘇。由徽河而下。有過威坪屬浙之淳安縣界。風利張帆。有上水船擦舟而過。旣去數武。忽揚石灰。舟後以及帆檣。均有白迹。榜人遙呵有老者。年約六十餘。出視躊躇而後入。低告衆客曰。君等皆宜加意防範。今夜必有寇來。衆以爲妄言。相視而笑。老者遂默不語。傍晚旣泊。老者上岸。四顧徘徊許久。

始登舟又告衆曰夜若有警君等須顧全性命聽其取物不可與爭衆厭之置不理夜半衆人正在黑甜鄉中忽聞一聲嘶喊綠林豪客二十餘輩已破扉而入手執大刀亮如霜雪衆皆驚懼圍伏被底盜乃開箱倒篋又執人而搜之罄其所有而去衆低聲環泣莫可如何約一飯之頃老者起謂衆曰諸君所失之物尙以珠還否衆曰明日報官縱能弋獲所失已多况冥冥飛鴻破案莫必耶老者曰諸君之物去此不遠若能隨我去必可取回但只能各認各物不可傷盜倘不從吾言彼此均不利衆曰果能失而復得傷盜何爲願我等柔弱得不畏膏盜鋒乎老者曰是無慮我已用術定之彼有虎狼之心而成木偶之體無能爲矣衆乃相隨而行約六七里至樹林中見坐者立者皆與泥塑相似遂各取其物還旣返舟衆皆拜謝老者提燈呼衆觀之見有二十餘針矗立篷上告衆曰當盜登舟時君等縮頭不動我平視而點數焉入舟者二十四人我恐外有把風者故增其六不圖恰符其數也衆問針須拔否老者自言二十餘歲時出遇龐眉皓首者見其誠信相其面不免爲江湖客乃以此術授之以試鷄犬無不驗而終身未嘗遇盜不意於垂暮之年竟得一施其術也衆求授術老者曰吾受吾師戒令勿於道路傳人若與諸君有緣請俟異日稗史氏曰懷術數十年未嘗一用其名不顯無怪庸耳俗目者咸嗤爲妄也觀其審顧遲疑老成持重拒衆數語蘊藉風生磊落光明襟懷可想然此特奇門內之一端耳假令衰年不與盜遇亦復誰知由此觀之天下英雄埋沒不少

尤生黃天雄

聞野鶴

粵中尤生精技擊貌魁碩觀者輒知其爲英烈人也所居曰蘋邨隣有古龕住持僧慧空精拳術能舞利刃

技不在生。下顧慧空。恆撝退。若無能而生。則桀鷲不可一世。一夕生飲友家。微醉邁步歸行。陋巷中與人遇。倉猝不得避。遂踣。既起。就月光細審其人。則慧空也。翌日生欲控之官。慧空曰。若毋然。某當於某日與若決。一。生。死。不。得。挾。利。器。不。得。施。譎。謀。生。諾。之。屆。期。集。至。庵。遙。廣。場。觀。者。霧。集。初。數。擊。未。相。下。既。而。生。繞。慧。空。後。一。躍。踞。其。背。慧。空。亟。負。之。疾。馳。蓋。場。隅。有。一。沼。將。棄。生。於。沼。也。詎。生。以。兩。手。力。扼。慧。空。頸。慧。空。氣。不。屬。驕。然。墮。生。不。及。躍。亦。墮。股。幾。折。而。慧。空。竟。死。生。益。自。負。里。人。之。勇。慧。空。者。遂。移。以。勇。生。醫。治。半。載。股。乃。愈。行。止。若。平。時。生。遂。有。蜀。遊。將。以。技。結。識。江。湖。勇。士。也。一。日。薄。暮。游。於。某。嶺。之。麓。山。經。窳。窳。衆。谷。谿。咽。生。方。欲。出。聞。有。呼。嘯。聲。乃。循。聲。而。往。行。數。十。武。繞。巖。之。背。得。一。寺。寺。已。頽。敗。時。方。隆。冬。殘。雪。冒。於。其。屋。遙。視。之。大。類。斑。髮。老。者。當。空。而。立。寺。中。有。二。人。一。魁。岸。健。夫。而。一。則。侏。儒。特。甚。時。方。駢。立。階。次。健。者。有。喪。顏。見。生。入。亦。不。爲。禮。生。念。巖。谷。間。必。非。常。人。乃。揖。之。曰。兩。壯。士。來。此。何。爲。健。者。不。之。應。而。侏。儒。啓。言。曰。先。生。何。許。人。吾。察。先。生。殆。非。碌。碌。輩。乃。何。幸。而。見。顧。僕。適。與。胡。兄。角。力。無。他。爲。也。生。薄。侏。儒。甚。乃。徵。哂。曰。足。下。亦。能。技。擊。乎。僕。願。一。領。教。侏。儒。曰。善。健。者。亦。起。立。旁。立。觀。二。人。所。爲。生。遂。揮。拳。擊。侏。儒。侏。儒。略。退。生。方。前。行。逐。之。侏。儒。突。反。顧。以。一。指。指。生。胸。生。立。仆。兩。目。流。血。不。得。一。語。侏。儒。大。笑。告。生。曰。我。黃。天。雄。也。我。本。無。能。宜。君。之。薄。視。然。天。下。不。乏。奇。才。君。後。此。幸。勿。薄。人。過。甚。亦。盛。德。事。耳。生。時。已。清。醒。聆。侏。儒。言。惶。愧。特。甚。蓋。生。往。日。與。僧。談。藝。僧。常。自。言。爲。黃。天。雄。弟。子。且。盛。稱。黃。技。擊。之。精。也。

野鶴曰。吾紀是事。吾乃頓憶往日一段歷史。某歲之夏。有俗儒過我。吾不爲禮。俗子有慍色。吾告之曰。足下。

之才固上於僕乎。僕亦不難泥首至地。俗子乃逡巡出。是時意氣特甚。今而後知爲過矣。書此以當懺悔。

褚復生

山陽焜

褚復生。上海人。精槍法。橫矛飛舞。旋轉如風。名曰四平槍。當其舞時。雖數百人。莫能近也。隱居滬濱。不輕以技示人。人以其謙和易近。亦稍知其負絕技焉。同時有張獨骨者。自恃其力。橫行鄉里。甚至劫掠商旅。無所不至。衆人恨之。刺骨。乃求計於復生。復生命與張獨骨相識者。設席延之。褚亦赴焉。獨骨不知褚之精於槍法也。乃使酒罵座。拔劍起舞。旁若無人。褚亦起立。以箸一輕輕點其額。曰：「勇哉壯士。天下無敵矣。然吾等文弱。見舞膽怯。子盍坐而言乎。」張遂坐。終席不發一言。褚亦默無一語。旋張興辭去。衆謂褚曰：「以君負奇技。何不與獨骨一交手爲吾等除害乎？」褚曰：「已除之矣。衆不信。旋聞市人喧傳。張某額部青黑。死於道旁。衆始駭服。叩問其故。褚笑不答。蓋褚用箸點張額時。已運神功。中其要害。故一二小時後。傷傳入骨。而斃命也。其技亦神矣哉。」

太倉庖人

胡寄塵

庖人姓某氏。江蘇太倉人。以善烹名。然意所不屑。多金不顧也。明社既屋。清兵南下。江陰嘉定屠戮最慘。而太倉以城降。無一人與抗者。某獨慷慨誓殺敵。時據太倉者李成棟。聞某名。使治饌。則欣欣然往。一日宴客。酒半酣。忽一客躍起。呼毒。旋倒地斃。某於是知謀洩。殺李志不果。行兩載。指大罵。求一死。以愧士大夫。成棟揮出。斬之。曰：「我偏不欲汝立名。戒左右無言於外。以故人無知者。後李敗。人始稍稍聞其事。云胡子曰：此顧

震生言。命吾爲文傳之。震生又曰。吾言庖人。吾不能言其姓名。何足貴哉。然庖人豈求名。亦所謂愧士大夫耳。嗚呼。震生知庖人心者矣。

葛衣仙

醉公

荊州羅姓。務農爲業。一日有客走入蓬首衣。破葛衣。長揖而言曰。某江右人。盧姓。探親不遇。缺資斧。聞公長者。請周之。羅老細視衣。雖懸鳩。而氣度閑雅。時正欲延師啓蒙。因問識字否。盧曰。遊學在外數年矣。羅曰。不棄蓬蓽。請卽設帳。余家。敎兒輩。再謀歸資。何如。盧忻然而留。羅擇吉令其子煜子燿姪燧受業焉。盧足不履戶。訓課有方。賓主之間。歡如也。時已冬初。羅製新錦衣以授。盧固辭。雖嚴冬不近火。亦無寒慄色。三年止一葛也。羅暗奇之。羅居宅靠山。峭壁叢巖。竹樹茂美。月明東岳。朗朗如畫。羅親家里長蒲姓。與盧有一面識。早行過之。見一人披髮赤身。旁置葛衣。跪石上而拜。月拜畢。抖衣忽如錦。忽如繡。忽成裘。忽單。袷着身。則仍化爲葛。細視則羅宅西席盧也。大駭。見羅密語之。羅不敢留。厚儀加禮而遣之。盧遂披葛長揖而去。閱年餘。乘蹇過山前小溪。見盧蹲溪邊。濯帕披葛衣。仍如故。坐亂石間。絃寒溫。因問近跡。盧曰。見在前村李家。設帳未歸也。語畢而別。行二三里。又見盧生坐於巖邊樹下。羅駭其不敢言。至前村。又見盧生與李翁立談。門外羅曰。適溪邊濯帕者。先生也。巖邊倚樹者。先生也。茲之躡足閭楣者。又先生也。何頃刻而周旋能如是。盧不語。而入。李笑曰。謊也。晨興。僕與先生請談。未離左右。方擬前村沽飲。那云溪邊見巖邊。又見也。羅李交詰。述始末。乃知盧生在李館已四年。許館羅之日。皆館李之日也。急入同訪之。館童曰。先生適披葛出矣。候至晚。渺

無蹤跡。乃悟其爲仙云。羅燧任武清縣知縣。向敬修堂主人親言之。

覺迷曰。韓文公有語云。冬之裘者曰。何不爲葛之易。此必不能之事也。盧生數年一葛。簡易乃爾。入水不濡。入火不熱。具大本領。遊戲人間。倘所謂龍不隱鱗。鳳不藏羽。是耶非耶。

賣菜傭

張慶霖

粵中黨市中。有賣菜傭某。白髮童心。面上鷄皮。攤堆如羅。基山二眸子。却炯爍有光。着短衲。四季不更。人多奇之。願傭和藹可親。好爲滑稽語。故衆樂與之。暱時予隨侍旅粵。寓錦榮街。每日之晨。聞傭過我家門口。中驚。報其所賣之菜蔬。如黃河翻決。順流而下。勢不可阻。圓潤可聽。日未午。菜售盡。復過我家門。以石階爲其俱樂部。出竹筒吹以粗菸。烟散四處。盤旋成幻境。予慙。頑成性。嘗自其後。遮其光亮。眸子或持其白髮。傭不爲忤。蓋恕予幼也。傭日偕予媿媿而談。無倦色。嘗過午。予留飯。不肯強之者。再始。應傭呼予曰。二爺。蓋從家人而稱之也。傭每謂予曰。二爺。處今世代。非以禮義廉恥不能生存。汝尙幼。必不解吾言。來日長成。方知吾言不謬也。予訝之。蓋是言予師保嘗對我言。汝賣菜傭何人。亦有是云云。耶。然覺傭意誠而懇。潔清雪白之氣。顯於色。是以奇而敬之。未久。傭失所在。噫。予自失老友後。凡不快者。月餘。予聞父老傳說。傭俠而奇者也。某日。傭隨一健蹇。驢背上坐一小女子。小家碧玉。姿首嫣然。卽傭女也。生而失母。今爲母。冥辰。從墓祭奠。返行將至城。一綠衣年少。車馬如龍。從者數十。負獵兵。由城而來。覲面見女。少年目逆之曰。美而豔。苟肯爲我侍姬。從卿之。老頭兒想爲若父。則父子一身不愁溫飽。傭大怒曰。豎子速退。敢爾者立碎狗頭。少年亦怒。

回顧左右曰。老狗不識擡舉。爲我朴之。衆持兵蜂湧上。備運其手中牛皮驢鞭如風。連格倒數人。猛進以隻手捉少年。由馬鞍上擲下。鞭之。少年色變。知不敵。懇之曰。翁果釋小子。小子當以金爲翁壽。備曰。我釋汝罪久矣。奈今日自投網羅。我不得不殺汝。以洩忿。並誅此淫根。免留世上。回顧女兒曰。阿紫。汝下騎。我告爾。顛末亦釋。少年起時。從人均四散。逃命所剩者。僅此一老二少女。與少年相視。備不語。心中揣疑。不知何事。備顧少年曰。汝吾子也。顧女曰。爾實非我女。汝伊人之女也。少年聞言。面紅耳赤。謂備曰。丈誤認矣。吾自有爹娘。女亦曰。女兒幼失母。阿翁垂愛至今。緣何今日不認。備嘆曰。吾非李大寶。王彪壯年。隸若父帳下。時吾授室。方暮年。妻已懷六甲。回顧少年曰。後生下。卽若若母。陳氏女。精拳術。吾非若母敵也。厥後不知如何。若母與主人竟濶上纏綿。桑中有約。吾知而不敢言。非懼主人實懼。若母常忿忿於色。主人知吾有所懼。某日尋小事。革參吾職。責吾軍棍四十。逐吾出府。嗟夫。若母竟忍心欲置親夫於死地。凡金銀衣服。概不與吾。吾處異地。親朋莫問。宿一古刹中。因思英雄落魄。壯士被冤。叩問碧翁。黃土僉相對無言。又念天下竟有如此怪事。霸佔人妻者。則有之。獨未有如此狠毒牀頭人也。蓮更再滴。夜漏三催。吾一覺方醒。而棒創痛甚。忽聞女子叩門聲。急予大惑。疑爲妖鬼。非然者。卽淫奔之女子。不肯納。女子啜泣曰。儂不辭跋涉。感王統領義憾。吾家將軍作惡。與伊口舌。彼已離棄我矣。今特來投君。彼既能淫君婦。我獨不可爲紅拂耶。君莫視儂爲淫奔娃。殆亦天道之循環耳。老夫聞言。遂開門納夫人。夫人旣入。忽色變。呼痛不止。問之不語。以手搓腹。予知夫人將產矣。時夫人已席地臥。予惶然沒主。因意彼富家人。以義至此。平素固使奴呼婢者。今若此。不亦大可。

憐耶約二小時。夫人產矣。生卽姑娘。然血崩。予欲尋醫。夫人不可。謂予曰。儂恐不生。君必視儂爲婦。此女雖非君女。君亦必視爲女。包裹中有金銀。儂死蒿葬。儂攜銀持女去。噫嘻。夫人竟辭世去。予雖英雄。至此亦不免洒數點俠淚。嗚呼。夫人殆亦異女子也。天明。予厚葬夫人于郭外。留碑抱女去。過將軍府。熱鬧異常。蓋將軍生公子。賀客盈門。所生謂少年曰。卽若也。予大恨。誓必報仇。走江湖十載。遇髯師拜門下。術大進。來粵。則將軍暨吾妻均物。故留爾孽種。今更仗勢。若爾吾必殺汝。言罷。出白刃如霜。女大驚。跪下曰。翁無然。此吾父之過也。翁視我母。當恕。兄少年亦跪求父赦罪。翁亦大痛。長嘆謂女曰。兒其起乎。吾一思若母。則五臟均裂矣。吾今將去尋吾師。三山五岳。聽吾所之。惟若夫。慧宿也。兒當勸其勤學。不難前路。膏火家計。當責吾不肖子。回顧少年曰。不肖子爾。其聞乎。今汝之產。卽若妹之產。本當舉以還妹。但恐族人嘖嘖。而夫人祭祀汝。當不可忘。吾女乎。吾去矣。十年後來視爾。二人留之。不可。傭遂去。不知所往。十年後再來粵。視女否。不可得而聞矣。

俠魂曰。子非其子。而子卽其子。女是其女。而女非其女。佛家之所謂色。卽是空空。卽是實者。非耶。若傭者。尤非尋常之俠也。

又曰。某言云。吾非李大寶。王彪。此畫龍點睛之筆。蓋王彪之歷史。與少年必有實在之關係。是以聳其聽聞者。故倥倥侗侗之言。不啻原原本本。

雲聲雨夢樓主人曰。少年之稱傭也。始曰老頭兒。繼近而尊之曰丈。又近而親之曰翁。傭之稱少年也。始曰

之兒近而親繼淫根又切以責之曰不肯子隨意變化最爲有趣

賣菜翁

江南長恨子

常州大教場在小南門外爲軍營大閱之處地廣則百餘畝南門外有木匠街者其人均習拳術學藝者多集於此一日衆人正在練習拳勇突來一山東人跳入場中不問皂白不通姓名與教師角技未三合教師已中要害不能舉拳山東人咆哮如雷餘勇可賈學徒數十人咸抱不平蜂擁而追山東人左揮右擊當者盡仆衆皆披靡忽一賣菜老人鬚髮已白形甚傴僂手提菜籃而過山東人將學徒擊散後顧盼曰雄不許人觀看見老人至斥之老人如不聞見者山東人怒舉拳擊之老人徐曰何恃勇若是耶卽坦腹受之山東人拳中老人腹如入敗絮急縮手時拳已入老人腹爲老人腹夾作臂痛欲折不能伸縮且身如觸電骨節酥麻不覺膝跪下老人曰如此技辱莫人少年不更事學得數路拳術便欲欺人自以爲天下無敵橫行鄉曲真非底蛙耳汝勿謂天下人易欺也吾亦不忍過創汝速去休腹稍一鼓山東人已仆出三丈餘矣老人提籃欲行衆堅挽之請其姓氏欲師事之老人曰吾老將就木無意聞世矣何用姓氏爲爾等徒恃血氣之勇技者精適足爲殺身之具耳觀爾等所習盡屬皮毛雖精無益也終不肯惜姓氏而去味其言蓋劍俠者流隱於賣菜者乎

鄭成仙

闕名

鄭成仙者歙人也。以織箕爲業。其業善而價不二。人爭售之。少時常以風雨中過坤沙之澗。澗有木橋。且朽

矣。成仙過而蹶焉。曰：危哉橋乎！吾幸不顛仆淵中，然必有死是橋者。於是仰天自矢，吾當積篋爲石，以石更木。聞者咸笑之。成仙自此得錢，輒易銀投一小鑄中，蘊土鏗下其媪與子，皆不知也。中間屢爲黠者所竊，則又蓄之如是者三，而年逾七十矣。一日呼諸鄰叟至其室，曰：吾初願尙不止此，今吾足趺而背偃行，且就木不及，今爲之橋，與身俱逝矣。發土鏗下得鑄，倒而出之，燦若繁星，稱之重二鎰。媪與子相顧瞪目而嘻，而變時笑之者，亦斂容驚愕曰：叟果能若是耶？於是買石鳩工，卜吉經始。稚者負鍤，壯者肩石，奔走從事，窮日不休。未匝月，畢工成。仙具牲醴，率鄰叟祀神，乃共歎曰：鄭老之高義，士大夫所難也。不以名之後，無聞焉。其奚以戒夫富而不肯爲善者，乃名其橋曰：敏其橋。

野史氏曰：陸次雲湖壩雜記載，宋時有與夫肩輿，得金自給之外，以餘資投井積久，建佛寺於湖上。與此事極相類，而與夫建佛寺失之，迷信視鄭成仙之建橋，以便行人，有愧色焉。天下事有志竟成，古所云愚公移山，或非虛語歟。

魯仙

徐岳

余爲童子時，見有魯仙者，挽雙髻，冬夏皆披棉被，數層足踏芒鞋，肩挑竹杖，上掛簫管鼓板，行則瑟瑟然，時高叫曰：快活快活，真快活！夜臥必在飛簷殿脊城堵之上，或見其疾行雉堞間，如飛鳥。時或仰臥女牆，弄遂聲徹雲表。凡魯仙經過，老幼隨之。一日有巨商邀入園中，飲以酒，復以一銀盆盛燒酒三四斤，魯仙出其勢垂盆中，吸酒有聲，嗒嗒片時而盡，漸覺面有酒色。松江太守方岳貢以其跡涉妖妄，斃之。杖後有見魯仙

乘一小艇在平湖縣之東湖。仍荷管籥之具。高叫快活之語。聞者雜至。或曰：已杖死雲間。何復在此人耶？鬼耶？魯仙遂躍入水中。後不復見。明初張臘。邈既化於甘州。張指揮園中。後屢見他所成祖。每下詔求之。不得。今西域入貢者。猶云三丰爲某台吉供養。現在不死。又如江右人云：羅狀元尙在廬山。此皆仙蹟變幻也。彼魯仙者。豈其流亞歟。然其吸酒之術。近於比加。取禍杖下固宜。

蘇衣僧

徐岳

友人施楚望述魯仙同時僧。冬夏衣蘇衣。因號曰蘇衣僧。醉後狂言。往往徵驗。其尊人笠澤先生。嘗飲二人以酒。皆大醉。東西房就寢。魯仙清晨先起。取僧蘇衣。置金魚缸中。水底下以石壓之。卽趨而去。莫有知者。及僧醒。徑向水底撈蘇衣披之。未始沾溼也。又云魯仙口啣外腎而睡。如鹿臥云。

馮雄

闕名

鏢客馮雄。山東人。勇冠儕輩。遊歷各省。所遇拳棒。莫能出其右。故綠林中。聞其名者。莫不膽裂。一日保餉銀。至陝西某縣。舟泊大嶺下。日將過午。假寢片刻。恍惚舟略動。馮卽醒。見一人短衣窄袖。在艙而攜一銀包。躍上嶺去。馮大怒。急逐之。其人或馳或躍。似麻雀。馮竭力追趕。終不能及。須臾至一高牆。牆上有月洞。一口大如盆。其人縱身而進。馮亦繼入。則見其中院宇比連。絕無人跡。馮甚異之。緩步入內。俱空屋。並無陳設。末至一室。見有一榻。羅帳低垂。帳中露一蓮瓣。瘦小奪魂。纖不盈掬。而所失銀包。置於足下。馮更加駭異。不敢啓。帳上前徑取銀包。孰意分毫不動。知不能敵。急退出。甫十餘步。忽聞嚙嚙鶯聲。由後而至。馮一回首。則見杏

臉桃腮姿容絕世一十七八好女子也。馮以爲可欺，遽放鏢。女接去，馮拔佩刀相拒。女從容以飛劍破之，馮汗流脊背，亟請罪。女笑曰：是奚罪哉？妾兄妹二人隱居於此，將及一載，久聞君名如雷，貫耳知君。今日至此，頃家兄攫取銀包，並無他意，特欲一較其技耳。遂請馮入座，馮心稍慰，隨之入。女即請其兄相見，並備酒飯。馮不暇辭，遂相共飲。罷，女乃導至後園，園中有木柱七十二根，半入泥內，問馮能倒之否。馮力盡平生，倒去數枝。女微笑，金蓮起處，餘木盡倒。馮不勝佩服，因詢之。始知女姓韓，其父亦豪客，女善父術，身輕如燕，能水上行。其兄雖得父傳，然遠不如其妹。兩人之隱於此者，以其父已死，兄妹具此絕技，恐人生疑竇也。馮遂辭別，女即以銀包還之。馮回家，思天下異人之多，不敢再誇拳勇云。

成都山洞之異人

闕名

頃見近人筆記一則，極恢奇。有自蜀中歸者，言成都某鄉團勇一日操演鎗礮，一兵燃礮向空遙擊，飛彈入雲際，適中一巨鷹，傷其翼而墮。衆趨視之，則鷹背上伏一人，以絲縲繫鷹頸，時已暈眩，尙牢握不放。衆亟解之，扶入附近草屋，俄頃而蘇。其人衣冠絕異，衣紐俱從背後反扣，冠作方形，突高聳，中有夾層，可貯銀物，足着革履，腰繫革囊，一儲乾糧，軍器無他物。村人以爲異，競問其來歷。其人操北音，答曰：吾黨無姓字，以數目編列爲號，我乃一千二百五十號也。自明代鼎革，吾遠祖即挈家人騎巨鷹棲止於山洞，衆問山洞何在，其人自窗隙遙指一最高峯，示之曰：此間峭壁千尋，多毒蛇猛獸，數千年來人跡未有至者，故吾黨出入皆以鷹。吾黨棲止之處，雖猛獸亦不能至。洞中寬廣數十里，種植畜牧，足以供給日用，人各自食其力，不識爭競。

爲何事也。今以生齒日繁，地利不足，欲以得一殖民地以分居。吾族前月有人從好望角高峯上探得一地，頗適於棲止。且其中金礦甚旺，小河支流極多，河灘積沙，光采閃爍，人以為火鑽也。言至此，出礦沙及鑽與衆觀之。且曰：吾頃即從好望角來，不圖爲飛彈所阻也。吾鷹如何幸毋置之死地，待其創復，吾即行矣。衆曰：鷹負傷重，生死未可知。其人自往視之，曰：無妨，探囊出藥敷傷處，鷹亦漸蘇。其人撫之頗馴狎，村人欲以報官府。其人曰：毋多事，吾儕不知官爲何物也。其人富於武力，善舞劍，自言能爲人報不平，衆懼釀禍，乃已。鷹日食粟數斗，其人飲啖亦甚豪饌，以全羊不飽，酒逾斗亦不醉。居數日出，金鑽徧贈村衆，以代膳宿之費。惟鷹久不愈，其人殊焦急。一日又有巨鷹回翔空際，其人口作嘯聲，鷹乃下，遂別村衆曰：吾黨知我在此，故使來迎。今去矣，有能從吾遊者，此鷹可容兩人坐也。衆辭不敢往，其人乃跨上鷹背，傷鷹從之，冉冉入雲而沒。後亦不復再見。云其所記如此，然否殊未敢必。毋亦晉人桃花源之遺意歟。

徐一青

秋風

山東周村有徐一青者，先世業米，稱小康。其父尤善經營，某年米價低落，由暹羅兩湖採辦數十萬石屯積市上，待價以沽。翌年多旱，價果大漲，獲利可三倍，遂富甲一鄉焉。一青十二歲從學私塾，聰穎逾常人，過目能背誦。周年而學五經，一時有神童之目。父母愛之，不啻無價之寶，輒譽於人曰：此吾家千里駒也。他日光徐氏門第者，必此子。又孰知命途乖舛，致遭天忌。一青十四歲而椿萱同時以暴疾謝矣。司帳祁某以一青孤弱可欺也，席捲所有以遁。及一青覺悉，赴官請緝，則已杳如黃鶴，無可蹤跡。徐氏家庭既罹大故，復遇不

良家頓落。門庭冷寂。直如荒塚。一青乃廢讀。衣食時虞不濟。又無親戚。故舊顧憐之。嘗仰天嘆曰。大丈夫豈甘爲轅下駒耶。遂隻身走關外。關外多技擊士。尤以錢麻子名最著。個中人咸景仰之。執弟子禮者約數百人。錢外出。途人莫不拱立道旁。尊之曰。錢大爺。一日見一青於古廟前。異其貌。問焉。答如例。錢竊喜曰。此子具俠骨義腸。非久居人下者。乃納爲義子。日督以耕作。授以技。一經指點。便能領悟。勤奮冠儕輩。事錢尤以孝聞。每語於人曰。余不幸爲失哺之雛。苟無義父。且爲餓殍。人非木石。雖無可圖報。亦應感恩於心。余不能不以父事義父也。錢聞之。嘆曰。余言未盡然也。此子不止俠義兼仁。孝而有之。今日所罕有也。明日妻以女。而督教益嚴。三年。一青盡得其術。是年春。作齊魯遊。山腰突出一虎。張牙而前一青力控其項。虎不能起。復力拳之。額破血流而死。昇之人城。城中人圍而觀者如重城。然無老幼男女呼爲勇士。地方紳士嘉其膽力。爲民除害。請於官。犒以巨金。笑曰。此不詳物也。受之何爲。盡散諸貧乏人。尤德之比。返請於錢。擬往學於少林寺。自陳學無止境之意。錢不欲奪其志。首肯者再。一青乃行。少林寺八十四歲僧定修。全寺之長老也。能噓氣折大樹。吐劍百里外。取人頭如拾芥。一青拜爲師。執弟子禮甚恭。五年。技大精。且通劍術。臨行。僧贈以短劍一。且囑此去六十里。一僧橫行。玷吾佛門。汝爲余撲殺之。一青諾之。抵其地。果見一僧。銅環束額。鬚長及地。跣足持杖。面目猙獰。往來市上。強索酒肉。錢鈔人畏其燄。無不如命。一青大聲呼曰。汝等縱膽小甯。獨畏此禿耶。衆噤不作聲。且爲一青懼。僧聞言而怒。回身直撲一青。一青以朝天一炷香拒之。僧踣於地。哀乞免死。一青揮劍笑曰。余劍寶貴。不屑汚汝血。此特偶試末技耳。姑免汝死。速去。休。僧抱頭以竄。是後不敢再

來人皆感之。當時有殺鷄爲黍，邀至其家者。有以白銀爲壽者，皆謝絕。且曰：不能爲國家弭外患，除內奸，男兒之羞也。與若一無足重輕之禿較短長，豈夙願哉！揚長逕去。後乃操保鏢生涯。富商巨賈，每視爲上賓。往來大江南北，及長城以外，無敢擾其鋒。綠林中人，聞一青之名，靡不膽落。旣幟所至，秋毫不損。行旅者爭相邀，所入益豐。不知者幾疑爲富貴兒也。未幾卒，以錢麻子年老，不願一青跋涉山川，終年碌碌。一青遂決志退隱，不預外事。於所居餘地，建築小園，廣植花木，方期永享家庭之樂。孰知斯人不出，盜風復熾。遠近又以劫掠聞名。昔日之富商巨賈，來求保護者如故。一青固不獲，挾短劍以行，盜不得逞，心雖恨恨，莫敢誰何。惟求神問籤，以下其死期。一青俱一笑置之。益以平日爲人，不畏強禦，遇貧乏者，求無不應，受其惠者，更僕難數。乃於廟中爲之立生位，朔望爲之禮懺，延年益壽。一反盜之所爲。一青亦一笑置之。某日，一偉丈夫踵門求見，未及中庭，以所持鐵杖用力椎插地，石破入泥者半，問將何爲。曰：來與徐一青角技耳。聲甚恨恨，似必欲得一青。甘心者。一青笑謂之曰：余無能爲徒，邀虛譽辱君，枉顧。盍一日醉，何如一青此言。雅不欲與人作無謂之爭。亦如常人所謂學問深而意氣平，非膽怯，更非氣餒也。詎其人反以一青爲可欺，猖獗尤甚。出言多不遜。一青不能忍，以手拍其肩，其人卽應手仆地，張目吐舌，血自竅出。一青乃掖之起，而數之曰：不度德不量力，何可輕於嘗試。今日姑示薄懲，俾汝知改心。苟不甘，十年而後猶可報復也。其人大慚，伏罪而去。一日入市，及夜未返，數月仍不至。家中人異之，求其蹤跡，迄無下落。妻父錢麻子，且因此病，而一青書至，謂某日入市，遇異人，身不能自主，竟隨之往。已以異術傳余。此生不願回矣。錢閱書竟，歎歎謂其女曰：余向

以千里駒目。此子此子。固未可以羈勒也。雖然並不負余。

宋山

秋風

宋山。汴洛間大盜也。膂力過人。一手能舉五百斤。酷嗜酒。醉則狂歌街頭。臥處無定所。隨足跡所至。以爲家。某村有百餘年大樹。足十抱。枝節槎枒。根延半里。村人習於迷信。以爲不祥。謀去之。因人多反對。不果。是年瘟疫盛行。衆又以爲樹神作祟。而去之。議遂不可寢。一日。匠人集斧鋸。頻加不可動。如是者半月。耗資費力。樹終無恙。山適徒步過。立而觀焉。匠人氣喘汗涔。若不勝其勞者。自伐落枝葉。外根之與幹。堅固如恆。察若輩狀。咸有難色。山不禁大笑。匠人怒責山曰。余等數十人力竭聲嘶。歷時半月。成績如是而已。汝縱具九牛之力。逆料亦無濟於事。何笑爲。山不之答。逕趨至前。兩手撼樹。頓折爲二。氣色依然。衆初以爲有意賣弄也。至是大悅。服爭相奉承。山曰。此何足奇。男兒不於人世間建設大事業。空負昂藏七尺。羞乎不羞。徒以血氣之勇。驕人更非所願也。言已。掉頭而。某村有痞棍曰盧九香。橫行鄉里。目無法紀。精拳術。號萬人敵。遠近畏之如虎。愚夫愚婦且稱爲盧天王。童子夜泣。其母震嚇之曰。盧天王來矣。泣立止。身不期而顫動。其威名有如此者。性漁色。良家婦女被其姦污。指不勝屈。又與衙署胥吏差役通氣。苟控之官。非惟不得直。且由是受辱。穿其或不利於生命。以是皆箝口結舌。噤若寒蟬。而盧之暴戾益甚。魚販汪雲。長不滿五尺。鄰右以汪矮子呼之。賦性懦怯。不與人爭。師德之唾面。自乾。韓信之胯下。受辱。汪雖窶人。頗得其風焉。妻錢小妹。姿首之佳。一村無其儔。淫蕩尤甚。輒自怨曰。天公不公平。巧婦偏伴拙夫眠。如奴者。已身受之矣。言次。

蛾眉雙鎖很毒之心已起若必欲與汪決裂無可須臾忍者汪偶聞其聲觀其形亦惟裝癡做聾緘默無言性使然也盧垂涎小妹非伊朝夕小妹憚於盧之財勢平日又不慊於本夫遂通焉久之明目張膽儼同夫婦汪無如何也一日盧以木棍擊汪並令不得再來違則生命將不保汪忿無所洩投河圖盡山酩酊而過躍入水中救之以起問其故泣不能仰固問之始其實以告山髮指眦裂憤不能平大聲謂汪曰盧天王手段究竟如何高強余誓必與之一角汝毋恐爲余作前導汪不敢不從引之至家小妹與盧正續舊歡笑聲聞於戶外山不能耐破扉入盧知有異起與搏山扼其吭氣閉而倒以足蹴之血自口出命汪持菜刀來割去其首小妹斃棘入床下哀求免死山笑謂汪曰淫蕩婦不屑污余刃竄之可也殺人者宋山當自首無與汝事遂詣官詳述前事縣令華世陽治績炳然民皆歌德頗直山惟格於律例殺人者死不得已姑下諸獄案故懸不決而密以酒食饗山山嘗嘆曰不圖今日尙有賢父母苟盡如若個好官天下何患不太平言聞於令令曰此非尋常殺人犯古之所謂俠者也會令以事去官而山遂以越獄聞蓋山昔日所以甘受縲紲之苦者亦正所以報令使不受累耳某年行旅遭盜劫者凡數百起偶獲盜夥問之曰爲首者宋山也發兵募勇以緝之終不得獲大吏憂之計無所出適華令因某督力保來署臬司缺卽以緝拿大盜宋山一事責之華陽許之而陰不爲動彼回以俠視宋山者也後因上峯催索甚急華乃以投誠効力之說進幸蒙采納而山欣然至見華卽拜并以私蓄分給徒衆遣散之閱數年平定土匪有功接都司職漸升至總兵與華竟成兒女親家焉年九十餘而卒至今河南汜水縣有所謂宋莊者聞係山晚年隱居之所云

楚二鬍子

長恨子

予幼時附學於無錫趙心田表叔處。有同學楚善寶者。少予數年。伊祖楚二鬍子。逸其名。以於思燒頰。頰頤皆滿。鄉人故以楚二鬍子稱之。時年已七十餘。鬚髮盡白。而顏色紅白如嬰兒。精神矍鑠。飲食兼人。滿頭白髮。鬚惟顙門寸餘。童童不生一莖。雖嚴寒冰雪。未嘗見其戴帽。而顙間膏騰騰。有蒸氣。御一半臂。裏外皆皮質。硬不類裝棉而成者。蓋其中以沙粒代棉。重二十餘斤。可避刀劍。腰繫一帶。非皮革。不知何物。以手勒之。卽硬直如棍。以代器械。此二者終年不。身予常隨善寶至其家。見楚之臥室中。不設床榻。亦無椅案。室如懸磐。惟平繫一繩於梁際。粗如指。予怪而詢之。知繩卽爲楚二鬍子之臥榻也。云楚每晚必運上二小時。運畢卽躍臥繩上。盛夏不施臥具。至五更天尙未明。卽起運工。數小時方出。數十年如一日。終身未娶。善寶之父爲山東濟產。本孟姓。在太平天國時。楚在鄭國瑞帳下。充先行官。勇冠全軍。每戰必陷陣。敵盡披靡。洪軍中稱爲飛虎將軍。爲之諺曰。不怕江北十八王。須避妖中飛虎將。洪軍稱清軍爲妖。每遇楚陣時。洪軍皆望風而遁。鄭之戰功。多得楚力。鄭旣倚重楚。楚亦始終無二。治洪氏敗後。積功至統領。先是楚率兵與忠王李秀成戰。大破之。獲孟。時孟年方十三。父亦前清一武職。父母兄弟一門均爲洪軍所害。子然一身。忠王李秀成喜其韶秀。留爲侍從。使侍左右。楚獲孟。悉孟家世。并其遇禍之狀。惻然憫之。卽撫爲己子。挈之歸家。爲之娶妻生子。卽善寶也。楚以孟爲子後。甚愛之。孟亦感楚之拯己。視楚若父。能承顙志。定省不缺。生二子。長善寶。使從楚姓。繼楚後。次子仍使姓孟。繼孟氏血食。楚亦以其不忘本也。聽之。孟以楚蔭。在河南

候補應差數年。以親老歸養。楚亦厭於仕途。出資使孟在鄉開一染坊。以樂晚年。楚兼爲人治瘍傷發背。無名腫毒跌打損傷等症。遠近數十里。均造就醫。不索醫金藥資。亦不施刀針藥物。第使人袒露患處。楚舉右手。運工離膚三寸餘。作按摩勢。始則瘡肉漸見。閃動繼則瘡漸平。紅漸退。紅退盡而患亦全愈矣。夫外症癰腫。多因血脈流注不行。以致愈聚愈多。發成諸症。楚運內工按摩之。使血脈流行。而腫自消矣。治愈者數十里。內口碑載道。予常至其家。觀其爲人治腫按摩。百試不爽。然未嘗一見其技術。一日予師趙心田及楚之至友數人。相約堅請一觀其技。請至再四。楚方使家人治一筵。大小二十餘碗。滿盛湯漿。置一巨案。中楚搯其右手衣袖。伸食指與拇指二指執案一角。案卽離地尺餘。周行廳事十餘匝。案略不欹。側湯漿亦絕不傾。楚面色如常人。皆驚服。有惠泉山者在無錫西門外。每年三八月間。有神會戲劇江湖鬻技種種均集。數百里內游人畢至。山徑如市。人必摩肩疊背而行。楚亦挈孫二人至惠山觀會。予人叢往來游觀。及會至。觀者千萬人。擠擁而至。勢如倒峽。扶老携幼者。盡爲冲散。楚恐二孫失去。卽作坐馬勢。將二手作圍。使二孫立其中。人如潮湧。雖有力者亦不能立定。楚圍二孫。竟兀立經二時許。未嘗少動。不啻中流之砥柱。泊會過人散。方挈孫而歸。見者咸爲咋舌。驚爲神人。然楚之額角亦微津津作液狀矣。夫千萬人擁擠之場。縱銅牆鐵柱亦不難擠仆。而况一人之力。抵千萬人擁擠之勢。非有數千斤之力量。不克臻此也。蓋其技擊內外工夫。不待言而可見。其已臻上乘矣。後聞其易簣時。氣不得絕者月餘。周身骨節。歷浴作嚮。以其工夫未脫氣。不得散奄。臥如死者。月餘骨節方脫。氣方絕也。

楚二鬍子二

闕名

楚二鬍子無錫北鄉人。習術於江南某鏢客。三年術成。恆爲客商保衛輜重。往來於齊楚燕趙間。蓋保鏢懸旗幟爲標識。綠林客見之。縱垂涎勿與較。楚二鬍子自以爲能。携旗幟勿懸。一日爲客商保二萬金由京至蘇。道出山左。投宿逆旅店。主人以客滿辭。謂有小廂容一客。如可聯牀。請攜行李來。楚領之。曲折達一室。室小於斗。置兩榻。一榻有老者趺坐。年七十許。寒暄中。知老人實販棗者。時已薄暮。店主人入室。餉客晚餐。餐畢。攜燭一茶壺。一置榻前小桌。闔門逕去。楚與客談次甚歡。幾忘寢。天寒。楚已禦裘。忽覺溫暖。以爲室小無風。且近燭。不之怪。一更許。室益煖。以手捫壁。如沸。燭油倒瀉。如注。楚不懼。目炯炯視老者。老者輒然曰。君有何能。敢攜二萬金長驅來此。此乃著名黑店。來此無或免。君亦知四壁皆鐵鑄。上有椽木質者。三能從此出。則得生。余枕函中。尚有黃金三千兩。籌已熟。君毋慮。雖然。君果何能。楚曰。實無所能。惟有湖縐束腰一條。捋之堅逾棍。老者曰。可矣。遂縱身騰起。及椽椽斷。身已置屋頂。楚急捋束腰授老者。老者挈之出。躍牆外。叩店門。店主人啓視之。固廂間客也。含笑延入。客抗禮啓舍三楹。安榻焉。黎明。楚與分道。道去。客亦不言姓氏。楚歸不復保鏢。以傷科著。至今其子若孫。猶世守其業。勿替云。

賣瓜人

廣老

清初羊城。忽然來一人。虬鬚虎頭。容貌岸然。口操吳音。於東門外僦地植園。種瓜甚美。有五色者。尤特殊。肉瑩如玉。味甘而香。說者以爲卽古之邵平瓜。時人爭嗜之。然所產不多。供不給求。凡欲購瓜者。必完瓜價而

後可得其鬻瓜之價值低昂不等。儒士購之其值較官吏爲廉。若滿人購之往往託言未熟或已鬻罄終莫之與其得嘗滋味者多用攘竊之技賄人代已給取之直接者無有也。人以是疑然某自鬻瓜外園扉晝閉謝絕交遊持鋤汲水外無他動作人終莫窺底蘊久之有一人常與往來成爲莫逆交則奇貧之屈生也暇則揆金入城與之縱飲酒樓中酒酣放歌拊髀爲節互相唱和激昂抗厲慷慨作燕趙悲聲歌已向北痛哭不止忽又仰天大笑連浮數大白互相勸酬直至頽然如泥始返樓中之客靡不瞠目駭視驚以爲狂當是時也某雖以美瓜名其姓名終無人知卽屈生與之久遊亦莫之知羣但呼之爲賣瓜人而已有新自江左者私謂人曰明季某大將麾下某君吳產也嘗屢敗清兵以饒勇名後彼主將殉國滿人震其名欲官之彼不屈棄家逃飄然不知所往此賣瓜人之貌甚似之意者其是乎是說互相傳遞稍稍聞人耳目人乃知其懷有隱痛也屈生聞之則大驚以告某某堅言已非是然是時滿人方屢興大獄終恐禍及於是以瓜園贈屈生乃束裝夜遁飄然不知所往生貧士也受某之瓜園足以仰事俯育衣食無所患乃日夕把卷琅琅讀園中作避世計不復他出人有過其園者聞其書聲樂甚不復作酒樓中慷慨燕趙歌矣

白太官一

江南長恨子

前清乾隆時吾常州東門外二里餘白家橋有白太官者係明末尙書白昂之後裔少年美丰姿面白皙而姣好精拳術得少林派而臻上乘兼習內工而內工中所謂壁虎勁八段錦者皆習之技勇聞於南北與建業甘鳳池齊名於一時常往來於青齊燕薊間年二十尙未授室一日爲人送鏢銀至燕行至山東濟南界

近黃河舍車就舟。將鏢旗弓劍捲置篷下。河闊十餘丈。水流甚急。舟過夏家莊。見河岸臨水。大樹槎枒。枝葉柔軟。隨風飄蕩。有一小兒年十一二歲。在柔枝上盤旋作耍。枝搖欲折。白危之呼曰。小子墮矣。水勢急甚。可懼也。小兒聞之。怒曰。余在此作耍。與若何干。呼余小子。若自居大人耶。將身一躍。已上船篷。奪鏢旗弓劍。一躍登岸。白大怒曰。小子不識抬舉。亦踊身上岸逐之。小兒行甚疾。白極足力追之。不能及。追之里餘。有溪圍一莊。卽夏家莊也。溪闊數丈。小兒已躍而過。入一竹籬莊門。白亦越溪而過。至竹籬莊門。有一老者鬚髮斑白。年逾半百。神氣俊逸。兩目炯炯。有光。迎門揖白曰。小兒何事。忤先生。先生如此相迫。耶。白道其顛末。並問姓氏。老者曰。老夫夏姓。字子平。適小兒係老夫次子。年十一矣。因拙荆溺愛。頑皮成性。老夫亦無如之何。亦問白姓名。曰。聞名久矣。卽遜白入草堂中坐定。白曰。令郎剽疾身手。絕佳。何不使之習武。亦可聞名於天下。夏曰。老夫久有此意。奈小兒不肯學習。且北省無有精於技者。白頗自負。謂夏曰。若肯割愛。可隨余學習。可也。夏微笑曰。唯唯。徐曰。先生如肯賜教。固甚佳。恐小兒不肯服教。奈何。正言間。小兒已將鏢旗弓劍置白前。曰。先生以小兒輕我。故相戲耳。無介意也。夏斥之去。小兒曰。姊言願與白先生一較技術。夏曰。小兒女有何本領。而敢與大名鼎鼎之白先生角技。多見其不知量也。言次。詢白問家世詳甚。知白尙未娶。謂曰。小女鳳珠。好習武事。年十八矣。誓非技勝己者不字也。今聞先生名傾南北。欲與先生一較。未識先生肯賜教否。白諾之。夏卽呼女出見。忽聞花脂香處。女郎已自屏後出矣。款步臨風。蛾眉鳳目。臉若芙蓉。裙下雙鈎。纖如菱角。豔麗殆無其匹。雖毛嬙西子。不是過也。白心醉神迷。恍如身入桃源。女郎輕啓櫻唇。嬌聲問白曰。蒙先生

不棄肯一賜教。顧先生喜文較乎武較乎。白問女曰：武較何如文較？又何如女郎曰：武較較拳術，文較較內工。顧先生何所適從？白思女郎嬌弱如此，不勝一擊。武較或恐傷之，即應之曰：文較可也。女郎使婢取一竿，粗不盈握而長十餘尺，中置檻上而空其兩端。謂白曰：余與先生各立竿之一端，下沉者撈竿，亦不許少曲。白自命有內工，固不慮竿曲。女郎請白先上，白曰：客不占主，請先之。女郎即將裙撩起，作蜻蜓點水勢，上竿之右端，將左足尖着竿，竿不傾仄，身輕如無物者，促白速上。白亦寬其外衣，緊束腰帶，作燕子穿簾式，騰上竿之左端，各運內工而爭勝。瞬息間，左端漸漸上指，右端漸漸下沉，竿不少曲。白勢將敗矣，女郎忽謂白曰：盍用勁乎？右端遂隨言上指，女郎下曰：白先生勝矣。蓋白與夏老問答時，女已在屏後。見白青年貌美，意已動，然尙未識其技，故以較技爲辭，意在擇婿。迨較技，見白技尙精，故有意讓白勝也。夏老大喜，即留白在家。爲之擇吉，贅白爲婿。白以鏢不可緩，躊躇不決。夏老曰：無已，使大舅代先生一行，何如？白恐有失，夏老笑出一短角小紅旗一面，示白曰：特此旗號，行遍天下，無人敢劫。吾鏢也。白遂留夏家莊贅焉。白與女合卺後，得女指點內工外工，遂具大進青齊燕薊之劇盜，均望旗而斂跡矣。後白送鏢數十年，未有失者。蓋夏女之力也。至今白氏已式微，其子孫猶能道其軼事者。

白太官二

江南長恨子

前清乾隆間，天下承平日久，清帝南巡，車駕所至，恣其逸樂，爲有清一代全盛之時。而宿衛之士亦皆精銳驍悍，無與比倫。貴家子弟閒暇無事，多習拳術，一時幾相尙成風。其宗派可分兩種：一爲少林，一則武當，而

精於少林拳術者。尤以僧居多數。常州東門外有白太官者。勇士也。一日偶散步至東城隅。見小教場中圍數百人。一僧年三十餘。其語音似係浙江溫州人。額高鼻聳。眼凹睛凸。滿額於思。身高六尺有餘。兩臂虬筋。環結方揮。拳旋舞迅疾如風。白太官雜衆中觀之。僧獻技畢拱手謂衆曰。小僧爲訪友來至貴地。聞貴地爲人才淵藪。不無技擊高手。小僧技疏獻醜。遺笑大方。疏漏處尙祈諸君相諒。倘有同道者。不妨入場一角。言甫畢。一人應聲躍入場中。言曰。禿驢。藐視吾常無人耶。衆視之。卽某紳子某甲也。年二十餘。身體壯偉。習拳技數年。自以爲天下無敵。每恃力凌人。人懼其勢。無敢與較者。見僧獻技。已躍躍欲試。聞僧言。觸其所好。入場亦不作問答。舉拳作黑虎偷心勢。向僧胸前擊之。僧讓過。卽以餓虎攬羊式還擊。甲方避去。不意僧飛一腿。已中甲股。甲已顛仆。丈餘如中刀斧。家人扶挈而歸。繼甲而敗者十數人。僧揚揚有自得之色。笑謂衆曰。諸君有能者。請入場一角。否則可不必自取損傷也。衆無敢應者。僧又曰。拳技已經呈醜。諒無有再與小僧角者。更獻內工。以博諸君一粲。隨將籐斗一具。重不及二斤。高尺許。底尖口平。示衆曰。小僧跌坐斗中。有能將斗撼動者。小僧甘拜下風。言畢。踴身一躍。高丈許。及下已跌坐斗中。不偏不倚。合掌垂目。作老僧入定狀。有年少有力好事者數人。極力撼之。不少動。白始聞僧言甚誇。心已不悅。見其眩內工。合掌跌坐斗中。衆人撼之。如蜻蜓之撼大柱。遂越衆而前。舉拳一擊。僧與斗已跌出三十餘尺。僧紅漲於頰。大慚。遂收拾場面。謂白曰。請問檀越居趾。三年後再當拜賜也。白舉告之。僧匆匆含怒而去。白誌其言候之。迨三年期。僧不至。白亦忘之矣。一日白正短衣赤足。在園中觀花。僧忽至。見白易裝。已不相識。問曰。白先生在家乎。白視之。卽三

年前教場鬪拳之僧也。知其必爲報復而來。詭曰：吾師至燕未回。僧曰：白先生何日可回？小僧在寓相待可也。白曰：吾師歸家無定期。或一年半年均不能定。僧蹙額曰：小僧自浙西而來。顧不得一見白先生。真如此無緣無已。小僧待之。見白先生方歸耳。白思僧報復之計甚決。不與一較。知僧亦決不肯已。不如以詭計折之。遂讓僧至客堂獻茶。階前有一大石。厚二尺許。長丈餘。白卽坐石上烹茶。將大竹代薪。以兩指捏之。竹碎如絲。茶熟。白僞作欠伸態。仰背於石。石卽隨白背而起。石與人如合爲一。僧大駭。問白曰：汝學於白先生幾年矣？白曰：已十年矣。內外工夫尙未臻。吾師十之一二也。僧嘆曰：已矣。徒技如此。白先生之技可知也。僧不敢望其項背哉。言畢興嗟辭去。後不再至。

白太官三

湯用中

太官爲人保鏢。翔游數省。未嘗有敵。一歲爲人領鏢至山西。入太行山。休於逆旅。忽一僧持帖來拜。自稱鐵肚佛。知綠林之魁也。白問來意。僧曰：耳君名久矣。將來較藝。今憑君先打三拳。如不能勝。車中物悉當見惠。白怒。擇要害處。盡力擊之。僧不少動。白大驚。僧笑曰：技止此乎。原銀勿動。明日當來取也。白終夜自思。不能成寢。忽憶師言。凡遇僧道。挺身出門者。必有絕人之技。惟能鍊氣。將人道縮入少腹者。不可輕敵。今僧猶纍然下垂。似尙可乘。次早僧驅健驃來。白迎之笑曰：吾師神勇。僕已敬佩。能再憑我一拳否？僧曰：可。蹲伏不動。白於數步外取勢。猛進。但聞僧狂叫一聲。兩腎丸已爲白抉置掌中矣。閱年餘。白在家閒坐。忽一女郎年二十許。闖然入。弓鞋縛褲。類北人裝束。問白某安。在白揣來意不善。問卿何人。欲見吾師。吾師爲人保鏢。去約

半年方得歸也。因留坐獻茶。適庭下有堅木數截。以指撮之。碎如刀削。烹茶以進。女曰。既汝師。他往我鐵肚佛弟子也。乞致聲。三年後當再奉訪。遂去。視所步處。入石三分許。如刀刻云。

白大癡

江南長恨子

白大癡者。常州東門外白家橋人也。大癡生於前清道光時。係白太官之孫。家傳武術。在襁褓中。卽以藥鍊洗其筋骨。四五歲。使習內工。迨長成。性甚愚鈍。不辨菽麥。以生長富貴之家。年二十餘。未諳世情。惟力如虓虎。筋骨如鐵。伸一臂。數十人不能屈。終日嬉嬉。憨態可掬。任人玩弄。而不知人。以其頑愚可欺也。故以白大癡呼之。真名轉失。吾鄉白家橋有二。有大白家橋。小白家橋之稱。以跨運河之橋。高而大者。爲大白家橋。旁大橋枝河。名鳳凰河。直通宜興太湖。跨一小橋。名小白家橋。一日。夏日。正鄉人在田插秧。白大癡挈僕一人。至小白家橋。乘涼。行至橋半。忽有大水牛二頭。爭觸奔逃。從橋上直冲而下。後有田夫數人。追之不及。橋仄僅容二牛。讓避不及。僕大驚。懼手足無措。面無人色。白大癡略不少讓。意態自如。人呼其速避。白如不聞。待牛及身。徐伸二手。將二牛之角。握住。牛極力排躍。不能脫。二牛力疲俱仆。白大癡手持二牛之角。力仆二牛。足步未曾少移。人皆咋舌。白大癡雖家傳武術。人咸知之。而未見其一試。今見其力。扼二牛。面色如常。不喘。不汗。如處無事。咸驚爲神勇。夫六畜中。惟牛身最巨而笨。而其力亦最大。一牛之力。不啻數百斤。白大癡以兩手而扼二牛。豈非天授神力乎。今其孫名大發者。雖無武力。猶能道其祖之軼事。予家門臨運糧官河。前清時。至春冬兩季。糧艘成幫。往來輸運。每一艘。上自艘長。下至纜夫。共有二三千人。或三四十艘。爲一幫。或

五六十艘爲一幫。甚有多至百餘艘爲一幫者。幫有大小。每一幫必有一長。糧艘所經碼頭。糧丁纜夫數十成羣。橫行街衢。人或觸之。卽遭毆辱。多方肆擾。以致閭閻不安。鷄犬不甯。鄉民側目。敢怒而不敢言。一日白大癡在臨河網魚。正直糧艘大幫行過。吾鄉臨河網魚者。遇糧艘過。必起網讓之。待糧艘過去。方再落網。白見糧艘在其網竿上直過。怒不起。網纜夫亦不止。兩不相讓。迨纜索及網竿。白將網繩一勒。纜索立斷。纜夫數十人。盡仆。纜夫大怒。呼艘上糧丁百餘人。均持木棍。繃板羣聚。將白攢毆。白運蝦蟆。動作坐馬勢。任其毆擊。至一時許。木棍繃板皆折。而白未少損。糧丁等正止毆喘息。白曰。汝等擊已足乎。遂兩手向兩旁一掠。糧丁纜夫百餘人。盡皆跌仆。艘長多精拳術。非能敵數十人。不能作艘長也。初艘長見糧丁等攢毆。白不動。手謂其已怯。今見衆人盡仆。知不敵。各艘長始各持械上岸與角。白見其來勢蜂擁。亦不介意。及離已較近。六七尺許。卽舉手左右指點。各艘長均棄械。木立不能少動。白曰。若輩狐假虎威。恃衆凌人。非重懲不可。今請若輩立此一載。與爾幫中作榜樣。遂徐徐收網而歸。艘主幫長詢知白家世勢。不能恃。無可如何。挽請鄉中董事。出爲調停。白始不允。艘主幫長叩頭服罪。白曰。無他。以後爾各幫糧艘過白家橋。不准纜繃。鳴鑼遇網魚者。須收纜。諾則還爾艘長。否則非吾所知也。艘主無奈。叩首遵依。并使艘主出資。立石河畔。永遠禁止。白卽至。每人後股以足踢之。各艘長始如釋縛。狼狽登艘。至今吾鄉無糧艘之騷擾者。白之力也。後白告人曰。糧幫猖獗。實甚吾鄉。受其摧抑者已久。特少懲之。爲吾鄉人士聊一伸其鬱氣耳。

異丐一

許宗傑

清末間我邑市上來一幼丐。骨瘦肉削。厥狀如猴。人因稱之爲小猴子。索錢不擾。人與之可不與之。亦不嘖兒童戲以磚石投。亦避之。不與較量。人亦無有奇之者。會市上又來江湖流丐數人。玩弄刀石。以此駭眩人。索錢以貫。不與卽以鏢中屋之樑上。滋擾不肯去。市中巨室無不累之。一日復至某當肆索錢。一如前狀。肆中不能如其願。晶形之鏢已躍至樑上。肆中人大駭。亟如數予之。又增其索不已。時幼丐在旁。見之卽叱曰。若丐而賊矣。安有乞錢而作此狀者耶。流丐聞言笑曰。孺子若欲一嘗拳味乎。速去毋擾。乃公事。幼丐不理。一躍上樑。捷如飛隼。拔鏢而下。輕若落葉。復搓鏢使屈。使直。柔能撓。指旣竟。擲向丐前。曰。斯區區物。值得駭人耶。速去。不則脊骨斷矣。流丐乃鼠竄去。而童丐亦往來鄉落間。不復至市云。

異丐一

闕名

丐者馬姓。逸其名。徐州人。年近四旬。流落淮安之阜甯縣。自云先世爲富室。後不戒於火。家遂中落。丐幼曾習書史。善音樂。其爲丐也。衣履整潔。不與凡丐同。而亦不與凡丐伍。入市求乞。不受飲食。但索錢。多不過十數文。少亦須五六文。再少弗受也。攜一竹籃。籃邊挂短。一。枝。籃內置酒壺。一酒杯。二筋。二均極清潔。又有三數品。侑酒之物。偶遇相知。必邀與共飲。飲畢。亦必索錢。而人亦無不樂與之者。每當山水勝遊。春秋佳日。輒弄笛高歌。至極得意處。愈覺聲情怨壯。嚮過行雲。雖工於度曲者。聞之亦復歎賞。不置。及其與人言論。則視其人爲何如人。卽與之言何如事。語多切中肯綮。處或謂之曰。以子之爲人。何所不可。而乃甘於爲丐耶。丐曰。嘻。子雖知我。而實不我知也。且食蛤蜊。可耳。丐遊於阜甯城市者七八年。後不知其所往。

異丐三

禹甸

異丐徐三。浙東人也。善捕蛇。並能醫蛇毒。遠近農人咸敬愛之。因此名雖爲丐。實則不丐。素有嗜好。當鴉片未禁之時。終日一榻橫臥。卽鶉衣百結。其意自若。時有金梅林者。性豁達。經商頗有積蓄。妻葉氏。生二子。長年十七。次十五。皆俊秀聰慧。同寓海上。年必歸鄞一次。與親朋故好。略敘闊懷。壬午春。歸家掃墓畢。令二子拜候外家。葉母欲留過宿。是日天晴月明。二人至晚膳後。決意欲歸。葉每知不能強。再三叮嚀始放行。蓋金葉二姓。相隔祇里許耳。次日滿村喧傳。謂二人同死途間。身無傷痕。而皮色藍黑。金聞言似未深信。以爲二子寄宿外家。此必傳訛。然姑往視之。不意果二子也。一擲幾絕。而葉母亦扶杖至。撫屍大哭。旁人百般勸解。始止。互相研究。終不得致死之原因。乃暫將二屍移置隙地。請名醫驗看。或謂中風。何以皮色藍黑。或謂服毒。然與葉母同食。何以彼仍無恙。紛紛議論。莫衷一是。時丐亦雜人叢中。有知之者。請其研察。丐微笑而言曰。何用研察。此乃中毒蛇之毒耳。以吾意度之。二人死處。其下必有毒蛇伏其中。言至此。卽有好事者。聳丐至原處察看。路下果有石疊小溝一道。農人用以通水。傍有毒蛇草一莖。衆始服其明。丐又曰。觀此蛇草。其蛇之毒必烈。大約數月始一出。鍊其毒氣。昨夜兩公子過此。必值蛇出。適俯而拾物。是以中毒。否則卽使過此。亦屬無妨。至二人同死。意必一人先仆。一人或扶持。或呼喚。當此之時。毒氣入人。正旺。傳染極速。是以一觸卽過。同罹其害耳。時金默念二子旣死。不能復生。而此蛇不除。後患無窮。以丐有捕蛇術。卽央求設法驅除。以福地方。並願出資相助。丐慨然承諾。惟曰。此蛇捕之匪易。必須一二年後始能下手。而所費亦須千金。

且此路兩面宜立牌告人。不可夜行。金一一允許。次日丐囊金入山。採取藥料。數十里內。遂不見丐之蹤跡矣。二年後。丐忽至。後隨五人。皆滿擔解蛇毒之野草。命村人抬一臼一缸。至小溝傍。將各草研碎。連汁儲於缸內。數日。草盡汁始滿。至晚。丐乃蹤身入缸。移時始出。草碎草汁。沾染一身。兩手復滿握草末。臥於路傍。以待蛇出。月餘。迄無影響。一夜。星月清明。溝內忽發亮光。蛇身畢現。目光似電。映照左右。丐大喜。急以草末裸蛇身。一躍擲於缸中。至天明。蛇已死浮水面。乃召村人而觀之。長祇尺許。身黃首紅。俗呼爲毒氣黃。從此人皆奇丐之術。自丐死後。此術雖有傳之者。終不能如丐之精云。

禹甸曰。徐三一乞丐也。竟亦有人崇拜者。以其有一絕技耳。而金某於喪子之際。能出資助其成功。爲地方造福。是亦難能可貴者也。

異丐四

佩蘭

某鎮一鄉市集也。鎮西有石橋。爲鄉人出入通道。某年月日。有過橋而病者。全體腫脹。不竟夕而亡。初猶不以爲意。詎知凡經是橋者。皆得腫病而卒。鄉人始知有異。遠立而觀之。見飛禽走獸。過是橋者。必墮水死。衆羣詫爲妖異。視爲畏途。莫敢過者。百步之內。不敢越雷池一步。近之。卽中毒死。橋畔人家。遷移一空。歷十餘年。喪人不知凡幾。禱禳驅遣。道士無法。佛力亦無靈。且有因之而致死者。釋道相戒。莫敢犯。鄉人無奈何。聽之。會有捕蛇丐來鄉。入境卽疑駭。將近橋。却步不進。詢鄉人曰。經是橋。有以病死者乎。鄉人曰。然。丐曰。怪道毒氣迷漫若此。居於此諒已多年。是處人死者。當不計其數。鄉人曰。然。詢以何怪。曰。此不過一種毒蛇耳。此

蛇不常有。生有翅能飛。不必噬人。人聞其毒。立斃。予生平捕蛇。此爲第二次遇見。其名竹葉青。長不逾尺。色與竹葉同。不殲除之。年久其毒更甚。恐斯間人無噍類矣。鄉人詢其能捕否。曰。何爲不能。然捕之亦大難。非得巨黃鰻蛇。不足以語此。鄉人許以重酬。丐請先付川資。往覓黃鰻蛇。鄉人慮其誑。猶豫不決。丐慨然曰。戀小利而忘大患。君等之謂也。丐雖貧。亦頗知義。不忍坐視生靈塗炭。終當捕之。惟多需時日耳。某紳察其誠。付以百金。丐受之。揚長去。約一月還。鄉人皆不信。某紳語人曰。丐而誠。則可爲地方除害。百金何吝。丐而詐。亦不過拋去百金。况予察其誠。故授之不疑也。屆期丐不至。久之仍杳然。鄉人於是疑丐詐。某紳亦無言。孰知一日丐竟至。肩荷巨囊。揖某紳。並告衆以爽約之由。蓋丐覓黃鰻蛇。久不得。卽有之。亦不足以當敵。後於荒山中覓得。卽肩上所荷者。鄉人始感其誠。款待之。甚殷。丐囑鄉人覓旱烟管數百枝。削之。收其烟油。得一缶。敷於身。殆遍。手臉亦厚塗之。削竹鞭二。長及丈。交叉作鉗狀。亦以烟油敷之。己則穿厚棉衣袴。鞋襪亦用厚棉製成。復以厚棉蒙其首。手。祇露目及指。然後荷黃鰻蛇往。囑鄉人遠避。鄉人遵其言。丐將近橋。出黃鰻蛇。竹葉青已飛至。踞黃鰻蛇項。黃鰻蛇被噬。不能脫。委於地。幾斃。丐見黃鰻蛇不敵。慌甚。揮竹鞭助之。鞭着竹葉青。竹葉青怒。鼓翅向丐飛來。其疾如矢。丐怖欲反。奔已不及。於時黃鰻蛇起立若植竿。乘竹葉青不備。出其後。疾噬其腦。同墮於地。鬪益力。丐以是獲免。自顧己身。覺漸腫。知毒氣盛。不可近。遠立眺望久之。見黃鰻蛇蜿蜒行動。不復鬪。知已告厥成功。出藥燃之。薰散毒氣。攜甕往。竹葉青已死。黃鰻蛇昂首吐舌。若迎其主人者。丐以竹鞭鉗竹葉青起。納之甕中。以黏土固封其口。仍盛黃鰻蛇於囊。招鄉人以細長竹竿擔甕。掘

士及丈埋之野。往觀者。中其餘毒。身猶臃腫。丐出藥末自服。並治鄉人。隔宿腫卽退。鄉人出巨金酬之。丐受謝而去。多年畏途。依舊爲康莊大道云。

跛道

佩蘭

蜀某生好奇。擅劍術。排難解紛。有俠義風。欲窮峨眉之異。攜劍獨往。日暮迷道。不得出。蹲坐巖上。枕肱待旦。虎嘯猿啼。夜景彌寂。倦欲眠。忽百步外燈光閃閃。從林隙射出。趨視之。一老道掌燈在洞口。見生來。訝甚。肅生入洞。深約數丈。頗清靜。生告以借宿意。老道首肯。道貌清癯。有逸氣。步履蹒跚若跛。出脫粟餉客。生謝之。叩其姓氏。笑而不答。但曰。客來深山間。獨不畏毒蟲猛獸乎。生傲然自負。拔肩上霜鋒。彈缺而談。誇劍術之玄妙。曰。何畏毒蟲猛獸哉。老道瑯髭微笑。生攘臂而起。揮劍作龍蛇舞。畢。老道攘劍在手。指甲輕彈。忽折爲二。就燈下視之。曰。此不過一俗物耳。殺鷄割豚則有餘。視爲異物則妄矣。貧道亦頗好此。藏有一劍。未識較客者何如。言時。從壁間出鏹劍一口。多年不用。已鏹滿龍鱗。怪道常作不平鳴也。生接視之。不見有異處。老道以削生劍。若并剪哀梨。柔嫩似塵土。回首向壁上擲去。劍沒餘柄。囑生拔之。不得出。老道輕輕抽出劍。映燈光。寒光四射。鏹花剝落殆盡。如新。經歷礪者。生驚異。曰。願受教。老道謂生曰。客自負能劍。今果何如。坐井觀天。何見之小也。生慚唯唯。老道續曰。客亦知三十年前。有橫行於蜀中之大盜乎。大盜名髯俠。貧道是也。當時自謂天下莫敵。可殺我一世橫行矣。官吏之來治蜀中者。皆不敢捋我虎鬚。有犯吾者。不得保其元。而還。當日威名。有如此者。一日盜於某縣境。縣令新至任。遣役緝捕。役不勝其苦。諷之。令大怒。追比尤嚴。我聞

之夜入其署。欲有所盜。以塞其口。合署鼾眠。莫有驚覺。至令臥室外。將撬窗而入。陡見黑影一閃。白刃已垂面前。急迎戰。一垂髻婢也。揮刃若漫天飛雪。不能敵。踰牆遁。仆於地。左足已斷。血涔涔下。藏身叢草間。猶聞婢冷笑曰。莽男子。多大本領。敢來試刃。却虧他兩足靈捷。竟被遁去。雖斷其一足。畢竟太覺便宜也。客試思以一昂藏丈夫。敗於一女子手。能不慚煞。始知天下固大有人在。如我區區者。詎足自豪。於是知盜之不可爲也。乃來此山中。懺我罪惡。不復問人間事矣。夏葛冬裘。忽已三十餘載。此間人跡罕至。不啻世外桃源。大足以養身心。客來大有緣。願以劍贈。然一言須記取。貧道之斷足。可爲殷鑒。生肅然願與游。老道不允。天明導生出。珍重而別。後數入山中。輒迷道不得往。生從此不復談劍術。預人事。恂恂然似好女子焉。

某少年

梅郎

某縣有徐三者。烟窟中之巨擘也。廣交游。喜結納。賃屋於縣署之側。凡縣役有芙蓉癖者。咸趨徐三。以是三勢日膨脹。羣無賴兄事之。無敢拂其意。三喜自奉。奢華埒富家。驟遇之。輒疑爲豪客。不知其爲烟室主人也。名捕邱七。與三尤莫逆。某夕。忽見一少年。自三臥室中出。面目姣好。衣服麗都。舉止雅類文人。無市僧氣。兩手之無名指。暨小指。各蓄長爪。長四五寸。七訝之。以詢三。三以甥對。七領之。而心竊疑。翼晚復往。以少年姓氏里居職業爲詢。言時頗露疑意。然三答無誤。少年已自隔室備聞其語。越數夕。夜半。縣署之上房。忽有巨聲。長官駭而號。集衆究詰。莫知所由。徧檢之。及庫。失寶二。他物無所損。羣斷爲竊。飭役力追之。期必得。七既奉命。細察室之上下及四隅。趨而出。叩徐三之門。直造少年臥榻。以手探其被。自首至足。捫之殆遍。温如也。

且熱甚。蒸蒸若欲汗。蓋時方嚴寒。苟夜起者。衣枕間必無溫。今少年則否。似久已沈睡者。七乃失望。不知所措。飭夥四出羅偵。已則日伺少年。後以冀有所得。少年殊不爲意。久之。少年辭三行。七亦順之。少年東亦東。少年西亦西。行止食宿。跬步不離。歷名城巨鎮二十餘。閱月四。七不少厭。一日。隨少年入一酒肆。隔桌面而坐。少年忽笑語之曰。若非邱七耶。何不憚跋涉。遠承相送。七聞言。惶愧不知所對。因哀之曰。我來此。實不敢爲君諒。亦非敢窺伺君。實以上命嚴歸。無以報。必死棒下。姑從君游。暫避此厄。然此數月中。我夥之血。濺於堂下者。當多於壺酒。偶焉思之。寸心如裂。君或垂憐。乞有以援。苟能使我消案者。我必棄捕業以謝君。少年曰。若何獨疑余。有由乎。七曰。我事捕務十餘年。閱人既多。遂有所得知君。且好身手。必此中巨擘。悔昔多言。致開罪於君。區區二寶不足邀君一盼。君此舉。特相戲以懲僕耳。我黨之譽。乃遂無膚。不得已。遠道相隨。望君或憐。少年曰。若既知之稔。不余捕而逡巡。何也。七曰。君技非我能敵。雖竭吾黨之力。或能致君。然無佐證。而君不承者。致君又奚益。且以君之貌。官必以爲誤。君亦有術。足以自脫。故不敢強。惟俟君命。少年曰。若欲余歸案耶。亦易耳。余今願以千金。易若兩目。若既得金。卽盲亦足自養。余往來南北。從未有疑余者。若眼殊毒。留之。必不利於我黨。然余亦雅不欲以此相強。若且自思能允我者。若卽函若夥。來伴若歸。余亦歸案。以成若功。否則請歸受棒。余殊不能相庇。七聞言。無如何。遂如少年約。因又請曰。君既夜起。返臥未久。而氣體之溫。乃溢牀褥。何也。少年笑曰。若稱老手。乃不知此。余之出也。先熱水於鍋。既歸。則浴而臥。故溫潤。乃爾。豈有他哉。七恍然悟。極歎其智。遂自出兩目。以易千金。既歸。械少年獻諸官。於己之盲。則誑以目疾對。三面南。

鞠少年。少年歷述無諱。問寶所在。則曰。在所跪磚下。發之。果然。乃下少年獄。而獎七。七辭焉。並請以目疾除其名。越三日。徐三盡室。行之者。咸謂是畏罪故。又二日。獄官乃大驚擾。羣捕又四出。蓋彼少年者。已不翼飛去矣。

黃氏子 王季明

橋西亭長

邑黃氏子。年十二三。傭於其戚藥肆中。一日忽亡去。初以爲其歸也。既十餘日。詢其家。始覺。於是遍尋村墟。間未獲。肆有林氏子者。亦年幼傭肆中。初黃子未亡也。與林子甚相得。同寢臥。輒傾談終夜。語細不及聞。至是黃子亡。肆主疑之。詰林子曰。汝與黃子情好甚篤。嘗傾吐終夜。今黃子亡。汝必知其故。卽不然。素所談者。亦何事。林子曰。彼亡。予不得知。然彼常與予道禪理。言人世一切皆苦惱。欲解脫。惟出家皈依佛門。予意亦厭世。贊其說。故談洽耳。肆主遂告其父。其父乃使長子訪之。左近僧寺中。不遇。乃決訪之。羅浮。途經鐵場。鐵場有明月寺。亦入訪問。比出寺。行數武。見山隈間一僧踉蹌來。小僮肩行李隨之。酷類弟。趨視之。果弟。乃握其手泣曰。弟何苦必自棄。若是。黃子亦泣。但無言。相攜入明月寺稍憩。更問之。答曰。弟默察世界中。無一非是。苦趣。故撒手遠去耳。兄曰。父母望汝急。自弟出。焦灼欲死。宜速回。無萌妄念。慰老親。旣而僧曰。汝來時言無所歸。今乃有父母。吾何敢度汝爲弟子。亦速之歸。乃隨兄返。十年。父母沒。卒入山爲僧。王季明不知何許人。傭於滬爲爨工。有暇輒就灶前讀韓非子。時甲午臺灣之役。中國新挫敗。王則嘗語人曰。中國必變政。否則必殆。聞者多目笑。儂薄者更揶揄之。曰。灶下奴亦讀古書。談新法耶。王怡然。仍讀韓非子如故。後他去不

知所終。予幼時嘗見其爲人作箋頭書。殊秀健。似文士手筆也。著者曰。奇哉黃氏子。僅十餘歲。身未嘗習世故。乃悟世界皆苦趣。豈所謂有夙慧者耶。王季明殆奇譎瑰瑋之士。自隱韜晦者也。

二絕技者

生入

已亥。陝西匯票莊解銀二十萬往北京。用健驃馱運。延鑣客二十餘人護送。出潼關。至靈寶縣界。山硤叢林。日纔西斜。已無行迹。知有異。探之。有盜數十據山口。鑣師止銀馱且住。前引與語。願以二百金相贈。盜不許。遂與角技。盜殊不弱。互有殺傷。頃之。又有盜騎從後至。驅驃二十餘頭。納五萬金。呼嘯竟去。前盜亦挾屍橫馬上去如飛。鑣客跟追。中鎗者又一人。不得已勒馬回。且保其後馱。抵站再作計議。忽後面塵起。有客車續至。車夫范姓。名金勝。與一鑣客相識。詢其由。衆告之。范曰。然則將奈何。曰。將一面報官。一面往追。范曰。能保珠還耶。曰。不能。范曰。若是何必費周折。誤行程。衆聆范言。意車中人負絕技。可相助。遽問曰。上坐者爲誰。范曰。客也。毋相驚。吾且問盜何狀。衆曰。腰間束紫銅帶。闊有三指許。范曰。是矣。吾爲諸君效此一臂。言次。已抵鎮市。車馬安頓訖。衆始知范非常人。請指示。范曰。盜去已遠。速加駿足。能從者從。遠隨吾後。聞吾呼則前。否則止。勿聞。毋使盜有所備也。衆應命。范不持寸鐵。從車尾取一皮鞭。出柄僅尺餘。鞭長丈有奇。粗如棍。瘦削而下。至端纔如指。盤結納於懷。回顧車上客曰。客先飯。弗相候也。客舌橋不能下。挽之。范絕踞挾從者。揚塵絕馳。去行二十里。天昏黑。見道旁隱隱有兩騎。叱范下馬。問何人。范覺其腰有銅帶。知係盜之後探。答曰。某營之送公文者。盜曰。公文何在。范於懷中抽鞭突擊。鞭束盜頸。奮力曳之。而盜首隕地。一盜不及瞬。亦着鞭。

倒。范奪其刀擬之曰。速告余。今夜口號。盜哀求乞命。亦斬之。脫其衣帶。裝束如盜狀。收鞭復前。星光滿天。微茫辨路。遙聞前渡人馬聲。知已追及。盜已遠放口號。范應之。再問。再應之。盜乃不疑。范低聲曰。後有追騎。盜皆愕問。范出不意。揮鞭縱橫亂擊。疾如風。盜紛紛墮馬。范呼曰。前前後後騎。馳驟而至。盜盡披靡。范止勿追。祇驅騾尋大道返。抵店時。漏已三下。數之不失一獸。衆皆拜謝。煮酒延之上坐。相問曰。君懷奇異。而甘墮落風塵者。爲何。范歛歔。不肯言。堅叩之。始慘然曰。吾曹州人也。吾父君叔同業保鑣。而皆死於盜。兄弟六人。誓報此仇。殺盜奚止百數。而死於盜者。又二。餘者志不少衰。有來告者。必出相助。衆曰。何如効力朝廷。藉伸厥志。范笑曰。一官奚足數。吾前隨嵩武軍。出關平回亂。官都司歸充哨長。而軍伍中。半係盜匪。耳目不爲我用。汛地有限。每不快吾意。壯年棄官還鄉。家道中落。而業此賤商。然徒手奔走。一身外無長物。爲累也。衆俱驚歎。飲畢。呼湯濯足。燃炬視所奪盜馬。贊曰。好馬好馬。入室臥炕上。須臾。鼾聲作矣。明晨。銀號商奉四百金爲壽。堅辭不受。商曰。君不受。予歸何以見店主乎。范乃受之。鑣師欲殮其死者。留二日。范亦留。事畢。乃同行至新鄉分道。拱手向衆曰。後會有期。揚鞭驅車。轆轤望大梁道上去矣。

山西平陸縣。有巨盜劫富室。殺傷事主。踰月。獲盜解省審訊。供不諱。論斬。而梟首於平陸。平陸距省千餘里。守備廖某押解盜首出省。廖負拳術。善超距。曾充毅軍材官。頗自負。途中恃無恐。行至平遙。遇鑣師五六人。由京護餉回秦。內二人引廖爲同鄉。情甚暱。其一姓卞。名雲西。年老而無鬚。鬚蒼白。辮聯假髮。粗盈握。盤於頂。而裹以帕。大於笠。鞋尖包鐵葉。手持烟桿。長二尺。巨如杯口。捫之。鐵也。廖以此乃鑣客常態。未之奇。將抵

趙城。雲西忽謂廖曰。君知近日之危乎。廖愕然曰。不知也。曰。盜首確洪洞人。其黨沿途伺伏。將劫首級以葬。徒以有我輩在。未敢造次。君不信。明晨盍於牆外驗之。迨驗之。果有迹。廖年少。殊勇往。曰。今夜當俟其至。雲西曰。盜能且衆。君非其敵。來日行至趙城洪洞之交。必不能免。承君錯愛。重以鄉情。豈敢作壁上觀。事已至此。請效臂指。廖叩謝曰。雖然。長者爲客。寇至。余當前驅。雲西曰。若是則事當敗。君但知戰陣之事。砲火相見。無奇可用。未知短刃相接。其機間不容髮。一轉瞬間。敵乘我之瑕。而鎗機發矣。君第安睡。毋掣我肘。廖唯唯。次日。晚抵豐店。亂山凶惡。四面盜窟。店主亦猙獰可畏。廖惴惴。匿盜首於密室。衆鏢客先寢。雲西就地設席。門窗盡啓。剪燈吸阿芙蓉膏。鐵烟桿在其旁。腰間出鐵錢二三十枚。大逾銅元。中厚分許。置於燈下。頻頻合眼。似倦極打微狀。夜半。店主與人喧嚷。漸至格鬥。大聲呼救。衆鏢客齊起。置不理。屏息伏於戶內。雲西息燈。橫臥如前。時月弦初上。微見人影。廖伸首注視。突見雲西奮臂飛一錢出。俄又連飛兩錢。牆外訇然。火光迸裂。雲西聳身起。捷如飛鳥。鏢客二人隨之。旋聞牆土簌簌下落。牆外有聲甚厲。久之寂然。雲西入欲臥。東方微明。推廖急起。曰。險哉。老夫幾遭不測。當店主呼救時。吾料賊徒必乘間而登。賊登者。吾以錢傷其目。其次手短鎗踵至。吾急以一錢傷其手。一錢傷其目。手鐵落地而機震發。其三吾以桿擊其腦而顛。不死亦重傷矣。遣同伴搗廖踰牆。迹之血點狼藉。草中熒熒然。拾視之。乃鐵錢也。血跡猶殷。雲西乃曰。店主人爲虎作倀。罪在不赦。今且殺却此獠。鏢客領命。大索店中。店主不知何往。乃赴洪洞縣報明。派差迎接。縣主張小霞。吾吳丹徒人。好奇士也。出郭親迎。延廖及衆鏢客入署。飲以酒。酒半。強雲西試技。雲西命以生牛皮釘於木板。

畫人形眉目畢具。相距三丈有奇。取腰間鐵錢連環飛去。各中一目。近視之。鐵錢穿牛皮深入木。露其半。儲夫不能拔。雲西略搖動。應手而落。喟然曰。老邁之年。兼犯嗜好。無能爲矣。衆俱咋舌。飲畢。張奉二百金出。鑿請勿却。曰。廖君蒞敝邑。設有不幸。吾獲重咎。不則與廖君二人同受嚴譴。微君豈有今日。此區區者。曷足言報。廖亦力勸。雲西始受。自此與廖跬步不離。直送至平陸。珍重而別。廖率勇役。不敢過洪洞。迂道還太原。涇陽商人李姓。由晉返秦。至滿洲。遇陝西臬司赴任。李隨其騶從西行。渡河。落後。腰攜二十金。徒步急迫。日將西沈。失道。覺背後履聲緊蹶。凡急足行程。例無返顧。返顧者。謂非江湖老客。嘗爲宵小所乘。李心怯。不得已。返顧。乃一大漢。短褐草履。足纏白布。狀貌雄悍。一望而知爲豪客。驚駭不覺屈膝。曰。孤身就道。腰纏不充。謹解以獻。大漢笑曰。驗汝履塵。不過二十金。不值一顧。此去某莊不遠。莊主明日嫁女。予將往探。正無伴侶。觀汝脚程頗捷。盍隨我來。必無相累。促之行。抵莊。碉寨森嚴。置李於堡外大樹下。指曰。坐。慎勿聲。自聳身一躍入牆。須臾躍而出。手一筐。有餅有肴。曰。飽啖乃可行。復躍而入。挾箱籠出。再入。復然。如是者數次。猶不已。李忽聞牆內驚呼聲。大漢已出。手巨索。曰。事已敗。以巨索繫兩箱夾於肩。命李肩其一。以從趨僻徑。天昏黑。行二里。碉樓號炮發。後面人聲鼎沸。莊門大開。火把照耀如白晝。李顛蹶不能步。大漢擊李起。加於左肩。身纍纍行如飛。追騎四散。尋將至。道傍有新坑。大漢投箱籠於內。而匿李於荆棘中。解衣背抽雙刀。白如霜。返趨數十武以伏。遙聞追騎聚語曰。適見此路有人影。何遂不見。嗣又分路巡探。有兩騎行近。大漢突起。揮刀顛二人。牽其兩騎至坑邊。掖李出。載以一騎。一騎負重物。自徒步爲殿。馳六十里。抵華陰廟。天未明。止謂李

曰。臬司今午過此。汝第坐候。銀一錠。爲汝壓驚。李不敢受。大漢擲銀於地。挾兩騎絕塵東去。李戰慄無人色。投客店。頽然倒。向午臬司輜重至。出迎。衆睹其狀。爲述顛末。歸病數月方瘥。

作者曰。范塵。土寇。冕。愚孝成性。志行卓卓。可風。卞甘。老風塵。見義勇爲。其亦古崑崙之流。亞天下。何嘗無英雄哉。若大漢者。身懷絕技。甯爲雞鳴狗盜之雄。品類不齊。而異人處則一。昔魏叔子傳大鎮椎。歎奇傑不偶。吾於此三人亦云。

吳生

羅章士

吳生。贛西某城人。幼學於塾。塾外有石馬。城人相傳石馬爲離城百餘里某山廟中物。一夜。塾師某叟見有馬奔。叱之。馬不動。及明。遂成石馬。吳生好嬉。每背師坐馬上。叱咤羣兒。羣兒欲奪其座。則互鬥。吳生健甚。羣兒每敗。久之。吳生能立馬上作各戲。一日爲師所見。師怒之。吳生恨甚。乃聚羣兒議曰。石馬重不過五六百斤。鄉人不敢動之者。謂馬靈。懼災禍耳。今吾儕日與馬嬉。馬不啻吾儕好友。移之。馬必不怒。且吾儕具好身手。謂不能移五六百斤物耶。衆兒譁應。乃於散塾後。俟師鍵門已。共舁石馬當塾門。笑謂師龍鍾。行尙恃杖。明日門開不得出。將喘呼我輩助也。次晨羣兒起絕早。俟於塾門。果聞師足聲漸漸。至有頃而拔關矣。羣兒咸笑。繼愕退。則見師徐徐啓門。以兩手舉石馬足。仍置之原置處。顧羣兒曰。若儕不勤讀。但知惡作劇。擅移石馬。不懼鄉父老責耶。又指吳生曰。必爾所爲。吳生跪陳乞恕。師掖之起。入室。謂吳生曰。若謂我文弱叟耶。少年時亦曾馳騁疆場。數奇不得用。今將就木。願盡吾能授爾。吳生悅甚。叟尤精蛇矛。吳生傳其祕。藝成。師

死而世亂。洪軍騷擾各省。吳生家人奔散。恨洪軍。又憤官軍不武。乃不兩袒。據一山爲盜。控駿馬。仗蛇矛。稱綠林雄。有日得一女子。及一婢。吳生善慰之。女子泣曰。吾母行吾後。頃卽至。亦乞壯士恕之。吳生諾。久待不至。鞭馬下迎。女母爲一壯夫所困。吳生奪之歸。問母女將何往。曰。逃寇耳。吳生曰。世皆亂。逃將焉往。不如居此山。山中另有村。村人皆吾手拯者。可安居。勿懼。母女及婢皆拜。居村適甚。一日城中父老數百人來。跪山下曰。賊且至。乞念桑梓情。下山共守城。吳生辭。父老歸。復昇石馬。至山下曰。獨不念坐馬上。顧盼時乎。城中少年亦共陳曰。我等皆當日與君爭座者也。君盡師能。而不爲衆効力。其非師意歟。吳生乃謂衆曰。所以遲遲者。誠恐衆志不壹。不能終守。與其守而仍破。更多死傷。不如肉袒迎降。爲得衆呼曰。有不誓死守城者。衆共殲之。吳生曰。能如此乎。乃下山。以兵法部勒城人。賊至。吳生指揮登陴。賊冒矢石攻。城人皆殊死戰。吳生坐敵樓。矢及其面。仍坐不動。賊圍五日無功。大隊去已遠。乃倉皇解圍走。吳生視賊。轍亂旗靡。追之盡殺。賊城人歡呼。擁爲城宰。所拯女子名曼花。婢名彩霞。曼花美甚。城人欲吳生娶曼花。吳生曰。彼女我爲盜時所得。吾爲盜。非劫婦女者。今雖得諸父老言。然終非禮。城人以商女。母女曰。弱息無依。頗諸父老鼎力成之。母女感德無既。又造吳生所述志。吳生始允。婚有日矣。而吳生遇己家舊僕。謂吳生兄尙在。逃往燕京。被誣得罪。將戍遼東。速往京。猶及相見。吳生儼裝行。謂曼花曰。好待我。曼花曰。早歸。城人止之不得。吳生及京。兄已出戍。進及甯古塔。見兄冰窟中。兄抱吳生。泣不成聲而死。吳生囊骨南歸。遇馬賊。倉卒無兵器。拔樹代矛。馬賊駭奔。欽其勇。欲得之爲魁。圍而困之。吳生就擒。馬賊視其囊。見人骨。問之。以兄骨對。馬賊再拜吳生而

釋之。及抵贛。城已爲賊據。不得入。爲賊刦去。爲黨。歷數年。得守城職。乃入城。故老猶有存者。訪曼花不得。再拜問故老。故老流涕曰。自君去。賊黨大至。我等如君前守城者。守城而衆志不專。未半日卽破。曾入城。刦曼花。曼花大罵而死。死狀甚慘也。吳生大哭。故老乃覓曼花婢彩霞。得之農人家。已嫁矣。抱嬰兒見吳生。吳生長歎。繼發令盡誅部下賊。以城中居民守城。故老欲以彩霞侍吳生。吳生謝曰。彼有夫。有兒。父老。不爲名教計耶。故老見吳生鬱鬱。終令彩霞每月數見。吳生慰之。吳生每抱彩霞兒。視之泣。及會軍定贛。省境肅清。吳生謂城人曰。承平可望矣。世無須我。乃不問事。日騎石馬上。其舊友嘻笑圍之。作兒時態。吳生輒流涕。一日。城人見吳生坐石馬上。僵矣。蛇矛立其旁。疑自刎。然容色如生也。乃葬之。又爲立廟其處。曰。石馬將軍廟。今石馬及矛猶可見。廟後塑女像爲曼花。塑老嫗像爲彩霞。彩霞年五十餘。始卒。生前日日赴廟侍神。故城人亦列其像云。吾友遊其地者。目覩其狀如此。

古塔下客

羅韋士

某郡城外有古塔。約歷三四百年。咸豐時。曾有某文士者。以訪友來郡。友他出。獨登塔。倚鐵闌。闌鏽而折。文士顛折頸死。郡人哀之。立位祀之。塔中募資欲修塔。款不集。乃止。因鍵塔門。止遊人。閱多年。塔上遂爲狐狸。鼯鼯所宅。郡人居臨塔者。夜必聞塔中有啾啾聲甚繁。一歲。郡人忽譁傳塔中現怪異。謂塔上擲下狐及鼠之革無數。血腥猶溼。似新剝者。郡人疑異。有贊歎文士之鬼有靈者。或又疑有劍客之流。現居塔上。於是有武夫持刀戟。備火器。噪而登塔以搜之。致巔復下。無所見。但見碧血殷殷。髹塔內磚石如漆。武夫冀怪異懾。

威而遁。而搜後怪益恣肆。夜出擾人。鄰塔人家。輒覺有物行屋上。瓦瑟瑟響。壯男子伏暗陬伺之。瓦響立以銃射。火光中但見黑影颯然去。不能辨其爲何。一夜某家失一幼兒。次日兒骨現塔下。兒母奔至。抱骨於懷。號哭曰。兒孕三月而父死。今兒死。嗣絕矣。向郡人索鑰。啓塔門。登塔遍視。而塔空無物。氣象陰慘。晨入塔。過午。兒母不肯下。旁人齊聲勸。強之出塔。鍵塔門。兒母注視塔門。鐵鎖久久。以頭觸之。死塔下。聞其事者。無不隕涕。逾數日。有客自遠來。徘徊塔下。不去。人因語以近事。客索視。怪所棄革。笑曰。吾知之矣。吾視革上有齒痕。爪痕。則嚙者。必非鬼怪。及生人。又往來飄忽。而又善避。如此生物。其老猴乎。郡人奇客。羅跪乞除害。客曰。客明日攜鷹犬來。次日日晡。客偕鷹犬至。聚觀者數千人。犬伏塔下。鷹環塔飛。以激猴。怒久之。猴忽出。高三尺許。白髯披拂。領下。鷹下撲之。猴避。伸爪取鷹。鷹翔去。鳴空中。忽東去。合左鬪。但以右鬪飛。觀者咸謂鷹傷。惋惜不已。少頃。鷹自東來。猴出。鷹下。以右鬪擊猴。猴仍避。鷹展左鬪。中儲沙。沙落迷猴目。鷹爪之。猴墮地。狗奔進。嚙其吭。猴死。蓋鷹之東去者。往海濱取沙也。去時。即合左鬪者。詐爲傷。以愚猴也。觀者於是咸贊客鷹犬佳。客笑。向南去。觀者欲謝客。呼曰。客何往。盍少留。逐之。客忽不見。犬入草而沒。鷹翔入雲。觀者歎曰。客殆非人也。復募資修塔。衆踴躍輸助。工竣。立碑記其事於石。或言客爲文士之靈。感郡人相祀。顯異以報。或又疑爲郡鄰邑某劍俠云。

草庵和尚

闕名

海昌徐汝璉。多膂力。善技擊。常偕同人訪草庵和尚于太湖之濱。觀其狀貌雄偉。知非常人。與之論技藝。輒

心動不自知汗之下也。因詢曰：以子材藝，何混迹浮屠爲？豈有託而逃耶？和尚歎曰：余致此命也。曩者曾侍衛內廷，奉命隨將軍某征苗。一日大隊並進，突遇賊渠，余挺刃前鬥，未百合，賊窘棄騎走林，予窮力追之。灌木雜糅，兵器不及施，遂棄刃與搏。賊拳勇絕精，且拒且走，踰數十嶺，致一絕壁，扼其吭而擠之。彼亦猛掣，予肘拽入巨澗中。余乘勢出匕首刺之，梟其首。時予力已乏，躍出少憩，登山四望，亂雲雜沓，萬木蔽天，絕無人迹。其地去大軍蓋五十餘里矣。尋路歸，至軍中以首繳令而退。自以爲功，無出予右者。軍中知者潛告余曰：殲厥渠魁，功非不巨。然子殆矣。將軍謂子沒于軍，業具名申奏。子之功已爲人奪，不去懼禍及。予察之，信不敢復留。星夜出奔，自是恆棲息亂山草莽間，默念功高不賞，反致得禍，命也。遂倘佯方外，以終吾年。豈以浮屠可隱而致於是耶？汝璉請觀其藝。和尚曰：汝來亦不易，試觀之。遂見其兩互動，自身以上長者六七寸，請短之。自首以下，短亦如之。既定，攝衣下階，庭中有樹大十圍，手撼之，枝葉皆岌岌動。同人以材藝自負者，莫不橋舌木立，茫然若失。和尚曰：此運氣功也。若輩不足以語此。和尚之姓名不傳，以住草庵，故呼之爲草庵和尚云。夫天下非無奇特英偉之才，而恆致不遇。若和尚者，豈非特出凡衆者哉？何其材之奇而數奇耶？而能脫身遠害，其見幾之哲，爲尤不可及矣。乃功高見奪，姓氏莫傳，湮沒湖山榛莽間也。悲夫。

樵夫

野僧

潮之屬有鷓鴣村焉。村內山多田少，煙戶百家。居人大半以樵山從事。有一樵夫，年逾不惑，戴其姓，奎其名。戴琪之八代孫也。一家數口，住老屋三間，然家徒壁立，室如懸磬，窮則窮矣。而奎晏如也。日樵于山，採得

松幾幹。翠竹數竿。擔而買於市。得錢則易菜羹以歸。俯仰賴之。自己未嘗一飽。然君子困窮。終不怨天尤人。村人有憐之者。或給以錢。奎亦却不受。甘以蕭索自處。如是者不知其幾載矣。有一日早起。手刀頭笠。入山而樵。緣徑行。忘路之遠近。踏殘黃葉。穿破白雲。忽而水盡山窮。疑無去路。思探得薪藟幾束以歸。然此處山皆奇石。草木不生。徘徊良久。隔岸有童子招呼曰。子非樵者乎。此地不毛地也。入數里。便有材木。可斧斤矣。前途狹隘。循山側而往。便是樵夫從其言。向山側行。越里許。果然柳暗花明。又一村。樹林陰翳。禽聲上下。樵夫不覺樂而忘倦。復行至古岸。見有古木一株。以爲斫而得之。置於市。價必倍。抽刀伐其枝。乃一枝未斷。日遽沉西。四處寂然。回首家鄉。則見雲烟縹緲而已。時有老人。鬚長髮禿。羽衣翩跹。過岸前。揖樵者而言曰。日晡矣。子將焉往。聞子以樵爲生涯。今朝曾艾薪給食乎。樵夫曰。未也。老人復曰。日晡矣。子將焉往。請寄吾家。樵夫辭曰。家有親。未嘗遠離。今日出而樵。日入不返。得無貽老親之憂乎。且吾親儘日間。未嘗一粒。寄身翁家。於已固安然。吾何能爲心乎。老人曰。子毋慮。家人安適。此地何地。去子故鄉百里矣。不寄吾家。將殮風飲露乎。願子勿却。樵夫聞言。不得已。偕之往。一路但覺飄飄欲仙。俄頃輒至。土地平廣。屋舍儼然。老人攜之入室。室中設榻。一几。四素琴。一張。儒道佛書各二卷。堂上大書神仙界三字。樵夫異之。詢其所以。老人笑而不答。有頃。具茶來。禮貌甚恭。邀樵夫坐飲。繼而山肴野蔌。雜陳案上。遂共宴。宴畢矣。各入臥室。然樵夫心思家。夜不安眠。但聞風號雨急。雷聲隆隆。懼甚。老人忽前來曰。子勿怖。天將明矣。盍寐乎。言畢。卽去。老人去後。樵夫亦不覺入寐矣。睡熟間。夢遊仙界。忽爲物所觸。驚醒。醒後。東方旣白。身臥草野間。駭然曰。何爲其然也。起。

而視之。金銀燦爛。黃白交加。昨晚所見屋宇田園。悉爲黃金白壁所鋪。曰。怪哉。且驚且喜。四面熟視。見臥旁豎一巨碑。高丈餘。碑上大書十字。風骨蒼古。其文曰。貧窮宜守己。富貴在於天。樵夫覽後。便自語曰。吾生平頗能固窮。窮極而富來乎。現此金銀世界。可見天欲富吾矣。如是出其殘囊。拾得黃金幾何。白銀幾何。囊過半。曰。足矣。尋山而歸。及抵第舍。時既黃昏。家人見之。大喜。其母謂之曰。自爾別家。於茲一易寒暑矣。去年春。有童子負五十金來云。爾既賣身富翁家。爲人僕役。歸期靡定。此金可以養家。童既說此。母以爲然。倚閭倚門。未知何日得以母子歡會。不料爾今竟歸來。其樂也洩洩。話畢。樵夫曰。異矣。入山僅一夕耳。山中一夕。世遽一載乎。曰。昨入山。原是入山採薪。竟有人來。謂既賣身爲人僕乎。因出所得銀。奉其母。並將入山情形。一詳說。母曰。奇矣。爾入山時。所遇童子何若。莫非卽去春負金前來者乎。所遇老人何若。莫非卽童子謂爾賣身其家者乎。樵夫乃悟。村人聞有此事。咸來問訊。樵夫亦爲之詳說。由是聲動村鄰。名聞潮屬。咸相謂曰。昔日戴琪仕閩。清白爲善。必福子孫。今其後裔入山得金矣。黃君逸溪。潮人也。聞之詫異。親赴樵夫處。叩其迷津。後欣然就道往觀。則見其地。草色青青。巨碑尙存。而黃金白銀。悉歸無何有之鄉矣。嗣是往觀者甚衆。亦但見其地豎一巨碑而已。奇哉。奇哉。奎入山時。係清光緒初年。後作商於滇。病終。現其子孫住大廈二間。有田十餘畝。其長孫仍業商滇省。家資較前尤厚矣。野僧潮屬茶陽人也。因得聞見其事。特誌之以傳其奇。

黃力士

無聊

黃力士。衢州人。軀幹弱小。長不滿五尺。面赤赭。若嬰沉疴。然饒勇異常。膂力過人。牛仆道。七八健漢合力勿

能舉力士掖之。走若飛。縱身一躍。能越五丈澗。駢四指以削石。石立碎。一日褚王二村方械鬥。力士過之。揮手令且止。將以魯仲連自任。村人鄙夷之。奮力鬥如故。力士大怒。卽舒左手。摔王姓者一人。以擲羣。當者披靡。又舒右手。攫褚姓者一人。以擊諸王。踏而傷者四五輩。褚王二姓之鬥者。故不識力士。怒其蠻橫。合兵攻之。棍棒交下。如驟雨。呼聲搖撼山谷。時力士手無寸鐵。睹狀且笑且憤。急奮兩臂。左右擊。衆皆辟易。棍棒拋去數十步。然鬥移時。村人死傷逃亡略盡。力士乃執二姓族長。數之曰。鼠輩。爾乃棄所仇而仇吾耶。吾特來爲爾曹釋怨耳。爾識馬金黃某否。衆方知力士。頓大感悟。伏地求免死不已。力士諭勿復相仇。揚長竟去。自此力士威名震四方。每逢劇鬥。旁人和解之不得。則譁言力士至。鬥者便止。又或於械鬥前。預選一貌類力士者。使伏于暗陬。而相機突出。敵人見之。輒驚亂。往往因以致勝。嗚呼。若力士者。可謂大勇矣。

劉勝

胡樸庵

僧悟心者。武當山某寺方丈也。少曾習拳於少林。年已六十餘矣。精悍不減少壯。寺僧數百。無一不能拳。皆悟心所教也。山下有農家子。名劉勝。孔武有力。善飯無以爲生。叩寺門求方便。僧徒毆之。劉若不覺。駭而走告悟心。悟心問劉曰。爾何求。曰。欲飯耳。爾何能。曰。能造飯耳。爾力幾何。曰。不知能食飯幾何。曰。亦不知悟心笑之。命僧徒食之以飯。將盡二斗米也。飯後引致後面空場。有巨石二重。各八百斤。劉以手左右挾之。而舞殊從容也。性極蠢。授以拳法。茫然莫解。因置之香積櫛中。雖爲僧尙未自名。衆共呼爲老劉。頗輕視之。一日來掛單。僧衣履極敝。而神氣奕奕。衆僧徒時加白眼。或不具食。劉常私食之。悟心教僧徒武藝。掛單僧視之。

默不一語。或謂掛單僧曰：爾能乎？則謹謝曰：不能。習罷，悉歸食堂。掛單僧獨立空場，衆莫之顧。劉招掛單僧食。掛單僧謂劉曰：爾何不學拳？劉曰：不知也。掛單僧曰：我教爾可乎？於是教以手勢。劉吃吃作笑。夜半掛單僧引劉對坐。久之，劉忽悟曰：我知之矣。掛單僧盡教以奇正虛實之道。進退起伏之節。戒之曰：爾由此熟練，無敵於天下矣。彼悟心何足道哉！我習此技三十年，非僅未逢敵手，即求一能傳我之技者，亦不可得。爾力由天生，我故不能捨爾。非因爾飯，我殆授爾絕技也。爾善用之，我去矣。遂一躍而逝。劉每夜人靜，私自習之。衆僧莫知也。間二年，悟心集衆僧徒謂之曰：吾將往天台。衆僧中有能武藝超羣者，授以方丈之位。互相角逐，最後得一僧名超凡，悟心將以方丈授之矣。劉上前曰：稍遲，我尙未試也。衆共笑曰：老劉不過多力焉。能據此位，劉曰：毋小覷我。爾輩之拳不過外家之粗淺者耳。因解衣跳躍，悟心驚曰：爾何能此？此等拳法，我尙不如也。劉悉道掛單僧之傳授，遂爲某寺之方丈，改名天禪。衆皆服焉。從此武當山拳法頗與少林齊名云。

髻梢公

闕名

髻梢公，武昌之舟人也。莫知其姓名。以髻美故名焉。其時爲明代將亡未亡之際，獨操一舟往來吳楚間。湖北黃州府有陳大巖者，賃其舟至金陵。見其髻五綵長尺許，甚美。目光煜燿如炬，心竊怪之。及暮欲泊舟，而有水牛數頭浴於江邊，適當泊處。髻梢公以左右手各持一牛蹄擲岸上，如投魑魅，數擲而盡。舟遂泊。其舟之行止不擇地。每至荒洲孤嶼，繫牂柯焉。大巖患之。髻梢公笑曰：壯士行何畏也！大巖俄見舟尾帷幙內有女子，年可十七八，嫺雅似士族子，心益疑。一日曉起，遙望岸上有酒家幟，願謂髻梢公曰：能爲我沽酒乎？曰：

諾索百錢提盡而去。大巖起招女郎問曰：汝誰家子？何從髯居？髯何人也？試語我。女泣然曰：妾杭人也。從父自粵西歸，舟次湘潭，一家十人皆戕於盜。盜欲掠妾去，髯忽從他舟入，揮刀殺羣盜，盡殲之。妾叩頭請死。髯曰：吾非盜，爲汝殺盜耳。汝今無所依，盍暫居吾舟，當訪汝親戚而歸之。其無歸也，當爲汝擇佳婿。吾義不汚，汝勿怖也。於是妾遂從髯居此舟，而髯自獨宿篷上。風雨雷霆，無所避。所往來者四五人，相與登山入水，取虎蛟肉爲脯以佐酒。四五人切切私語，或笑或哭，不知所語云何。夜半或登高觀天象，歸舟輒大哭，取酒痛飲。飲醉復大哭，妾不知爲何人也。語至此，望見髯自酒家歸，女仍入帷幙中。髯持酒脯至，大巖迎拜曰：公異人也。吾俗眼安識公哉？遂與共飲。髯曰：萍水相逢，請留一言爲驗。君雖有文，然君之骨相必非科名中人。且今尙無子，大巖曰：科名有命，何敢妄求。但得一子，使祖宗血食不斬足矣。公異人，也能爲我畫策乎？髯沈吟久之，曰：吾舟一處，女有福，相請以妻君。此女當生丈夫子，五君不能任也。然猶可一子。今日良吉，吾爲君成之。卽呼女出，取酒合卺成禮。悉以前盜所劫金歸之。大巖旣婚，思歸，髯仍自送致九江縣。辭曰：天下將亂，君宜自愛，吾亦逝矣。大巖夫婦牽袂，竟留之，不可絕。袂去不知所之。大巖所娶舟中女，果生五男，前四子俱夭，惟季子存。

野史氏曰：髯何人哉？其古虬髯公之流亞歟？惜陳大巖碌碌無表見，不足以希李衛公也。當明之季，天下未嘗無英雄，顧其時不能用英雄，使英雄埋沒於山巔水涯間，而明之天下遂亡於胡奴之手，豈不悲哉！然如髯者，意趣非常，殆猶不屑爲人用也。

某道士

闕名

相傳揚州府學前一日來一道士戴木冠執麈尾。跌坐小蒲團。不言不笑。年約四十許。有好事者趨叩體。答不應。日晡不食。亦不去。市人咸奇之。或擲以一錢試之。道士以手拂麈尾。得丹藥一丸。奉其人。視其丹大。可如棗。晶瑩作絳色。異之。歸適舊疾痰喘大作。試以丹服之。逾時痰喘頓愈。益奇之。次日以之遍告市人。於是紛紛咸以一錢來乞。道士搖麈。即至。乞者實繁。有徒而丹藥亦源源不絕。乞者持歸。皆試以治疾。無不立效。越日乞者愈多。道士一一應付。不稍形支絀。積錢纍纍。環左右前後。皆阿堵物。道士忽覩人羣中一人。謂之曰。爾孝子也。得毋虞甘旨。或闕而不能養親乎。手掏錢盈握。贈與之。又指一人曰。爾母病初愈。匱調養。貲良可憫。即亦握錢盈把。以贈。贈已左右。顧謂某家有婚事。貧道宜助之。或謂某家有喪事。貧道宜資之。或以饑寒。或以窘迫。咸有所遺。或一千。或數百。少亦至數十不等。殊無所吝。詢諸得錢之人。其家中事。皆如道士所言。頃刻錢盡。而乞丹者愈多。錢復旋集。一刹那間。市人哄傳。疑仙疑神。觀者途爲之塞。忽人叢中有二健者。挺身喝而出。衆視之。江都縣署公差也。差謂道士曰。爾何方人妖。輒敢左道惑衆。借術騙錢乎。官府刻正。訪拿此輩。爾亦有所聞否。道士笑曰。貧道賣藥治病。一片婆心。獲錢雖多。然皆藥值。但既辱公等惠臨。則杯茶之菲。自當謁誠奉獻。至文錢四寶。皆須救濟良民。貧道既不敢妄言享用。亦不敢隨意濫給。恕不相贈。幸毋疵予。暗乎人情也。言已。探手至袖中。託茶杯出色。澄澄然如潭水。中浮紅棗二枚。而熱氣縷縷。如洞口雲。一似出廚下者。持以奉差甲。又探出一杯。以奉差乙。二差相顧錯愕。咸不敢飲。囁嚅言曰。余等之來。以公事。

豈爲飲嗽者乎。道士笑曰：公等雖不飲茶，貧道之心已盡，乞賜還。何如？差仍授之。道士手接之，一一納諸袖。徐徐言曰：不飲吾茶，豈欲吾錢乎？吾錢祇能濟世利人，豈能以飽豺虎慾壑耶？因拂袖起，掬地上錢，擲空際。諸人仰視，則皆化爲莊生之蝶，隨擲隨化，轉瞬錢盡，而蝴蝶之翩翩者方且襲人襟裙，撲人眉宇，五光十色，藻如雲錦，衆驚詫，凝視忽失道所在。再視蝴蝶，則紛紛鼓翼馳騁飛騰，漸飛漸高，漸遠漸小，息瞬皆不見。

華善述

闕名

華善述字仲達，住塘口。少有靈質，喜談黃庭內經之事。弱冠時嘗遇一仙姝，夜降容色端麗，世無其匹。云與君有夙緣，經宿而去。情好甚篤，臨別贈詩有冷落珠簾二十秋，今宵重脫翠雲裘之句。授華辟穀煉氣諸方。華遂絕粒，閉關獨處。時聞異香，又嘗有笙鶴往來。因賦懷仙雜詩有永夜夢魂千里月，隔年書信數行文。至今別處依然在，夜夜明河瀉枕邊之句，皆有感而作。瑯琊王世貞沛國劉鳳皆嘗至其家，並見羣鶴翔舞於空中，如迎如送。故華年甚高，無疾坐脫。

山林友

闕名

東洞庭幽僻處，某太史築室三楹，藥鑪茶竈書卷古彝器雜設。文几晴窗，靜坐誦黃庭經，聲出戶。一古衣冠老叟，掀簾扶杖入，試與語，超妙迥異庸俗。見壁上囊琴，取下鼓水仙操，音韻琅琅，高裂金石。問其姓字年齒，笑不答。曰：所居相去不遠，聞君軼塵士，故相訪。作山林友。太史與論兩漢六朝正史，頗有論斷，謂南史辭華太繁，蕪宜刪節，歸純淨。自此過從甚密。一日雨後坐窗下，隨手繙太史所著古文稿，內有時宦某公復書允

太史列門牆謀當道要職。叟佛然色變。拂袖徑去。太史異送之。亦不回。願遂絕跡。

半仙

闕名

嘉靖初有胖大和尚來止南禪寺。飲酒食肉。號半仙。自言有奇術。有曹瀛字者。深相結納。將之廣。別曹曰。君自今以往二十七年中。有三大難。吾遲發數日。以報君手畫一龍一虎一美人。授之。曹曰。吾不解也。和尚沉思半日。曰。姑爲君禳之。禳七日。龍下添一竹籬。虎下添一梅花樹。美人添藁薦一束。更出三符。令以酒咽之。乃別。曹與隣婦媾。其夫遠歸。叩門甚急。於是隱身草薦中。乃免。舟經五里湖。忽遇龍陣。舟覆藉蘆中。一蓬獲濟。葬父。覓地五浪山。隱觀黑虎。將至旁。有老梅。方花升樹。而虎去。別和尚二十七年而卒。

李德林

胡寄塵

李德林。贛人。往來大江南北。販景德鎮磁貨爲業。而頻至婁。吾友顧震生。婁人也。知德林事甚稔。爲予言。德林樸實溫雅。不類負販之流。市不二價。或故倍其值。亦掉頭不顧。一日。士子旣買一瓶。慮價物不相稱。反覆凝視。德林曰。瓶可碎。信不可不立。還其貲。奪瓶擲諸地。震生異焉。追而詢之。問得毋過激乎。曰。吾或受他商給瓶。非上品。苟不碎。之何以全吾信。所失者小。所保者大。遂縱言。吾國商業。滋敗。皆無信誤之歎。歐荷擔而去。後不復至。婁或曰。德林已積貲置田宅。不復業。此矣。（轉輯江湖異人傳）

熊老僕

胡寄塵

去吾郡宛陵百三十里。而遙一鄉鎮。曰黃池。老僕嘗一夕奔而至。嗚呼。亦忠勇矣。僕熊姓。人稱曰老熊。南昌

人予族兄有儒先世宦南昌熊爲之僕清光緒乙巳有儒歸展墓挈老熊來寓予家時新學方盛科舉餘焰未息予意氣激昂不可一世然迫于嚴命應童子試有儒亦得家書責同行既至宛陵聞期尙遙託故至黃池意欲避之已而知爲訛傳老熊喘息奔來告期迫請速返予等笑置之終不欲行老熊痛恨自責負主人云此予少年事今忽忽十載世事已萬變當年豪氣銷磨殆盡而老僕誠懇之狀猶在目前吾書之吾感慨爲何如哉（轉輯江湖異人傳）

張廣才滕半仙

胡寄塵

張廣才山東人清康熙時寄跡滿州鑿山關路成一大道入以其名名之曰張廣才嶺亦曰張廣才老爺嶺或謂此爲宋時奔喪舊路然後仍塞之自張後始通輪輻滕半仙所謂亦如之初自吉林至琿春必迂道經甯古塔滕別關一徑較舊近四百餘里滕無家室妻子後入山不返人疑其仙去呼爲半仙云胡子曰二人除榛莽而通人跡比之西人所謂闢地甯復多讓而史乘地志不載僅存老爺半仙之名付與野老村童閒話此則誰之過也此則誰之過也（轉輯江湖異人傳）

河間大漢

胡寄塵

清光緒季年上海民吁報記者某君嘗深夜遇大漢與虬髯客相持客理力皆屈鼠竄去某君異焉與大漢語知大漢爲人力車夫客雇其車不給值遂窘之又知大漢非車夫實爲復仇來某君有文記之甚繁冗余藏其稿數年慮久之散失節其略於此大漢河間富人子父商於天津庚子之亂家毀父死碧眼兒擄弱弟

天涯異人傳

熊老僕

張廣才滕半仙

九九

去○拉○人○力○車○鞭○策○隨○之○力○盡○肺○裂○噴○血○死○慘○不○可○言○臨○死○執○兄○手○言○致○死○者○之○狀○則○默○識○之○潛○南○來○尋○仇○家○先○潛○心○習○三○國○言○語○復○習○拉○車○以○數○數○與○彼○輩○遇○莫○若○此○役○然○伺○之○數○月○仇○未○遇○也○吾○初○聞○大○漢○窘○客○大○呼○快○事○而○不○知○大○漢○苦○心○毅○力○不○特○此○也○此○某○君○親○見○之○親○記○之○孰○謂○當○世○無○異○人○某○君○自○署○埋○照○不○知○何○許○人○或○曰○汪○允○宗○余○後○遇○允○宗○惜○未○嘗○問○大○漢○非○業○拉○車○吾○稱○曰○大○漢○不○稱○車○夫○(轉輯江湖異人傳)

林先生

胡寄塵

林先生名若俊字振夫無爲州人明太學生鼎革後隱居東郊四十年不入城市每三月十九必賦詩一首其一曰杜鵑啼血警春眠起拜燕山望遠天黯淡愁雲纏殺氣昏黃殘月墮村烟鼎鐘徒豢三千士社稷空悲十七年流恨難窮惟此日吞聲野老哭江邊明遺民如先生者多矣而先生爲吾鄉故老吾尤有感於中而記之若曰闡幽則吾豈敢(轉輯江湖異人傳)

胡孝子

胡寄塵

孝子姓胡氏吾族人也先大父復初公遺詩有胡孝子行余讀而有感焉采其序爲之傳曰孝子名春齡吾胡氏簪坑人也生父母早卒繼父又卒事繼母孝再娶婦皆不得母歡皆棄之母病思魚鱉冰取之思肉剖股以進而病卒不起春齡守母墓萬山中猛虎過其側望望然而去之會山崩石墮有聲如雷春齡慮損母柩抱之號泣巨石遂飛空而過止於墓門至今存焉鄉鄰聞者皆稱其孝出於至性云胡子曰猛虎走避巨石越空爲孝思所感歎抑偶然也吾不敢知而觀其行事則卓卓可傳者也神怪事置之不論可耳(轉輯)

跛丐

王瀛洲

粵東道上有丐焉。年三十餘。跛一足。終日行於通衢市廛間。時而掩面痛哭。時而仰天大笑。人有憐之者。與以錢。不却。亦不謝。苟不與。亦未嘗在人前作乞兒態。視其狀。頗類癲狂者。蓋傷心人。別有懷抱也。時有莫蘭馨者。粵中紳士。亦俠士也。樂善好施。見丐狀。心勿忍。乃招之至家。款以食。與以衣。丐泫泫不可。曰。僕與先生夙未識。荆今無故受君饋。非余所願。况余固堂堂七尺軀。能勿愧煞。言已。拂袖欲遁。蘭馨強挽之。曰。余知足下非常人。故招君來。語云。同是天涯淪落人。相逢何必曾相識。君達人。何拘此。丐無奈。乃受之。曰。足下遇余。厚心感甚。然余終以無故受饋。爲恥。無已。余就君家傭。以答盛惠。蘭馨不可。丐固強之。蘭馨始諾其請。至晚。蘭馨與之同飲。丐量本不豪。未既。玉山將頽矣。蘭馨乃詢其家世。丐曰。余黃姓。得勝。名山東萊州人。幼好武藝。十七投劉公麾下。得排長職。時林公則徐因焚烟。故致與外人開釁。余適當前敵。余固素憤外人欺侮。我至是。心大慰。以爲此去一戰成功。永驅番奴於域外矣。豈知一敗再敗。竟致割香港。言至此。聲瘖。不能出。泪漉漉下。良久。方續言曰。莫君乎。余之足。亦於是役所折。於是余遂成一廢人。輾轉流落於此地。余自恨不能爲國復仇。然余殊願國人復之。但余周行四方。見吾國人均酣醉於花天酒地中。何知有國恥。烏乎中國已矣。言畢。放聲大哭。蘭馨亦泣然不置。丐居蘭馨家。操作甚力。日出而起。燈上始息。雖筋疲力盡。勿顧也。蘭馨見其如此。待之益厚。而丐之操作亦益力。約半年。始辭而他去。從此五羊城中。丐之蹤跡遂杳。

金鈞李

楊南邨

南陽宗生權奇好客。慕古游俠士，恨不得身友其人。居常鬱鬱，謂天下毫傑當于艸澤中求之。衣冠隊裏，咸腐鼠耳。偶因事雇舟赴汜口，夜泊于王家村岸。上有叢樹，貧民三五支茅而居，狀極冷落。而艤船處距人家有半里許。洲蘆瑟瑟，怪鳥宵啼。榜人皆埋頭被中，鼯呼震耳。生獨坐枯寂，觸景愴懷。未幾月上，東山光散林薄，乃出短笛倚篷吹之。露零風起，波涌魚醒。一曲未終，突聞馬蹄聲穿林而至，心殊疑訝。屏息潛窺，彷彿見七八騎自東出控韁，駐平原中。若有俟旋一騎自西南來，疾如電掣，徑入原上。前騎咸合，卽開刀劍聲若鑿冰碎。玉馬蹄蹂泥艸，戢戢栖鳥驚鳴。寒月黯色，旋聆鶻梨聲。生不覺失聲曰：殺人矣！須臾各騎漸潰散，所餘僅五、六人，都鞭馬竄去。後來一騎乃復縱轡徘徊，舉頭望月，若甚躊躇滿志。徐徐向河干行，生固嗜奇，又念座有青氈，船惟素月來，亦何害遂危坐。俟之來者至河灣，下騎繫馬，白楊下側，覩船中時，船去岸且三丈許。舟人懼盜，故爲是以防。生覲客將何作，顧客逡巡，次忽呼曰：船中有佳釀，否？生遽應曰：有客曰善，一躍已登。生愕然，迫視來者，乃幡然一叟，長髯垂腹，若飄銀絲，眉宇颯爽，有英氣入艙。自坐笑向生曰：今日大快意，欲借杯酒一澆塊壘，腸卒不以不速相罪也。生唯唯，未敢置言。卽出酒酌，客客不辭，懷中出二金鈞掛耳上，以一端捲其鬚，乃舉杯鯨吸畢，三爵吁氣曰：美哉酒也！旣而顧生先時聞有吹笛者，非足下乎？盍爲我奏一曲。生亦不辭，卽拂笛而吹。客以手拊板，若爲點拍，至入破，遽翩然起舞，引吭而歌。歌曰：漢山高兮漢水清，風澹澹兮月明明。吾仇旣死兮吾功成，歌竟謂生曰：吾去矣。黃鵠磯頭再相見也。登岸上馬，揮鞭急馳，頃刻而渺。

生。矚。目。久。之。如。在。夢。寐。舟。子。乃。探。首。瞰。生。相。語。曰。險。哉。生。曰。何。謂。也。舟。子。搖。首。曰。初。生。之。曠。不。畏。虎。殆。卽。君。輩。若。知。頃。來。者。何。如。人。蓋。卽。懸。賞。嚴。緝。之。大。盜。金。鈎。李。鬚。子。也。公。乃。懵。懵。招。之。飲。酒。令。人。嚇。煞。生。笑。曰。金。鈎。李。我。久。仰。其。名。何。幸。而。遇。聞。彼。急。難。好。義。汝。儕。遂。誣。以。盜。邪。舟。子。曰。否。金。鈎。李。惟。好。讐。官。府。渠。謂。今。世。衣。赭。黼。坐。堂。皇。者。皆。民。賊。耳。不。殺。之。無。以。警。貪。暴。故。官。中。欲。得。之。究。之。彼。于。我。輩。原。多。惠。吾。表。兄。某。嘗。販。鹽。鄖。陽。途。中。爲。暴。客。所。刦。虧。散。千。數。百。金。憂。苦。將。自。裁。幸。得。李。鬚。子。援。手。盡。返。原。貨。更。畀。三。十。金。使。速。歸。如。是。者。皆。實。事。盜。能。若。此。邪。第。其。名。慘。淡。怖。人。又。易。召。是。非。故。以。避。之。爲。上。耳。生。乃。點。首。寅。夜。放。舟。行。旣。至。沔。勾。當。事。畢。溯。想。前。日。事。殊。念。金。鈎。李。之。約。遂。渡。江。賃。屋。于。黃。鶴。樓。下。以。待。李。來。居。數。日。無。所。見。遍。訪。市。廛。中。亦。不。得。甚。生。快。一。日。其。友。招。飲。客。散。而。歸。方。躑。躑。街。隅。迎。面。一。轎。來。健。僕。十。餘。人。擁。繞。左。右。勢。極。烜。赫。行。人。皆。爲。辟。易。快。念。此。中。不。知。又。何。權。貴。倘。金。鈎。李。見。者。不。又。將。以。民。賊。懲。之。邪。迺。屏。足。人。叢。中。轎。過。偶。窺。之。則。坐。者。儼。然。金。鈎。李。也。大。愕。急。尾。而。偵。之。乃。轎。行。絕。疾。竭。足。之。力。不。能。及。不。得。已。廢。然。而。返。忖。事。之。離。奇。殆。未。有。若。此。者。矣。未。幾。門。外。有。尋。南。陽。宗。一。郎。者。生。出。視。之。則。一。青。衣。不。相。識。也。致。詞。曰。先。生。莫。是。宗。一。郎。否。生。曰。然。青。衣。曰。我。主。人。方。盼。先。生。命。奴。子。來。迎。生。曰。若。主。人。爲。誰。我。乃。不。省。有。束。否。青。衣。曰。主。人。言。一。郎。非。生。客。到。自。知。未。用。束。也。生。頗。疑。欲。不。往。而。青。衣。請。殊。力。遂。隨。之。去。穿。街。度。弄。繞。城。傍。堞。紆。曲。約。三。四。里。地。漸。荒。僻。行。人。寥。落。亦。不。見。高。門。巨。室。惟。郎。當。老。屋。數。椽。雙。扉。盡。閉。青。衣。卽。前。款。關。門。啓。亦。不。見。人。生。嗜。奇。之。心。又。起。卽。不。更。懼。隨。入。門。越。庭。過。院。又。久。久。乃。至。一。側。戶。出。戶。搶。覺。天。地。開。朗。樓。閣。綺。麗。水。木。明。瑟。鳥。啼。花。落。風。定。烟。

斜穆然若出塵世。青衣卽導生至客室。旋聞內傳主人出矣。生卽足恭以俟。俄而簾開。主人入。生起迎。則又金鈞李也。生惑甚。主人殊恬然。款生坐。歡欣曰。一郎來大好。我方盼君謂讀書人。或未必堅信諾。不意君竟至也。生遜謝曰。與長者期。安敢爽誤。主人曰。如是佳極矣。因命酒。卽有兩蒼頭。上陳杯箸。供彘肩。一白酒。數斗。主人自割啖。生舉盃酬酢。笑曰。一郎勿客氣。此亦聊報前夕之厚享耳。生日。懾氣奪。不知就裏。勉爲趨承。主人顧豪甚。亦不勸客。自恣飲。嚙頃之。投箸曰。老夫縱橫南此數十年。不自量力。願爲天下孤弱無告者請命。今精神日衰。竭回顧所爲。實無異于捧土堙河。風燭之年。更能有幾。亦終不能白此志矣。夜來觀天文。大亂。且至今將捐棄。此土西走窮荒。惟弱息尙未得人。殊足爲累。願命之侍君子。幸一郎不以葑菲見鄙。言次呼傳大姑娘。生益錯愕。急啓曰。素昧生平。承丈猥重。然婚媾之事。須先請于家尊。實非能自主。惟丈省亮。主人笑曰。勿庸也。一朗固任俠者。詎坐視老夫乎。時簾外一女郎入。衣裳娟絜。風度清穆。前拜主人。主人令轉拜生曰。此南陽宗一郎女。聲也。女拜生。惶遽亦拜。主人撫手曰。佳哉。吾事畢矣。因顧生曰。老夫卽夕將遠行。不能爲若儕久留。可歸去。后福方長。努力善道。免吾憂已。生方欲啓問所惑。而主人催行甚急。兩健僕亦持燭在門。不得已。將女出送者。至通衢。別去。生視時已一更矣。不敢歸寓。寄女子旅舍。明日取裝。僭渡江。聞閩巷私語曰。昨來大奇事。某欽使之封翁。謁制軍。輒爲之題目。羣公子去后。三小姐忽失蹤。聞三小姐方論婚於某貝子。幸未定。否則制軍危矣。又聞衙中失去珍寶。鉅萬而來者。實非某封翁蓋李鬚子。僞稱者耳。不日必且大索。生大震。以目視女郎。女郎凝坐如未聞。生心稍帖。趨程遁歸。母見女亦愕異。生略舉以對。母若悟。

叩女曰。兒果李公女。邪女流涕曰。實告母。兒義女耳。兒不知本生父母何在。義父謂兒歸宗。當返南陽爲婦。當適宗氏。否且得大禍。兒不敢拒。故來此。兒亦不知其祥。惟彷彿數歲時。曾賣入宦家耳。母仰天哭曰。是矣。是矣。汝我姪也。女父黨爲縣卒。赴官河南。中途爲賊殺。女母生女。方四歲。亦將就刃。適金鉤李過渠。于三年前中暑死。襄陽道上。爲兒父救活。彼亦識女母。因請羣盜釋盜魁。怒不允。刼女而逃。爾母悲痛中。觸樹死。宗祧遂絕。后八年。因復顧生曰。爾父客江陵旅店中。忽有人夜投書。不具姓名。但云君有子。我已爲覓佳婦。君爲周氏計。亦當念及于茲。故預關白。君幸勿誤。時爾父卽疑必若舅氏事。歸嘗爲我言。不意今日竟成佳話。然彼不及見矣。言隨淚併。女郎乃大哀。亟拜母。生亦愴然。猶慮官中之果大索也。久之無聞。制軍旋受劾去。母遂涓吉。爲兩小合婚。并遙謝金鉤李金鉤。李嗣終不復來。人咸莫知其所之。宗生更至鄂。訪舊迹。街衢參差。亦終不得前時路已。

浣紗婦

楊南邨

枇杷湖湖水瑩澈如玻璃。綠楊陰底有青石。數方滑膩若鏡。則搗衣砧也。一日砧上有少婦浣紗。姿絕世。行人咸伫觀。嘖嘖羨誦不已。輕薄少年更放浪詞。自銜面首挑婦。與語婦不答。少年閱其孱弱可欺也。故黽之。互角觥故。仆婦身。婦大怒。反手標之一人。墮水。幾占滅頂。衆大噪欲前毆婦。婦立而曰。好好女。儕欺我。軟弱邪女。來當與女併死。卽舉槌。槌石板。石粉裂。羣少年皆震愕散去。有成志威者。亦惡少年也。掉臂市中。事多執牛耳。會聞羣衆敗。叱曰。若輩噉飯而已。某婦固與我款洽。行當呵責之。羣少年咸伏地上。諛詞慙成。往成。

偵婦居東市茅庵中。卽夜率衆踰垣入紙窗內。燈火熒熒。聞婦方共其姑。問富姑疲極。且語且入寐。成逼窗穴。窺婦正持剪事針。帶低頭至臆。鬢髻欹斜。不覺心動。念此鼎中鬻耳時。乃不可失。婦忽舉首視窗上。微哂成急。彈指窗紙震撼。有聲。婦旋徐放手中剪。墮案鏗然成歎。爲戰慄。眼前發奇光。羣衆驚走。不覺亦隨之。走犇至家。視之已失一耳矣。悵惘如喪魂魄。匿伏不敢出。嗣此道遇婦。輒遙避。諸惡少皆無敢仰視者。婦殊坦然。若不知前日事者。時岳陽樓上來一瘋道人。歌哭無恆。犯初爲呂公祠。道士所拒。瘋道人強投襍被而去。及暮悍然歸宿。不待道士諾。強聒亦不聽。仰目視天上。居然有誰主誰賓之概。道士怒。乘夜裹被推墮城下。明晨則又于于挾被來。狀殊無苦。仍內被祠中。叱道士曰。苟再惡作劇。合燒却此樓。令女亦不得據也。道士懼不敢更擯。逐好奇者。又訝爲仙子。是遠近轟傳來觀者。日數起。道士輒逃避。或擁被高臥。鼾聲如雷霆。某日。鼾息正足。忽衆人中一婦人挺身出。舉劍直刺道士。道士躍起曰。女亦在是邪。卽披被而走。婦後追之。十指中白氣雲涌。直裹道士。道士頂上亦現赤光。與白霧相激。鬪馳逐至湖畔。道士躍身水中。被浮沉如葉。隨浪犇流。頃刻已失。婦凝望嘆曰。又饒汝倖免矣。旁觀者大嘩。謂婦人殺人。婦從容行去。數步亦沒。識者曰。此枇杷湖上浣紗者也。卽往踵視。則湖上之居已闕無人。其姑亦不知何往。閱月客自夔州來。云見婦夔市中。已設小酒肆。贅一外方儒生爲聲。儒生者本贛人流落夔中。艱窘幾不能自存。行吟驛亭。悲愁不已。忽有一婦人控驢過。下鞍係亭柱。席地而憩。願生謂曰。郎君何事愁煩。乃爾生因爲述悃。婦笑曰。男兒何憂貧。且君貌亦非。飢寒相盍從我行。妾家有小酒肆。正乏人照料也。生方踟躕。因敵中聞之大喜。卽從婦至其家。婦

下驢入呼曰阿母兒已覓得三郎子來也屏后一老嫗拄杖出曰果邪因視生問族民生謹對嫗點首曰甚善遂館生外室爲之司經紀相處甚安嫗待生以子壻禮婦則率以黎明跨驢出暮夜方歸生旣狎乃微叩之婦笑曰初不解作賊勞君絮絮邪生亦笑罷后年餘婦一日忽歸與嫗喁喁語狀甚悲切嫗亦泣少間婦出謂生曰與君讌好年餘方期白首不謂旦夕分離情實愴痛老母衰年亦以累君幸以妾分多加奉侍妾知之必感君恩也生驟聆涕泣不知所對婦遂出門跨驢而去生乃大哀四出追尋曾無蹤兆不得以勉抑哀思復理門市經年母病逝生親視含殮孝思殊深卒哭之夕忽一女子掩入手提血巾淋漓裹人首寘香案上拜號甚哀生視之卽婦也不禁彌慟前與話契闊婦褻然如不聞拜起提巾復出生踵至門外已不見人惟稀星閃爍風蕭露零淒切瘦耳而已

辰陽賣薯翁

楊南邨

黔蜀苗亂時征剿之師雲集糧餉輓輸蹄焦敝驛亭中塵滾滾終日不絕有韋年把總者奉命解軍餉銀數千兩循辰陽大道詣前敵僕夫數十人日邪許于道韋腰矢仗劍騎從衆后會日暮宿野店中方解鞍卸載人聲喧囂一瞥卜過門外問曰何事忙鬧如許或曰韋把總解餉憇此也警者囁嚅曰此間多盜須加謹慎耳韋聞之微哂入夜列銀箱室中從者環臥地上韋則据箱假寐矇矓中聞窸窣有聲謂果有盜邪急起視乃羣鼠跳躑燈影中遂復寐而鼠聲又作韋大惡着屐逐之鼠奔去竟不復來明日羣夫起束裝欲發兩人舁箱箱輕乃如葉驚白韋韋不信穴板而闚果空空驗他十餘箱皆如此大震韋固健者知有異卽禁衆

人聲言惟託病不能行。令親信數人守室中。微服自出。意盜去。必未遠。又憶昨宵卜者言。遂欲暗訪。徧走墟落間。一無所見。自辰至午。汗浹胸背。神昏足痛。飢渴已極。憂苦特甚。遙覩道旁大樹下。有賣薯者。遂往憩。購薯。徐啖。心結氣轉。嘆喟不已。賣薯者愕問曰。觀客非貧苦者。何愁慮之深也。韋曰。難言矣。我實非愁貧苦。第丈視我。果能終保首領否邪。賣薯人肅然曰。子言殊有謂。何不披肝胆。或能助君一臂也。韋相賣薯者。龍鍾甚度。必無他意。遂爲述始末。言我意甚疑。店主人也。賣薯者凝思曰。或未然。但宵來竟無他人在乎。韋曰。唯有一卜者。我今方覓之。翁笑曰。是矣。子姑歸。我當爲子謀。韋謝而返。然未敢信也。翌晨。韋未起。翁已款關入。曰。幸不辱命。此七郎子。惡作劇。公不合輕其人也。昨往追之。渠已遠逝。踵躡至巴陵。乃晤爲述。公愁苦狀。乃蒙允。夜來已送還。公今日即可行矣。韋聆之。頗恠其誕。試探箱。則果如故。已驚喜。亟拜曰。丈真神人。願何以爲報。翁曰。勿言此。人生四海。詎無相需時邪。但此後二十年。乃復與公遇。今日之別。離正不能無介介耳。韋亦爲之執瀾。欲更覲。縷適僕夫在門。催促上道。乃別翁。抵軍交割。毫厘無少爽。因得調楓坪。岔中營。數從大經略征討。所至有功。苗事平。已陞授參戎。偶因公晉省途中。恍見前卜者。驚疑往尋。不得歸。而大病危殆。且絕。廉從。呦呦泣床。隅韋心。朗朗強言曰。無傷也。我尙有見賣薯丈人緣。其能死乎。未幾果愈。復補官南路。浮沉榔嶺間。十餘年。以老病。予告歸。夕止于驛館。聞門外人聲喧雜。僕夫云。某縣解重囚去省也。不覺隨出。位視。則赭衣荷梭者八九人。纍纍經過。就中一人似相識。諦視之。賣薯叟也。韋驚愕。叟亦見韋。笑指前程。韋心動。卽呼僕馬追之。至黃昏盡解者。乃命覓宿舍。局諸囚于空室中。韋卽佯爲過客。就東廟宿。思叟原俠士。奈

何○困○于○華○桎○渠○能○救○我○我○可○坐○視○其○死○邪○方○縈○焦○念○忽○帘○啓○叟○已○笑○而○入○曰○別○來○曾○幾○時○公○竟○老○耄○如○斯○邪○
韋○駭○起○不○知○所○對○叟○乃○拉○之○坐○曰○無○恐○某○此○行○合○是○生○前○劫○過○此○以○往○常○不○復○冗○黷○塵○世○與○公○亦○有○緣○故○來○
一○訣○耳○韋○曰○然○則○古○所○傳○兵○解○者○非○叟○之○儔○邪○叟○曰○近○是○會○鷄○鳴○匆○匆○別○去○韋○悲○慟○送○之○出○見○其○聳○身○入○窗○
中○便○寂○然○未○幾○解○者○興○呼○羣○囚○上○道○韋○覘○叟○依○然○荷○校○出○門○去○遲○明○亦○發○不○敢○語○家○衆○惟○留○心○以○俟○其○異○旋○
聞○行○人○云○某○日○省○中○行○秋○決○前○日○囚○都○無○幸○免○也○韋○乃○攢○程○進○及○是○日○日○烈○氣○溫○大○道○中○塵○陣○起○旁○午○忽○發○
西○南○風○吹○沙○走○石○咫○尺○眯○人○目○韋○鞭○馬○急○馳○亭○午○抵○城○門○控○轡○而○入○歛○見○賣○薯○翁○迎○面○來○拱○手○笑○曰○韋○君○珍○
重○韋○方○呼○問○塵○埃○如○幕○捲○地○飛○奔○交○臂○已○杳○入○城○問○之○刑○場○之○血○未○寒○也○爲○之○嘆○異○累○日○

張七

楊南邨

青○州○鄧○翁○家○貲○鉅○萬○有○子○二○曰○福○曰○壽○皆○勇○健○好○鬥○翁○亦○通○拳○術○以○故○宅○臨○曠○野○而○祛○篋○者○多○側○目○不○敢○來○
會○大○盜○鉄○鷄○子○自○曹○荷○轉○徙○至○青○于○是○素○忌○翁○而○涎○其○富○者○多○繩○翁○鉄○鷄○子○笑○曰○若○曹○詎○有○食○肉○相○留○此○一○
樹○亦○天○所○以○享○老○夫○也○遂○致○書○鄧○翁○欲○假○三○千○金○否○則○必○將○不○利○翁○得○書○躊躇○壽○在○側○抗○聲○曰○阿○翁○勿○懼○此○
恫○詞○耳○果○來○者○兒○請○一○蹴○殭○之○翁○呵○曰○稚○子○詎○識○世○間○有○難○事○我○儕○居○此○已○數○十○年○殊○無○敢○相○犯○今○鉄○鷄○子○
獨○悍○然○有○此○請○則○其○人○甯○真○狂○者○邪○但○三○千○金○亦○未○免○言○之○過○易○縱○許○之○無○鑿○之○求○亦○將○窮○供○應○今○惟○當○併○
力○以○守○耳○翁○雖○言○如○此○而○壽○滋○不○悅○鉄○鷄○子○見○書○去○無○回○復○頗○怒○卽○夜○攻○翁○翁○父○子○家○人○咸○滅○獨○結○束○坐○鉄○
鷄○子○亦○不○敢○遽○入○以○刀○撞○牆○門○狗○聲○狂○起○壽○躁○甚○必○欲○得○盜○乘○衆○不○意○突○拔○關○出○鉄○鷄○子○亦○揚○刃○來○迎○交○數○

合壽漸不支。適翁已覺。率家人出救。併力僅能敵家人。有伏垣上者。乘隙發強弩。中鶴子。肩鶴子乃負痛逸去。衆始扶壽歸。則左耳亦已粉裂。血涔涔。翁大憂。知盜必不舍壽。亦氣沮。不敢更大言。遂議聘拳師三人。居守禦盜。盜嗣夕必來。勦誅萬端。拳師皆不敢出。惟摩掌曰。若來者。則中吾計也。翁亦無奈何。始任之一日。風雨盡晦。平原中水潦沒脛。翁方伫門外。見官道中一人。掩首疾行。狀顛頓。欲仆。至門前。遂躓泥淖中。不能起。野水衝激其身。呻吟聲時時不已。翁惻然傷。閱命家人舁歸。爲之沐浴。易衣。見左脅有紫血如掌度。必受狙擊者。家有七釐返魂丹。取爲灌救。更延醫診治。逾旬病盡。起謝翁。自陳關東張七。訪親過茲。偶病爲強暴所乘。幸翁憐救。得不死。願爲僕隸。以報遂留翁家執事。甚勤敏。翁絕契之。待以客禮。張七不自安。知翁患盜。請曰。盜所以敢來擾者。謂我無戒備耳。今願擊柝爲衆拳師警衛。翁意不忍。曰。茲太辛苦。且盜未必敢來。不如任之。有諸拳師。不必更勞子也。張七力請曰。諸拳師在盜固不敢入。使七更爲助聲勢。詎不益善邪。于是每夜執鈴柝。周巡屋前后。盜果不復來。詎諱亦絕。拳師氣乃大張。日詡其功。責主人無鑿張七鼻。晒之。未幾。天候寒。翁殊念張七爲製羊裘。以禦風露。七衣之。異日復擁短褐。翁叩之曰。破矣。方覓人補綻也。翁疑訝。令取而觀焉。肩上果崩裂。翁固識者。因目七曰。夜來有警邪。七曰。然。然不止。昨夕也。特七實驅策之。故不得來擾耳。昨夕鉄鶴子自來。我與角渠。敗欲遁。踰竹籬。七亦踰。詎其黨伏老桑中。以刀斫我。幸張七彼計。不得逞也。翁咨嗟曰。盜乃讐我。若是乎難爲汝矣。然盜衆恐非一人。敵我必囑拳師助汝。張七惶謝曰。不敢勞拳師。若拳師往。七必爲盜縛矣。而拳師謂七嫉其能。蜚語大作。七不得已。偕之行。夜聞原上有吹角聲。拳方

有事盼郎君歸急行尙能及也。小人受老主人恩慚未報稱當留此以待追者耳。壽曰然則汝不歸乎。七曰利鹿兒兄弟殊桀驁其弟八大王劍術尤精必不遂捨郎君此去平安勿遲遲同及于難也。壽不得已揮淚就途共女返青州至之日鄧翁得病已彌留惟盼目望子壽到拜床下一笑而瞑。因悟七言益念之而七終不至。后鄉人有過轅轅者見張七披裘策蹇風塵僕僕謂鄉人曰幸傳語小主人前日事已得了結勿憂慮也。旋着鞭而去。

黃鬚客

楊南邨

張家口爲關內外出入孔道行旅駝馬駱驛于途逆邸中日夕輒滿市南有酒家飲者亦常數十人一日薄暮有虎漢跨驢過憩于店外下驢係槐陰翦拂而入據座疊呼酒鷄睛閃電黃鬚繞頰狀獠惡侍者屏息不敢視客索羊胛命斗麪作餅釀酒以巨盞喝嚼甚豪既而拔刀切肉刀小鈍輒擲之門外曰誰家削足物亦以供割養邪更于懷中出小七首割肉大啖食次酒麪俱盡鼓腹曰今日才行五百里便爾飢渴已酒備皆結舌不敢進客忽顧主人曰興和道非某某耶主人肅對曰然客罵曰真狗官不殺何待也主人大震謂客醉狂矣然又不敢撩其怒姑唯唯客摩掌七首徐入囊中沉吟若有思時門外一生入衣冠舊敝容色顛頓探袖出青錢數文購碎牛肝食之主人甚輕之挪揄令出生不顧客旁睨呼曰秀才來此間可恣女啖也生視客上下欣然同座舉餘肉盡之曰飽矣然願聞公姓氏客曰不須問也但問秀才何至此生曰某洛陽人會從友來茲遂落拓未得歸耳客曰亦頗思歸故里乎生曰固所願也客遂出白銀一錠付生備行李更以

一書曰煩交京城東街康八郎道某因小憾待釋行且至也生拜辭曰陌路逢公何敢猥承高貺客笑曰某意亦無他但覩秀才固是快人乃相累耳時晏某當去再圖后晤可已生不得卻卽送客出門觀其上驢去旋亦附伴南歸抵都下往訪康八郎乃竟無知者因懷書徜徉于市遇一少年跨怒馬疾馳而來見生驚問曰此非某邪卽有一僕詢生君非致書康八郎者乎生愕異曰然顧康八郎何在僕曰馬上是也生遂揖少年呈客書少年觀書欣喜下騎謂生曰寒家咫尺能垂顧乎生卽隨少年行穿永巷至一宏開下少年以鞭搥門門啓有兩人出迎執禮甚恭少年讓客入捨級而登至一廣堂中陳巨案東西壁懸弓劍殆滿少年坐生案西已則據東頭曰辱君遠臨疏於款接幸不見罪生謝曰某素率陋寵陪明教方以爲慶何遽客气相外少年曰公真快人也因呼左右具酒我將與客共醉卽有健僕十餘魚膾上敷箸列鼎咄嗟間瓊筵盛設少年持巨觥勸生酒一巡忽外報大主人至少年及生起迎見客提革囊昂然而入顧生笑曰秀才在此耶生唯唯客卽就座謂少年曰此間事殊不可圖然意中亦得快臆事彼負心者已爲我殺却三妹子冤可雪矣少年曰此正足爲阿兄賀爰酌客客引滿復語生曰秀才來此甚善方有小事相煩某有妹居洛陽東門外名鄭金娘公歸幸爲我存問更一物并煩攜付因以革囊異生生視之隱隱有血迹怔忡不敢對客笑曰快人固不快耶生申辯曰承公猥愛有事固不敢辭然公竟夢夢使人恐亦非信義相照之道也客曰是非某有意實告君我兄弟十五人皆海上豪士會聞中國王氣盡世方有事爰與弟輩來觀且了私事今縱橫走塞內外默相當世人則天下尙不至遽更易且地氣漸起于東南散漫彌濛是將別有古今未覩之變局

亦師即握刀跳往七隨之叢莽中黑影續出爭前攻拳師兵刃未接拳師忽大叫而仆七厲聲曰鼠子敢爾邪懷中出七首才尺許迎風揮之光如礮礮倏長丈餘天矯騰空星流電掣羣盜咸不能近惟遙立呼嘯七即跨拳師身與盜相持鐵鶴子大憤併死銳進手中刀着創光對折如泥乃大駭四散去七徐徐收刃挾拳師歸擲床上則已中彈矣嘆曰我固勸公留公必欲往不爾者盜首今必成禽已拳師皆慚汗引去然自是盜畏張七竟不復來鄧翁有族弟時流宦于歸化城老病思鄉頻書道苦翁乃命子壽往省之以張七之爲伴臨行語之曰幼子獷嬌慣恐不習道途汝才勇絕世幸爲我好正導之七唯唯遂渡滹沱踰恆山出長城經大漠張七侍奉唯謹壽亦重其不敢相迕抵歸化覲候叔氏畢乃稍稍縱馬爲野游馳騁快意不使七知一日罷獵歸落日街山光照沙磧如流金液羣獸跳跟艸原中見人癡立驀然狂犇空中更有老鵬盤舞側翅欲下鳴聲咻咻光景絕蒼涼壽方據鞍顧盼遙遙一騎來漸近省騎者乃女郎跨白衛老蒼頭負袱從之諦視女蛾眉曼綠暈臉羞霞顧壽嫣然壽大惑即縱馬從行穿林度陌遠見大院落繚繞甚宏峻門前有紅柳三株穆穆拂人女郎及門而下授轡蒼頭飄然自入壽駐馬悵惘若喪精魂蒼頭牽衛同行覩壽罵曰野駱子目灼灼向人殆尋死邪壽大怒曰老狗平原曠野詎女家疆界中不許人行覽也即舉鞭欲撻之蒼頭笑曰我正思得人戲甚善甚善遂折柳枝一手控衛來逐壽壽竭力鞭擊竟不着僕身而肩背受柳條已殷殷作疼力乏气促窘苦萬分歛前女郎自門中呼曰郎君生客汝何太無禮數邪蒼頭乃斂手引衛去壽回視女郎倚門立向己微笑駢二指指墻東而入壽慚汗雨下驅馬自歸心念女郎殊弗置思彼駢二指

指牆東不測其意久之悟曰駢二指一雙也又數爲二牆東得非三年窺宋意乎必約我以月之二日往晤牆東也時張七已略窺壽意便進說曰塞上非關中比豪客大盜機穽徧地郎君行止須自慎壽陽唯唯及期乘七不在竊出遵舊道往抵院外日已暮徘徊牆東不見人來又懼遭虎狼焦灼特甚旣而纖月流光漸過牆半忽有人影下落壽驚顧則女已垂絙下係壽引上牆內有短梯相扶而度壽視園中亭廊紆折榆柳交蔭南面有精舍蘆簾半捲金釭方明撲撲聞蘭麝女導壽坐榻上共盡款曲女曰妾本鄰下人父母早亡隨兄來塞外不幸爲此間主人所物色刼載以歸處此且一年何異囚箠陷阱每思遁去主人防衛嚴竟不得逞昨遇郎君觀眉目間颯爽有英氣知非庸物願委身以事卒不見棄壽方愴悅迷醉至此慨然曰某在斯必不負卿意也然主人何人今亦在否女曰渠頃赴八大王讎故得約君來平日能此從客邪壽爲憤惋方相策議遠聆人聲嘈嘈言主人歸又嘩盜火光四舉女變色曰奈何壽亦驚惶連呼授我刀今日惟決死耳女挽壽涕泣情急萬狀控弦列戟者已迫窗下有莽丈夫按劍入叱女拔劍欲斫之女婉轉依壽壽舉刀迎丈夫怒舒手摔壽擲出堦下如鷹之捕雀雛壽被擲拋刀梨面胸且就縛忽空際颯然如鳥墮壽大呼曰張七幸救我七不語舉劍一揮圍衆四靡七卽負壽欲出聞簾內女郎哭甚哀敲朴聲亦正淒厲旋長號曰壯士獨忍我死耶壽亦哀七往救七乃復下奪女郎左右挾持破空飛去丈夫來追七吐二白丸擊之遂墮地壽已昏昏不復省識未幾覺在鬧市中車上視張七方倚轅共御者語壽詫曰此何許耶七曰已入關行就歸途耳壽起看流涕曰爲此奈何某尙未辭叔氏那便歸也七曰昨宵事未卽得平安郎君何可留且家

中○非○某○等○所○能○力○奪○故○旦○夕○將○捨○此○去○一○事○託○公○望○勿○見○却○然○亦○不○爲○害○也○生○乃○受○囊○客○及○少○年○復○觴○生○歡
笑○至○日○暮○始○送○生○出○餽○貽○甚○厚○生○挈○囊○覺○輕○空○無○物○遂○不○懼○坦○然○取○道○歸○明○日○復○過○舊○第○則○重○門○洞○敞○闕○無
一○人○是○時○忽○傳○卸○任○興○和○道○某○被○殺○喪○其○元○官○中○方○大○索○賊○生○知○有○異○不○敢○久○留○星○夜○奔○回○洛○陽○尋○鄭○金○娘
于○東○門○或○告○之○曰○支○茅○城○下○者○是○也○遂○往○叩○謁○則○一○婦○瞽○且○聾○不○能○應○客○生○昇○以○囊○摩○挲○似○相○識○致○詞○謝○生
生○乃○辭○出○入○夜○忽○火○發○婦○亦○不○見○



101337041

天涯異人傳

黃韻客



一一六

中華民國玖年貳月拾柒日贈送



女粉陣歷險黑幕記

▲最新第一奇書

▲百怪粉妖之活動影

▲黑幕書中之別開生面者

我生伐性莫險於色以淫色女子而機
 詐弄人則險尤險矣本書述一富家公
 子僑寓滬濱身歷姨太太偷情之險妓
 女縱慾之險女拆白黨敲詐之險女流
 氓仙人跳之險女幫匪劫奪之險女賭
 棍局騙之險下而至於女醫生之險賣
 花賣報女郎之險傍至相公之險洋奴
 之險甚而至於盜賊僧尼婢僕拐騙之
 險有事皆險無險不備耗財數百萬歷
 時不數年盡得其秘密今日歷險歸
 乃盡揭其人所未知之黑幕以章回體
 裁成此脂怪粉妖之記光怪陸離真令
 談者變色讀者銷魂非市上之抄襲報
 上新聞者所能望其項背也全書都二
 十餘萬言精裝六冊定價大洋一元八
 八角特價一元零八分外埠加寄費一
 角二分半郵票代價九五作實欲知險
 中險者盍速購閱之

總經售處 交通圖書館
 棋盤街 交通路

版權所有

中華民國六年八月一號初版
 中華民國七年五月十號再版

(名著小說一千種第二類)

(天涯異人傳全一冊)
 (定價大洋五角)

編輯者 姜俠魂

發行者 交通圖書館

分售處 本埠各大書局
 外埠各大書局

總發行所 交通圖書館

上海 交通路
 蘇州 觀前街

國家圖書館



002486593



7.2
93